

Inatsisissatut siunnersuummut oqaaseqaatit

**Nassuiaatit nalinginnaasut**

1. Aallaqqaasiut

Inatsisissatut siunnersuummi matumani sanaartornermut suliassaqarfimmi neqeroortitsisarnermut siunissami killissarititaasussat aalajangersarneqarput, taamaalillunilu sanaartornermi neqerooruteqartitsisarneq pillugu inatsit atuuttoq, suliariumannittussarsiuussinermit inatsit 1992-imeersoq, Inatsisartut inatsisaat nr. 3, 6. april 1992-imeersoq taarserlugu. Suliariumannittussarsiuussisarnermut inatsit neqerooruteqartitsisarnermut tamanut atuuppoq, taamaattumillu aamma sanatitsisut namminersortut entreprenørillu neqerooruteqartitsisarnerannut atuulluni. Suliariumannittussarsiuussinissamut inatsit arlalinnik neqerooruteqartitsinikkut neqeroorutinik unammisitsinissamut pisussaaffiliinngilaq. Aamma suliariumannittussarsiuussisarnermut inatsit tamanik suliqaarnissamut neqerooruteqartitsisarnermut (§ 4 pinnagu) atuutinngilaq, tamanik suliqaarnissamut neqeroorutit akitigut assersuunneqarsinnaanngimmata.

Suliariumannittussarsiuussisarnermut inatsit sanaartugassat suliariumannittussarsiuunneqartarnissaannut piunasaqaatinik imaqanngilaq. Inatsit taamaallaat suliart ingerlasarnerinut inatsisaavoq, suliariumannittussarsiuussinissaq toqqarneqartillugu suliariumannittussarsiuussinerni periaasissanut maleruagassiorfiusoq.

Inatsisissatut siunnersuummi tunngavissat, sanatitsisup siunissami pisortat suliassaataannut neqerooruteqartitsinermi isiginiartagassai pingaarnerit pineqarput.

Inatsisissatut siunnersuut pisortat sanaartugassaannut aamma pisortanit tapiiffigineqartumik sanaartugassanut atuutissaaq. Kiisalu neqerooruteqartitsisut namminersortut inatsimmi maleruagassanik atuinissamik pisussaatinneqassanngillat. Suliffeqarfiit namminersortut suliassaqarfimmi allani nunaniluunniit allani ataatsimut isigalugit neqerooruteqartitsisarnermut maleruagassanut ilaatinneqanngillat. Tamanna inatsisitigut inissisimanermit maanna atuuttumut allannguineruvoq, tassami suliariumannittussarsiuussisarnermut inatsimmi atuuttumi maleruagassat sanatitsisunut pisortanut namminersortunulluunniit suliakkiissutissap neqerooruteqartitsivigineqartussap annertussusaa apeqquaatinnagu atuuttussaapput. Siunnersuummili neqerooruteqartitsisut namminersortut maleruagassanik siunnersuutigineqartunik malinninnissaq toqqarsinnaassagaat eqqarsaatigineqarpoq.

Taamaaliornikkut sanaartornermi neqerooruteqartitsitsisarnermut isumaqatigiissusiortarnermullu maleruagassanik ataatsimoortunik peqaannarnissamut kissaateqarneq naammassineqassaaq.

Pisortat sanaartugassaataannut maleruagassanik atuuttussanik pisariaqartitsineq sanaartortitsisut namminersortut niuernerinnarmik tunngaveqarlutik isumaqatigiissusiortarfissaminnik toqqaasartut, pisortanit aningaasalersorneqartunik sanaartornermi tamatuma eqqumaffigineqarnissaata pisariaqartinneqannginneranik tunngaveqartutut isigineqassaaq, pisortani oqartussaasut nalinginnaasumik inuiaqatigiinni eqqarsaatigisassat amerlasuut eqqarsaatigisartussaammatigit.

Neqerooruteqartitseriaatsinut inatsisissatut siunnersuummi atorneqartunut suleriaatsit ilisimaneqartut tunngavigineqarput. Taamaakkaluartorli isumaqatiginninniartarnermut suleqateqartarnernullu nassuiaatit matuma kingulianiittut innersuussutigineqarput.

Inatsit aamma suliassanik tamanik suliaqarnermut, sanaartugassanik pilersarusiornermik suliarinninnermillu ilaqartinneqartunut atuuttussaavoq.

Aallaaviatigut sanaartugassanut isumaqatigiissusiornissamik neqerooruteqartitsinermi tamanut ammasumik imaluunniit killilimmik suliariumannittussarsiuussisoqassaaq.

Suliassamik tunniussinermi “neqeroorut akikinnerpaaq” imaluunniit “aningaasaqarnikkut iluanaarnarnerpaaq” tunngavigineqassaaq. Taanna suliariumannittussarsiuussisarnermut inatsimmi aalajangersakkanut naleqqiullugu annertusititsineruvoq. Siunnersuummi neqerooruteqartitsisup aki kisiat eqqarsaatiginagu, aammattaq pitsaassutsinut kusanarsaanernulluunniit tunngatillugu unamilleqatigiinnermik pilersitsinissamik kissaateqarnera eqqarsaatigineqarpoq.

Suliariumannittussarsiuussisarnermut inatsimmi atuuttumi akikinnerpaamik neqerooruteqartup saniatigut allanut isumaqatiginninniarsinnaatitaanermik inerteqquteqarneq taamaallaat “neqeroorut akikinnerpaaq” tunngavigalugu suliassamik tunniussisoqassappat atorneqassaaq. Kisiannili suliassamik tunniussinissamut “aningaasaqarnikkut iluanaarnarnerpaaq” tunngavigineqarsimappat neqerooruteqartunut isumaqatiginninniarsinnaatitaanermik ammaassisoqarpoq.

Isumaqatiginninniarsinnaatitaanermi neqerooruteqartitsisup niuerfimmi neqeroorummik pitsaarnarpaamik pissarsisinnaaneranut periarfissaq qulakkeerneqassaaq. Maleruagassat ullumikkut atuuttut naapertorlugit neqerooruteqartoq assersuutigalugu tassangaannartumik sipaaqquneqarnini pissutigalugu appasinnerpaamik akeqartitsiniarluni neqerooruteqartumut akit pillugit isumaqatiginninniartariaqalerpat, neqerooruteqartitsisoq taamaallaat pitsaassusissatut pilersaarutaasup pigiinnarnissaannut killeqartuinnarmik periarfissaqartinneqarpoq.

Inuussutissarsiutinik ingerlatsivinni, isumaqatiginninniarnissamut inerteqquteqarfimngitsuni allani, imaluunniit suliassanik tamaginnik

suliaqarnissamut isumaqatigiissuteqarfíullutik suliarineqartuni misilittakkat malillugit isumaqatiginninniarsinnaatitaanermi neqeroorutínik piviusorsíortunik uppernartuníllu angusaqarsinnaaneq akornusersimaneqanngílaq.

Tunniussínissamullí “neqeroorut akíkíinnerpaaq” tunngavíqíneqarpat neqerooruteqartítsísoq akíkíinnerpaamik neqerooruteqartut saníatígut allanut isumaqatiginninniarsinnaatitaassanngílaq. Sanatítsísoq “anínqaasaqarníkkut íluanaarnarnerpaamik neqerooruteqarnermík” tunngaveqarluni neqerooruteqartítsínermíní písuní ataasíakkaaní písaaernerpaamik angusaqarsinnaaneq nalílerneqarpat síumoortumík isumaqatiginninniarsinnaatitaaníssamíník atorunnaarsítsísínnaavoq.

Paasíumínarnerulersítsíneq ataatsímút ísígálugú neqerooruteqartunút síuníssamí neqerooruteqartarnermí sállíutínnéqartalerníssamút períarfíssiígáluartoq písórtat sanaartugassanut isumaqatígíissusíortarneríní tamat níuernerup íngerlanéqartarnerínút paasímasaqalerníssaat, aammalu attuumassuteqanngítsuník ísumagísaqartanngíníssap qulakkeerneqarníssaa kíssaatígíneqarpoq. Taamaattumík sulíaríumánntussarsíuussísarnermí ínatsímímí maleruagassat atuuttut íngerlateqqínneqarníssaat síunnersuutígíneqarpoq, taamaalílluní neqerooruteqartut neqeroorutít ammarneqarneríní najuunníssamút písínnaatítaaffeqaannássammata, aammalu neqeroorutít anínqaasartaanník nalórníssutaasínnaasuníllu paasísaqarsínnaassallutík. Sanatítsísút nammínersórtut suleríaatsímíník íngerlatsíínnarníssamík kíssaatéqartut aamma suleríaatsít taakku malínníssaat toqqarsínnaavaat.

Aamma síunnersuut neqerooruteqartítsísúp neqerooruteqartítseríaaatsímík neqerooruteqartítsínerullu píareersarneqarníssaaník toqqaanerminí períarfíssaník, unammílleqatígíínerup naammagínartumík íngerlanéqarníssaanút qulakkeerífíusuník atuínníssamút písússaaffeqarneranut aalajangersakkamík ímaqarpoq.

Kíisálu neqerooruteqartumík toqqaanermí tunngavíssat anínqaasaqarníkkut tekníkíkíkkullu pígínnáasassanut tunngasút piviusorsíortut ímmíkkoórtítsívíunngítsullu tunngavíqíneqartarníssaat síunnersuutígíneqarpoq.

Inuíaqatígííní písútsít tunngavígalugít nalíínníssaq tunngavígalugú ísumalluutíssat písáasumík atórneqarníssaat qulakkeerníarlugu, aammalu neqerooruteqartup sulíassamík tígusíníssamík qulakkeerífíqíneqarání píffíssamút sívísóorsuarmút ísumalluutíssaník atuísaríaqarníssaa pínnígítsóorníarlugu uppernásaaníssamút píffíssarítítaasup písaríaqanngítsumík sívísútínnéqanngíníssaanút maleruagassamík síunnersuuteqartoqarpoq. Neqerooruteqartítsínermí píumasáqaat taamaattoq neqeroorutínik pílerínarnerusuník saqqumíussíníssamút órnígínarnerutínnéqarsínnaavoq.

Sanaartórnermí suléqataasunút malítassaník érsaríssuník pílersítsísoqarníssaa, suléqataasunút tamánút íluaqutíssatút ísígíneqartaríaqarpoq. Taamaattumík nammínersórluní sanaartórníssamút neqerooruteqartut aamma ínatsímímí aalajangersakkamík tamákíísuník ílaannaasumílluunníit malínnínníssamút

neriorsuuteqartarnissaat siunnersuutigineqarpoq. Tamatuminnga nalunaaruteqarneq assersuutigalugu neqerooruteqartitsiniarluni allagarsiussa qqutigalugu, imaluunniit neqerooruteqartunut neqerooruteqarnissamut kajumissaarneqartunut toqqaannartumik saaffiginnikkut pisinnaavoq.

Inatsisissatut siunnersuutigineqartup atuutsilernissaanut piffissaq sivisusariaqanngilaq. Neqerooruteqartitsisut ullumikkut suliariumannittussarsiuussisarnermi periaatsinik ilisimaneqartunik atuinissamik kissaateqartut taamaaliorinnaapput. Akerlianik inatsimmi suliariumannittussarsiuussisarnermut nassuiaatit ima eqaatsigilerput, allaat assersuutigalugu suleqatigiittoqarniartillugu suleqatigeeriaatsinik nutaanik atuinissaq periarfissaqartinneqarluni.

Suleqatigiinnermi siusissukkat sanaartugassap aalajangersimasup ingerlaqqinnerani atuuttussanngortinneqartussamik suleqatigiinnissamut isumaqatigiissusiornissaq siunertaralugu unammilleqatigiinnerup kingorna siunnersortit entreprenurillu toqqartorneqarsinnaanissaat anguniarneqartassaaq. Suleqatigiinnermi suliasamik taamaattumik tiguisoqartillugu suliasap sukumiisumik nassuiaasioorneqarsimasannginnera, taamaattumillu nalinginnaasumik akigititassatut atuuttussamik neqerooruteqarsimasannginnera nalinginnaasuuvoq. Tamanna pissutigalugu aatsaat “aningaasaqarnikkut iluanaarnarnerpaamik neqerooruteqarnissaq” tunngavigalugu suliasamik tunniussisoqartussaattillugu suleqatigiinnissaq aatsaat atorineqarsinnaasarpog, taakkunanilu akinut tunngavissat tamakkiisut suliasamut ataatsimut atuuttussamik akeqartitsisarnermi allaanerumik tunngaveqartinneqarsinnaasarpog, soorlu “akigititassatut anguniagaq” (target price), akit annerpaaffissaat (missingersuutitut atuuttussanngortinneqartussamik killiliinnermi), ataasiakkaanut akit, nalunaaquttap akunneranut akit assigisaallu tassani pineqarlutik.

Inatsisissatut siunnersuut malillugu kommuninit Namminersornerullutik Oqartussani aamma sanatsisuni Namminersornerullutik Oqartussanit tapiiffigineqartuni suleriaatsit malinneqassapput.

Suliariumannittussarsiuussisarnernut inatsit atuuttoq malillugu kommunit neqerooruteqartitsinermi suleriaasissamik aalajangersimasunik malitaqarnissamut pisussaataareerput. Suliariumannittussarsiuussisarnermut inatsimmi peqqussutit arlallit inatsit manna atorlugu oqinnerulersinneqarput.

Tassalu siunissami aamma sanaartugassanut minnernut isumaqatigiissutit, suliaqartinniakkanik ilisimatitsererluni neqerooruteqarfigitinneqartut siunissami unammilleqatigiiffiunissaannut periarfissanik pitsaanerusunik pilersitsisoqarpoq.

## 2. Inatsisartut inatsisissaattut siunnersuummi immikkoortut pingaarnerit:

### 2.1. Inatsisip atuuffissai

Inatsit pisortat sanaartugassanut isumaqatigiissutaannut imaluunniit sanaartugassanut pisortanit tapiiffigineqartunut atuutissaq.

Namminersortut sanaartornerisa neqerooruteqartarnermut inatsimmut ilanngunneqannginnissaa siunnersuutigineqarpoq. Suliassaqarfinni allani nunaniluunniit allani suliffeqarfiit namminersortut ataatsimut isigalugit neqerooruteqartitsisarnermut maleruagassanut ilaatinneqanngillat.

Naalakkersuisut isumaat malillugu suliassaqarfiit namminersortut siunissami sanaartornermut isumaqatigiissusiortussanngortillutik neqerooruteqartarnermut maleruagassat isumassarsiorfigisassavaat.

Sullissisut unammilleqatigiinnermut inatsisitigut tunngavissarititaasut ataqippatigit niuernerup iluani sanaartorneq pitsanngortinneqassaaq. Tamatumunnga atatillugu erseqqissaatigineqassaaq neqerooruteqartitsisarnermi neqerooruteqartarnermut inatsimmi pisussaaffilerneqartussat kisimik tassaammata *neqerooruteqartitsisut*.

## 2.2. Pitsaassutsimik unammilleqatigiinnermi isumaqatiginninniarsinnaatitaaneq

Neqerooruteqartitsinermut atatillugu isumalluutininik atuinissaq suliariumannittussarsiuussinermi aningaasaqarnikkut iluanaarnarnerpaaq tunngavigineqartillugu isumaqatiginninniartigineqartussat amerlanerpaaffilerneqarnerisigut annertunerpaaffilerneqassaaq. Tassalu annerpaamik pingasut ikinnerusulluunniit kisimik isumaqatiginninniartigineqarsinnaanissaat, aammalu isumaqatiginninniartigineqartussanik toqqaanermi neqerooruteqartitsinermut uppersaanissamut piffissarititaasut suulluunniit atuutsinneqaralarpata neqerooruteqartut qaaqquneqanngitsut neqeroorumminnik atuisinnaajunnaarsinneqartarnissaat siunnersuutigineqarpoq. Annertunerpaaffiliinikkut suliariumannittussarsiuussinerpiamut atatillugu unammilleqatigiinneq nukittortinneqartussaavoq, neqerooruteqartut aatsaat pitsaanerpaat pingasut akornanniikkunik isumaqatiginninniarnissamut qaaqquneqartartussaammata. Aamma isumaqatiginninniartussat pingasunut killilerneqarnerat unammillernerup pitsaasumik ingerlanneqarnissaata qulakkeerneqarnisaanut naammattussaavoq. Piffissami suliariumannittussarsiuussiffiusumi unammilleqatigiinnerup annertunerulerneratigut, tassalu sanatitsisup siunissami isumaqatiginninniartigisassaasa (pitsaanerpaat) “pingasuinnanngortinneqarnerisigut” unammilleqatigiinnissamut killiliissutaasut illuatungilerneqartussaapput. Tamatuma saniatigut neqerooruteqartut isumaqatiginninniarnernut qaaqquneqanngitsut ingerlannartumik neqeroorumminnut pisussaataajunnaartarnerisigut, taamaalillutillu suliakkiissutip inaarutaasumik tunniunneqarnissaata tungaanut isumalluutissanik piareersimatitsisarunnaarnerisigut isumalluutininik atuinissaq annikillisinneqartussaavoq.

Aamma neqerooruteqartitsisut siunissami maleruagassat malillugit neqerooruteqartut tamaasa ullumikkut pisartutut isumaqatiginninniartigisarunnaartussaagamikkit isumalluutissanik sipaagaqartussaapput.

### 2.3. Suliaqartinniakkat ilisimatereerlugit neqeroortitsisarnermut maleruagassat

Suliaqartinniakkat ilisimatereerlugit neqerooruteqartitsinissamut qummut killissarititaasoq 500.000 koruuninut aalajangerneqarpoq. Tamanna illuatungeriinnut isumalluutinik sipaaruteqarfusinnaavoq. Neqerooruteqartitsisut neqerooruteqartitsinissamut tunngavissanik nassuiaasersorluakkanik suliaqassanngillat. Aamma neqerooruteqartut isumalluutinik sipaagaqarsinnaassapput, matuma siuliani oqaatigineqartutut suliaqartinniakkat ilisimatereerlugit neqerooruteqartinneqartussat amerlanerpaamik pingasut sinnernagit amerlassuseqartussaammata, kiisalu killilimmik suliariumannittussarsiuussinermi neqerooruteqartut ikinnerpaamik tallimat neqerooruteqartinneqarnissaat tunngaviusussaalluni.

Killissarititaasup 500.000 koruuninut aalajangerneqarneratigut maleruagassap neqerooruteqartut assigiinngitsorujussuit, assigiinngitsorujussuarnik misilittagallit niuerfimmi misilerarneqarnissaannut atuunnissaat eqqarsaatigineqarpoq, aammalu sanatitsisunut misilittagakinnerusunut sanaartornermi unammilleqatigiinnerup pitsaasuusinnaanissaa, suliariumannittussarsiuussinermilu neqerooruteqartitsinerup neqerooruteqarnissamut tunngavissat ersarissumik nassuiarneqarsimasut malillugit ingerlanissaa eqqarsaatigineqarluni.

Aningaasanut killissarititaasut pisortanit imaluunniit pisortanit tapiiffigineqartumik sanatitsisunut pingaarnernut namminersortunut atuutinngilaq, naak siunnersuummi § 1, imm. 2, nr. 2 naapertorlugu taakku inatsimmi matumani ilaatinneqaraluartut. Neqerooruteqartitsisulli taakku suliaqartinniakkat ilisimatereerlugit neqerooruteqartinneqartussat amerlanerpaaffissaannik malinnittussaapput, taamaattumillu ullumikkut amerlanerpaaffissatut atuutsinneqartunik aamma malinnittussaallutik.

### 2.4. Paasiuminarnerutitsineq

#### 2.4.1. Suliariumannittussarsiuussinerit toqqaannartumik neqerooruteqartitsiviusut

Suliariumannittussarsiuussinernut toqqaannartumik neqerooruteqartitsiviusunut atatillugu neqerooruteqartitsisup neqerooruteqarnissamut kaammattuinermini neqerooruteqartinniakkat amerlanerpaamik qassiussanersut ilisimatitsissutigissavai.

#### 2.4.2 Tunngavissani immikkoortunik nalilersuineq

Neqerooruteqartitsisup ataatsimoorlutik nalilersuinerminni sapinngisamik tunngavissani immikkoortut allassavaat. Taamatut iliorluni tunngavissani immikkoortut nalilersornissaat ajornarpat neqerooruteqartitsisup tunngavissani immikkoortut tullerriiarlugit allassavai. Maleruagassap taassuma paasiuminarnerulersinneqarneratigut neqeroorutit akornanni naleqquttumik

piviusorsioortumillu toqqaasoqarsimanersoq pitsaanerusumik misissorneqarsinnaalissaaq. Tamatuma saniatigut sanatisisup piginnaaneri immikkut ittut piumanerai neqerooruteqartup ajornannginnerusumik nalilersinnaalissavai, taamaattumillu neqerooruteqassanerluni paasisinnaassallugu.

#### 2.4.3. Isumaqatiginninniarnermi tunngavilersuutit pitsaanerusut

Paasiuminassuseq tunngavilersuinissamut maleruagassanut piunasaqaatinik aalajangersaanikkut nukittorsarneqassaaq.

Suliariumannittussarsiuussinernut atatillugu tunniussinissamut “aningaasaqarnikkut iluanaarnarnerpaamik” tunngaveqarluni isumaqatiginninniarnarit ingerlanneqartillugit neqerooruteqartitsisup qaaqquneqanngitsunut isumaqatiginninniarnarfigineqareersunut neqeroorutip ajugaasup piginnaasaanik iluaqutissartaanillu tunngasunik paasissutissiilluni qaaqquneqannginnerannut tunngavilersuinissaq ingerlaannartumik pisussaaffigilissavaa.

#### 2.5. Neqerooruteqartitsisarnernut Maalaaruteqartarfik

Neqerooruteqartitsisarnernut Maalaaruteqartarfimmik Naalakkersuisut pilersitsisinnaassasut inatsimmi siunnersuutigineqarpoq. Maalaaruteqartarfimmik taamaattumik pilersitsinissami suliatigut piginnaasat pisariaqartinneqartut, eqqartuussivittut ilusiligaallutik neqerooruteqartitsisarnermi suliat teknikkimut tunngasortaannik pisariusunik aalajangiisinnaasut katersorneqarnissaat siunertarineqarpoq.

Neqerooruteqartitsisarnernut Maalaaruteqartarfimmi eqqartuussivittut ilusiligaasumik pilersitsinikkut eqqartuussivinnut nalinginnaasunut suliaakkiisinnaaneq mattunneqassanngilaq, kisiannili neqerooruteqartup neqerooruteqartitsisullu akornanni aaqqiagiinnginnerit aningaasaqarnermut tunngasut piffissap naammaginartup iluani aaqqinniarneqarnissaannut sulianik ilisimasaqarluartunut katersuuffeqarnissaq periarfissinneqassalluni.

### **3. Pisortanut aningaasaqarnikkut allaffissornikkullu sunniutissat:**

Suliariumannittussarsiuussisarnermi inatsimmi neqerooruteqartunik arlalinnik isumaqatiginninniartarnermut (§ 3, imm. 3) inerteqquteqarnerup, aammalu suliaqartinniakkat ilisimatereerlugit neqeroortinneqartut amerlanerpaaffilerneqarnerinik (§ 5, imm. 1) atorunnaarsitsinikkut pisortat sanaartugassaataannut isumaqatigiissusiornissamut unammilleqatigiinneq sipaaruteqarnermik kinguneqarsinnaasumik annertusitinneqartussaavoq.

Kommunit sanaartugassaataannut isumaqatigiissusiortarnermi Namminersornerullutik Oqartussanut maleruagassat assinginik atuutsitsisarnissamik siunnersuut unammilleqatigiinnermut iluaqutaasussaavoq, kommunit suliassanut

annertuunut suliaqartinniakkat ilisimatereerlugit neqeroortitsisinnaanerat tunngaviatigut killilersorneqalersussaammat. Suliassanili tapiiffigineqartuni pisortat neqerooruteqartitsisarnerannut maleruagassat ullumikkut kommuninit malinneqareerput. Kiisalu maleruagassat ilaatigut siunnersuutigineqartut neqerooruteqartunut allanut isumaqatiginninniarsinnaatitaanermut tunngatillugu maleruagassanit, suliariumannittussarsiuussisarnermut inatsit malillugu ullumikkut kommuninit malinneqartussanit eqaannerupput.

Ilisimatitsissutigineqassaaq maannarpiaq sulianik tigummisaqartoqarpiangimmat, taamaattumillu suliat ikittunnguit, atorfimmi akuerisami annerpaamik affarmiit ataatsimut atorfeqarfiusumi nammagassanit annertunerusumik allaffissornermi suliassat amerlinissaat naatsorsuutigineqanngilaq.

Akiliisitsisarnermi isertitat isumalluutitut pisariaqartinneqartunut matussusiisinnaassapput, Neqerooruteqartitsisarneq pillugu Maalaaruteqartarfup sulinera isertitatigut matussuserneqartartussaammat. Taamaattumik pisortanut aningaasaqarnikkut sunniutissat annikitsuaraannaapput, aningaasartuutissat maalaaruteqartarfimmit imaluunniit maalaarutinit, maalaaruteqartarfimmut tunniunneqarsimasinnaasunit matussuserneqartartussaammata, tassanili allattoqarfittut ikiorsiinermi atorfik atugassanngortinneqartussa q ilaatinneqanngilaq.

#### **4. Inuussutissarsiornermut aningaasaqarnikkut allaffissornikkullu sunniutissat:**

Maleruagassani siunnersuutigineqartuni inuussutissarsiornermi pisortat sanaartugassaataannut isumaqatigiissusiornissamut unammilleqatigiinnerup nalingiinnerusumik atugassaqartitsiviusumik ingerlanneqarnissaa annertunerusumik qulakkeerneqassaaq aammalu neqeroorutit sanaartornermi suliassaqarfimmi tunniunneqartat amerlanertigut nukissanik atuiffiusartut peqqissaartumik nalilersorneqartalissapput.

Suliakkiissummik tunniussinermi akit tunngavigineqaannartarnerisa oqimaqaataanerata peerneqarnerani, aammalu “aningaasaqarnikkut iluanaarnarnerpaamik neqerooruteqartumut” tunniussinissamut tunngavissamik pilersitsinikkut eqaannerulersitsinermi sanaartornerup iluani naammassisaqarsinnaassutsikkut pitsaassutsikkullu ineriartortitsinissamut tunngavissiisoqassaaq.

Siunnersuutip atuutilerneratigut suliaqartinniakkat ilisimatereerlugit neqeroortitsisarnermi neqeroortinneqartussat marlunniit pingasunut amerlineqarput, tamannalu unammilleqatigiinnerup annertunerulerneranik akillu appasinnerulernerannik kinguneqassasoq naatsorsuutigineqarpoq. Tamatuma saniatigut sanatitsisup suliariumannittussarsiuussinermi appasinnerusumik akeqartitsiniarluni neqerooruteqartup saniatigut allanut isumaqatiginninniarnissaanut inerteqquteqarnerup atorunnaarsinneqarnera inuiaqatigiit aningaasaqarnerannut iluanaarutissartaqassaaq.

Inatsisissatut siunnersuutip atuutilerneratigut sulinermut maleruagassat ataatsimoortut, annertuumik siammarneqarnerminni imminerminni aaqqiagiinngittarnernut annikillisaataasussat atuutilertussaapput.

Kiisalu siunnersuutip atuutilerneratigut sanatitsisut allaffissornikkut suliaat annikillisinneqassapput, suliffeqarfiit atuisullu tunngaviatigut neqerooruteqartarnermut maleruagassanut ilaatinneqartussaannngimmata.

#### **5. Innuttaasunut aningaasaqarnikkut allaffissornikkullu sunniutissat:**

Suliariumannittussarsiuussisarnermut inatsisip atorunnaarneratigut innuttaasut sanaartugassanut suliaqartinniakkat ilisimatereerlugit neqerooruteqartitsisarnerminni neqerooruteqartinniakkat marluinnaasarunnaarnissaat angussavaat.

#### **6. Avatangiisinut pinngortitamullu sunniutissat:**

Siunnersuut avatangiisinut sunniuteqarnerluttussatut nalilerneqanngilaq. “Aningaasaqarnikkut iluanaarnarnerpaamik neqerooruteqarnissamut” naapertorlugu tunniussinissamut tunngavissat eqaannerulersinneqarnerini akit pillugit unammillernerinnaat saniatigut periarfissat allat ammaanneqassapput, tamatumunngalu atatillugu sanatitsisoq sananerup nalaani imaluunniit sanaartukkap atuunnerani avatangiisit illersorneqarnissaannut siunnersuummik pitsaanerpaamik neqerooruteqarsinnaasumik pissarsiniarsinnaalissaaq.

#### **7. Pissutsit Naalagaaffeqatigiinnermut namminersulernissamullu tunngassuteqartut:**

Siunnersuutip pissutsinut Naalagaaffeqatigiinnermut namminersulernissamullu tunngassuteqartunut sunniuteqarnissaa naatsorsuutigineqanngilaq.

#### **8. Tusarniaaneq:**

Siunnersuut ukununnga tusarniaassutigineqarpoq: A/S Inissiaatileqatigiiffik INI, Kalaallit Nunaanni Sulisitsisut Peqatigiiffiat, Iserit A/S, KANUKOKA, Unammilleqatigiinnermut Ataatsimiititaliamut aamma Atuisartut Siunnersuisoqatigiiffiannut ataatsimoorussamik allattoqarfimmut, Mittarfeqarfiit, Nukissiorfiit, NUSUKA, TSP – Teknikkimut tunngassuteqartunut siunnersortit peqatigiiffiat, Aningaasaqarnermut Nunanullu Allanut Naalakkersuisoqarfik, Inuussutissarsiordermut, Suliffeqarnermut Inuussutissarsiutinullu Ilinniartitaanernut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Kultureqarnermut, Ilinniartitaanernut, Ilisimatusarnermut Ilageeqarnermullu Naalakkersuisoqarfik, Ilaqutariinnermut Peqqissutsimullu Naalakkersuisoqarfik, Naalakkersuisunut siulittaasup Naalakkersuisoqarfia, Aatsitassanut Ikummatissanullu Pisortaqaarfik aamma Nunanut Allanut

Naalackersuisoqarfik. SIK, KNI A/S, Tele Greenland A/S, Royal Arctic Line, Royal Greenlands A/S, Illuutitut Upalungaarsimanermullu Aqutsisoqarfik, Avatangiisinut Pinngortitamullu Pisortaqarfik aamma Silap Pissusaanut Attaveqarnermullu Aqutsisoqarfik. Tamatuma kingorna Nunatta Eqqartuussivia aamma tusarniarneqarpoq.

### **9. Tusarniaanermi akissuteqartut:**

Tusarniaanermi akissuteqartuupput Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik, Aningaasaqarnermut Nunanullu Allanut Naalackersuisoqarfik, Siunnersuisoqatigiinnut Ataatsimiititalianullu Aqutsisoqarfik – Unammilleqatigiinnermut nakkutilliisoqarfik, Ilaqutariinnermut Peqqissutsimullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Nukissiorfiit, SIK, A/S Inissiaatileqatigiiffik INI, Kalaallit Nunaanni Sulisitsisut Peqatigiiffiat aamma KANUKOKA

*Tusarniaanermi akissuteqaatit imaattunik tunngavissiipput:*

### **Aningaasaqarnermut Nunanullu Allanut Naalackersuisoqarfik:**

Aningaasaqarnermut Nunanullu Allanut Naalackersuisoqarfiup oqaatigaa “Inatsisissatut siunnersuummi aalajangersakkanut ataasiakkaanut nassuiaatini qupp. 41-42-mi “§ 35-mut”-mi ulloq “1. januar 2009” marloriarluni atorneqarsimavoq, taassumalu “1. maj 2009”-mut iluarsineqarnissaa pisariaqartutut isikkoqarpoq, ullormi tassani inatsit atuutilersussatut eqqarsaatigineqarmat.”

*Attaveqarnermut Avatangiisinullu Naalackersuisoqarfiup taanna iluarsivaa, taamaalilluni ulloq atuutilerfissaa tassaalerluni 1. juli 2009.*

### **Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik:**

Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalackersuisoqarfik imaattumik allappoq:

“Inatsisissatut siunnersuummut nassuiaatini qupp. 34-mi, imm. 2-p ataani allassimavoq, allattoqarfeqarnikkut ikiorsiinissaq inunnit, sukkulluunniit (pisup nalaani) Siunnersuisoqatigiinnut Ataatsimiititalianullu Aqutsisoqarfimmut attuumassutilinnit isumagineqartarnissaa naatsorsuutigineqartoq allassimavoq. Nassuiaat taanna peerneqartariaqartoq Naalackersuisoqarfik taamatullu Aqutsisoqarfik isumaqarput. Inatsisissatut siunnersuummi § 26, imm. 3-mi

(maannakut § 27, imm. 3) allassimavoq, Naalackersuisut allattoqarfeqarnikkut ikiorsiisassasut. Taanna naammakkaluarpoq. Kiarpiaap tamanna isumagissaneraa isumaqatiginninniutigineqartassaaq.”

*Tamanna Naalackersuisoqarfiup tusaatissatut tiguaa siunnersuummilu iluarsillugu, taamaalilluni taamaallaat allassimalerpoq Naalackersuisut allattoqarfeqartitsissasut.*

### **Siunnersuisoqatigiinnut Ataatsimiititalianullu Aqutsisoqarfik – Unammilleqatigiinnermut nakkutilliisoqarfik:**

Unammilleqatigiinnermut nakkutilliisoqarfik imaattunik oqaaseqaateqarpoq:

“Inatsisissatut siunnersuummi § 12-imi maleruagassamik, siullermeerutaasumik neqerooruteqartitsinertaqanngitsumik killilimmik suliariumannittussarsiuussinissamut periarfissat neqerooruteqartumit atonerlunneqannginnissaannik qulakkeerisussamik amigaateqartoqartoq malunnarpoq. Taamaattumik unammilleqatigiinnermut nakkutilliisoqarfiup Naalackersuisoqarfimmut siunnersuutigissavaa, aalajangersakkamik, Naalackersuisup akulerussinnaaneranut aammalu siullermeerutaasumik neqerooruteqartitsinertaqanngitsumik killilimmik suliariumannittussarsiuussisarnermik killiliisinnaanissaanut piginnaatitsitsiviusumik ilanngussisoqassasoq.”

*Naalackersuisoqarfiup aalajangersagaq allanngartippaa, taamaalilluni siunertamut naapertuuttunngorlugu erseqqissumillu nassuiarneqarsimalersillugu.*

“Tunniussinissamut piumasaqaatit

Inatsisissatut siunnersuummi § 14-imi tunniussinissamut tunngavissat, “aningaasaqarnikkut iluanaarnarnerpaamik neqerooruteqartarneq” malillugu suliariumannittussarsiuussisoqartillugu atorneqarsinnaasut taagorneqarput. Tunngavissat ilaattut inuiaqatigiit aningaasaqarnerannut tunngavissat taaneqarput. Tunngavissaq taanna assigiinngitsorpassuarnut tunngasutut isikkoqarpoq aammalu neqerooruteqartumit atonerlunneqarsinnaalluni. Taamaattumik tunngavissaq taanna peeqqullugu, imaluunniit tunngavissami suut pineqarnerisut aalajangersakkap nassuiaataanut allaqqullugit unammilleqatigiinnermut nakkutilliisoqarfiup Attaveqarnermut Avatangiisinullu Naalackersuisoqarfimmut kaammattuutigissavaa. Aamma nassuiaatini assersuusiarineqartut suliakkiisup suliariumannittussarsiuussinermi pitsaviusumik ilusiliisimannginnerata kingunerisaanik, suliariumannittussaarsiuussinermi neqerooruteqartut amerlassusaannik killiliisutut isumaqarfignarput. Tamatuma kingunerisaanik pilersaarusiat akisunerulersinnaapput/ajornerulersinnaapput, inuiaqatigiinnut ajoqutaasumik.”

*Naalackersuisoqarfiup aalajangersagaq iluarsivaa, taamaalilluni inuiaqatigiit eqqarsaatigalugit mianerisassat aalajangersakkamit peerneqarluni, pissutigalugu oqariaaseq siunertamut naleqqiullugu siamasippallaamik oqaasertaliorneqarsimammat.*

"Suliariumannittussarsiuussinerit il.il. pillugit maalaaruteqartarneq

Inatsisissatut siunnersuummi Neqerooruteqartitsineq pillugu Maalaaruteqartarfimmut maalaarutininik tunniussinissamut killiliisoqarsimanersoq, unammilleqatigiinnermut nakkutilliisoqarfiup takusinnaanngilaa. Suliakkiisoq suliassamillu tiguisoq eqqarsaatigalugit assersuutigalugu sapaatit akunnerinik marlunniit sisamanut maalaaruteqarnissamut periarfissiisoqassappat, tamanna siunertamut naleqqutissaaq."

*Naalackersuisoqarfiup tamanna allanngortippaa aammalu § 29-imut imm. 4 nutaaq ilanngullugu, tassani allassimalerluni Neqerooruteqartitsineq pillugu Maalaaruteqartarfimmut maalaaruteqarnissamut piffissaliussa q sapaatit akunnerinik sisamanik sivilissuseqartoq*

"Unammilleqatigiinnermulli inatsit nutaaq atuutilerpat unammilleqatigiinnermut nakkutilliisoqarfik tassaasussaavoq oqartussaasoq, ulluinnarni inatsisip aqunneqarneranik isumaginnittuususaq. Unammilleqatigiinnermut nakkutilliisoqarfik maalaaruteqarsinnaatitaalerpat, tamanna suliat ingerlanneqartarnerinut eqaannerulersitsisussaavoq, tak. § 28, imm. 1, nr. 2 (maannakkut § 29, imm. 1 nr. 2)."

*Naalackersuisoqarfiup taanna iluarsivaa.*

"Pisortanut aningaasaqarnikkut sunniutissat

Nassuiaatini nalinginnaasuni siunnersuutip pisortanut aningaasaqarnikkut sunniutissai naatsorsorneqarput. Neqerooruteqartitsisarnermut Maalaaruteqartarfimmik imaluunniit allattoqarfeqarnermik ingerlatsinerneq aningaasartuutissat nassuiaatit nalinginnaasut ataanni aningaasaqarnikkut sunniutissat naatsorsorneqarnerannut ilanngunneqarsimanersut, unammilleqatigiinnermut nakkutilliisoqarfiup takusinnaanngilaa.

Kiisalu § 27, imm. 3 (maannakkut § 28, imm. 3) naapertorlugu maalaaruteqarnissamut akitsuut Neqerooruteqartitsineq pillugu Maalaaruteqartarfiup suliaasa ataasiakkaat inernerinut sunniuteqarnerlussinnaasoq maluginiarneqarpoq. Maalaaruteqartarfiup sulinera maalaaruteqarnissamut akitsuut atorlugu aningaasalersorneqassappat, kisiannili maalaaruteqartoq tamakkiisumik ilaannaasumilluunniit taperserneqarpat akitsuut utertinneqartassappat, tamatumalu peqatigisaanik maalaaruteqartarfiup maalaarutigineqartoq akitsuummik annertoqqataanik akiliisinnissaanut piginnaatitaaffilerneqanngippat,

maalaaruteqartarfiup aalajangiinissamut kajumissusianik appartitsisinnaanermik pisoqartalersinnaavoq.

Taamaattumik Unammilleqatigiinnermut Nakkutilliisoqarfimmiit Attaveqarnermut Avatangiisinullu Naalackersuisoqarfik kajumissaarneqarpoq, maalaaruteqartarfiup allattoqarfia qanoq iliorluni aningaasalersorneqartassanersoq, aammalu pineqartut taakku suliami illuatungeriinnut akitsuutinik akiliisitsisarnikkut aningaasalersorneqaannassappata, tamanna suliat ataasiakkaat inernerinut sunnuteqarnerlunngitsumik akiliisitsisarnikkut qanoq ingerlanneqarsinnaanersoq erseqqissaatigeqqullugu.”

*Aalajangersakkami erseqqissarneqarpoq Naalackersuisut maalaaruteqarnermi akiliummik utertitsisoqartassanersoq erseqqinnerusunik maleruagassiussasut. Naatsorsuutigineqarpoq Neqerooruteqartitsineq pillugu Maalaaruteqartarfik nammineerluni ingerlasinnaassasoq.*

“§ 14, imm. 3-p (maannakkut § 15, imm. 3) nassuiarneqarneranut ilaliussaq

§ 14, imm. 3-mut (maannakkut § 15, imm. 3) nassuiaatini oqaaseqatigiinni kingullerni allassimavoq; “Aalajangersagaq eqikkaataasumik nassuiarneqassaaq”. Unammilleqatigiinnermut nakkutilliisoqarfiup isumaa malillugu matumani nassuiaanermut ilaliussaqartoqanngilaq, tassanili nassuiaanerup inernerana pineqarluni, taamaattumillu naalackersuisoqarfik kajumissaarneqarpoq, tamatumunnga taarsiullugu eqqarsaatigisassat suut aalajangersakkap atornerarnerani pingaartinneqassanersut erseqqissaqullugu.”

*Naalackersuisoqarfiup tamanna malippaa oqaasertarlu peerlugu.*

“§ 26, imm. 3-p (maannakkut § 27, imm. 3) nassuiarneqarneranut ilaliussaq

Siunnersuisoqatigiinnut Ataatsimiititalianullu Aqutsisoqarfiup nassuiaammut ilaliussap atuarnerani takusinnaavaa, aqutsisoqarfiup Unammilleqatigiinnermut Ataatsimiititaliap allattoqarfittut ikiorsiisarnissaa naatsorsuutigineqartoq. Aqutsisoqarfiup Unammilleqatigiinnermut Ataatsimiititaliap aamma Unammilleqatigiinneq pillugu Maalaaruteqartarfiup allattoqarfittut sullinneqarnerisa ataatsimoortinneqarnissaat isumatusaartut isumaqarfigaa, suliat ingerlanneqarnerini suliarineqartut imminnut qalleraassinnaammata. Taamaakkaluortoq Aqutsisoqarfimmiit oqaaseqatigiit imatut aallartittut; “Maannarpiq naatsorsuutigineqanngilaq...” peerneqassasoq, taamaalilluni Naalackersuisut sukkuulluunniit issiatitaasut aaqquissuussaanikkut allattoqarfittut sullinneqarneq sumut inissinneqassanersoq aalajangertassammassuk. Tamatuma saniatigut maannakkorpiq Attaveqarnermut Avatangiisinullu Naalackersuisoqarfiup aamma Inuussutissarsiornermut Suliffeqarnermullu Naalackersuisoqarfiup, Siunnersuisoqatigiinnut Ataatsimiititalianullu Aqutsisoqarfiup inissisimaffigisaata akornanni pisussaaffiit pillugit isumaqatigiissusiorortoqarsimanginnera Aqutsisoqarfimmiit eqqumaffigeqquneqarpoq. Tamanna

naammagittaalliuteqartarfiup allatseqarfiullu aningaasalersorneqarnissaanut atatillugu ersernerluutaasunut atatikkaanni, immikkoortup pineqartup peerneqartariaqarneranut tunngavigineqarsinnaavoq.”

*Naalackersuisoqarfiup tamanna tusaatissatut tiguaa iluarsillugulu, tak.  
Inuussutissarsiornermut, Suliffeqarnermut Inuussutissarsiutitigullu  
Ilinniartitaanermut Naalackersuisoqarfimmit tusarniaanermut akissuteqaat.*

### **A/S Inissiatileqatigiiffik INI:**

”Akiligassanngorlugit suliaqarnermi, neqerooruteqaqqusisoqarnerani neqerooruteqarnermi kiisalu killilimmik suliariumannittussarsiuussinermi ataatsimut isigalugu piukkunnartussarsiuussineq inatsisissatut siunnersuut malillugu inatsisinik malillinninnerunersoq ersarinngilaq. Matumunnga tunngatillugu erseqqissaatigineqassaaq, Nuummi najugaqatigiiffinni Namminersornerullutik Oqartussanit pigineqartuni suliaqarnermut tamarmiusumut peqataanissamut piukkunnartussarsiuussisarneq INI-p pitsaasorujussuarnik misilittagaqarfigimmagu, taamatut pisoqarnerani toqqartuisarneq kinaassusersiunngitsumik ingerlanneqarsinnaasimalluni.”

*Naalackersuisoqarfiup matumani tusarniaanermi akissutit allat  
innersuussutigissavai, taakkulu kingunerisaannik Naalackersuisoqarfiup § 12-ip  
oqaasertai allanngortippai, taamaalillunilu siunnersuut ersarinnerulersinneqarluni.*

### **”§ 1**

Siunnersuutigineqarpoq suliassanut inatsisissatut siunnersuummi pineqartunut aningaasartarittassat minnerpaaffilerneqarnissaat isumaliutersuutigineqassasoq, taamaalilluni suliassat minnerusut, soorlu akiligassanngorlugit suliarineqartut maleruagassanut ilaatinneqarunnaassallutik. Akiligassanngorlugit suliarineqarsinnaasunut killiliisoqanngippat tamanna aqukkuminaallisussaavoq. Neqerooruteqartitsisarnermut nalunaarummi maanna atuuttumi § 5-imi piumasaaqatit atorneqarsinnaanissaat eqqarsaatigineqarsinnaavoq.”

*Naalackersuisoqarfiup tusarniaanermut akissuteqaat tunngavigalugu  
aalajangersagaq nutaaq (§ 8 nutaaq) siunnersuummut ilannguppaa, suleriaatsip  
allanngortinneqarnissaa matumani siunertarineqanngimmat.*

### **”§ 12**

Siunnersuummi takuneqarsinnaasutut piukkunnartussarsiuusseqqaarnissaq atunngikkaluarlugu killilimmik suliariumannittussarsiuussineq aningaasanik allanilluunniit killiliffiunngitsumik ingerlanneqarsinnaavoq. Inatsisissatut siunnersuutip ataatsimut isigalugu killilimmik suliariumannittussarsiuussinermik atuinissamut kajumissaarutitut atorneqarnissaa eqqarsaatigineqanngippat,

killissarititassanik atuutsitsilernissaq eqqarsaatigineqassasoq siunnersuutigineqarpoq. Neqerooruteqartitsisarnermut nalunaarummi maanna atuuttumi allassimavoq, entreprenurit aalajangersimasuinnaat pisariaqartinneqartunik pisinnaasaqartillugit imaluunniit suliassap sularinissaanut immikkut ilisimasassanik pisariaqartinneqartunik pigisaqartillugit killilimmik neqerooruteqartitsineq atorneqarsinnaasoq. Tamanna aningaasanut killissarititaasunut atatikkaanni, piumasagaatit atoruminarnerulissapput naammaginarnerulerlutillu. Assersuutigalugu neqerooruteqaqqusinermi neqeroorutini aningaasartassarititaasunut killigititaasoq 500.000 koruuniusinnaavoq, ajornanngippalluunniit 1.000.000 koruuniusinnaalluni, tassami killilimmik sulariumannittussarsiuussinerit amerlanertigut neqerooruteqaqqusinermi neqerooruteqarnermut naleqqiullutik pimoorussaanagerusunik neqerooruteqarnissamut tunngavissaqartarput aammalu pitsaanagerusumik unammilleqatigiiffiusarlutik.”

*Naalackersuisoqarfimmiit tusarniaanermi akissuteqaatit takkuttut allat, kiisalu Naalackersuisoqarfiup aalajangersakkamik naleqqussaareenera innersuussutigineqassapput. Naalackersuisoqarfimmiit aalajangersakkamut naleqqiullugu aningaasartassarititaasussanik aalajangersaasoqanngilaq, tamanna atuinissamut iluaqutaasussaannigmat.*

#### **Kalaallit Nunaanni Sulisitsisut peqatigiiffiat (GA):**

“§ 1, imm. 2 aamma § 6 imminnut akerleriipput. § 6-imut nassuiaatini neqeroorutit sulariumannittussarsiuussinikkut neqerooruteqarfigitinneqanngitsut, imaluunniit sinaakkutissatut isumaqatigiissutit tunngavigalugit namminerisamik inissiamik piginnittup sanasumut sianerluni neqerooruteqartitsisarnerat assersuusiorneqarput. Namminerisamik inissiamik piginnittoq inatsimmut *ilaatinneqanngilaq*, tak. § 1, imm. 2, taamaattumillu neqerooqqusisarnermut aalajangersakkanut ilaasinnaanani, tak. § 19 (maanna § 20).”

*Naalackersuisoqarfiup GA isumaqatigaa, aammalu oqaaseqatigiit “inissiamik namminerisamik pigisaqartoq inip matuanik nutaamik pisinermi akigititassamik pissarsiniarluni sanasumut sianerpat, tassanilu...” peerlugu, tassami neqerooruteqartarnermut inatsisissatut siunnersuut pisuni taamaattuni atorneqartassanngilaq.*

“Neqerooruteqarnermut inatsimmi neqerooruteqarnermut nalunaarummi pisutut AP 95-imut innersuussisoqanngilaq. GA-mit AP 95-imut innersuussisoqannginnera paasineqarpoq, kisiannili tamatumunnga atatillugu erseqqissassallugu, aalajangersakkamik Naalackersuisunut piginnaatitsissummik ilanngussisoqartariaqarmat, taamaalilluni nalunaarummik inatsisit malillugit isumaqatigiissusiortarnermi malitassanik, pisortat tapiiffigisaannik sanaartornermut atatillugu atorneqartussanik ersarissunik nassuiaasiornissaq akuerineqarsinnaalissammat. Aalajangersakkami piginnaatitsiviusumi suliassanik immikkoortunik tamarmiusunillu suliaqarnermi AP 95-ip atorneqarnissaanut maleruagassiornissaq siunertarineqartoq, kiisalu Naalackersuisut ABT-mik, Kalaallit

Nunaannut immikkut atuuttumik suliaqarnissaq siunertarigaat nassuiaatini allassimasariaqarpoq.”

*Naalackersuisoqarfiup § 7-imi imm. 4 nutaaq ilannguppaa, tassanilu allassimavoq neqerooruteqartitsineq “Kalaallit Nunaanni sanaartugassanut suliaqarfimmi suliaqarnut pilersuinernullu ataatsimut piumasagaatit” (AP) malillugit ingerlanneqassasoq.*

#### KANUKOKA:

Kapitali 4-mi neqerooruteqaqqusisarnert annerpaamik 500.000 koruuninut aningaasartalerneqarsimasut Kanukoka-p maluginiarpaa. 2.3-mulli nassuiaatini neqerooruteqaqqusinermit atatillugu neqerooruteqarnissamut killissarititaasoq 3.000.000 koruuninut allanneqarpoq. Tamanna imminermini akerleriittutut isikkoqarpoq, taamaattumillu erseqqissarneqartariaqarluni.

*Naalackersuisoqarfiup siunnersuut misissoqqillugu § 19-ip (maanna § 20) aamma nassuiaatini nalinginnaasuni imm. 2.3-p imminnut akerleriinnerat iluarsiiqqaa, taamaalillunilu neqerooruteqaqqusinermit 500.000 koruuninut annerpaaffiliinermit tunngasut ersarinnerulersillugit.*

Naalackersuisoqarfik siunnersuutip tusarniaassutigineqarneranut atatillugu tusarniaaneq pillugu allakkiorpoq, tassanilu tusarniaanermut akissuteqaatit oqaaseqarfigineqarput.

### **Inatsisissatut siunnersuummi aalajangersakkanut ataasiakkaanut nassuiaatit**

#### *Kapitali 1-imut*

*Kapitalimi inatsisip atuuffissai aalajangersarneqarput.*

#### *§ 1-imut*

Inatsit sanaartugassanik suliaqarnermut imaluunniit pilersaarusiornertalimmik suliaqarnermut atuuttuuvoq.

Suliarinneriaatsit tamarmik inatsimmut ilaatinneqarput: suliassat immikkoortiterlugit/suliassanik angisuunik suliaqarnerit, suliassanik pingaarnernik suliaqarnerit, suliassanik tamaginnik suliaqarnerit (tassanilu entreprenurimut isumaqatigiissummut pilersaarusiornissamut siunnersorneqarneq ilaavoq) aamma suleqatigiilluni suliaqarnissamut isumaqatigiissutit.

Sanatitsisut siunnersuinermuinnaq isumaqatigiissusiortarnerat aammalu siunnersuiner talimmik isumaqatigiissusiortarnerat neqerooruteqartarnermut inatsimmut ilaatinneqanngilaq.

Oqaaseq neqerooruteqartitsisarneq taamaallaat inatsisip neqeroorutitut neqerooqquneqartup kajumissaarneqarnera tunngavigalugu tiguneqartunut atuunneranik isumaqarpoq. Kajumissaarineq neqerooruteqartussanut ataasiakkaanut toqqaannartumik imaluunniit aalajangersimasuunngitsunut tusagassiuutitigut kajumissaarinerusinnaavoq, tak. § 3, imm. 1-3.

Inatsit kajumissaarinertaqanngitsumik neqeroorutitut atuutinngilaq, tassanili inatsisip suliaqartinniakkanik ilisimatereerlugit neqeroortitsineritut maleruagassat, pisortani neqeroorutitigut tigusartut taamatut kajumissaarinertaqanngitsumik neqerooruteqartoqartarnissaannut eqqarsaateqartarnissaannut apeqqutaatinneqassapput.

Neqeroorutit inatsimmi aalajangersakkat naapertorlugit pissarsiarineqartartussat tassaassapput sanaartugassanut suliaqarnissamut imaluunniit pilersaarutitalerlugu suliaqarnissamut neqeroorutit.

Imm. 2

Imm. 2 naapertorlugu inatsit taamaallaat pisortat sanaartornerannut imaluunniit pisortanit tapiiffigineqartumik sanaartornermut atuutissaaq, tassani aamma pisartut isumaqatigiissuteqarnermik tunngaveqartut pissutigalugit inatsit atorineqartassalluni. Tassani ilaattisinninneq taamaallaat pisuni aalajangersakkami imm. 3-imi ilaasuni atuuppoq.

Nr. 1

Inatsimmi Namminersornerullutik Oqartussat, ingerlatseqatigiiffiit Namminersornerullutik Oqartussat aalajangiisarnikkut sunniuteqarfigisaat aammalu kommunini oqartussaasut, kiisalu pisortanut inatsisit tunngavigalugit sullissiviit oqartussaasullu taamaattut suleqatigiiffiit aamma pisortanut inatsisit tunngavigalugit sullissiviit.

Aalajangiisarnikkut sunniuteqarsinnaaneq pisarpoq, inuk imaluunniit inatsisitigut pisinnaatitaasoq pisussaataasorlu aningaasaatit 50%-ii sinnerlugit piginnittuugaangat, imaluunniit suliffeqarfimmi taasisinnaatitaanerit 50%-ii pigineqaraangata.

Sunniuteqarnissamut periarfissaq suliffeqarfiup suliffeqarfiutai il.il. aqutugalugit toqqaannartumik piginnittuunermut tunngaveqarnerisigut apeqqutaanngilaq.

Aamma aalajangiisarnikkut sunniuteqarsinnaaneq tassaasinnaavoq, taasisinnaatitaaneq aqutugalugu annertuumik sunniuteqartarneq, imaluunniit malittarisassat isumaqatigiissulluunniit aqutugalugit

aqutsisut aningaasaqarnermut ingerlatsinermullu tunngasunik aalajangiinissaannut aqutsinissamut piginnaatinneqarneq.

Nakkutilliisarnerpiamut (aalajangiisarnikkut sunniuteqarnermut) aalajangersagaq malillugu pissutsit ingerlatseqatigiiffimmi piginneqataasunut tunngasut toqqaannartumik naliliiffigineqartarnerat apeqqutaavoq, tassungalu aktiaatillit akornanni aktiaatit siammarsimanagerat, aalajangiisarnikkullu sunniuteqartoqarsinnaanersoq ilaapput. Piginneqataassutsit, taasisinnaatitaanerit tamarmiusut 50%-ii inorlugit annertussuseqartut qanorluunniit pisoqarnerani aalajangiisarnikkut sunniuteqarsinnaanermik kinguneqartussaapput, aammalu aalajangiisarnikkut sunniisinnaanermut ammut killissarititaasumik tamanut atuuttussamik aalajangersaanissaq ajornarpoq.

Nr. 2

Nr. 2 malillugu inatsit aamma sanatitsisunut allanut kikkunnulluunniit, sanaartornermi pisortanit tapiiffigineqartunut, tapiissutit amerlassusaat apeqqutaatinnagit, neqerooruteqartitsisunut suliakkiisunulluunniit atuutissaaq. Aalajangersakkami suliaasat tapiiffigineqartut kisimik pineqarput.

Inissiaatillit nalinginnaasut nassuiaammut tassunga ilaatinneqarput, taamaattumillu maleruagassanik malinnittussaallutik.

Tassalu suliffeqarfiit namminersortut, Inatsisartut aningaasanut inatsisaat imaluunniit illoqarfimmi siunnersuisoqatigiit assigisaasaluunniit aalajangiinerisigut pisortanit tapiiffigineqartut ilaatinneqarput, tamanna imm. 3 naapertorlugu ilaatinneqartussaannngitsunut ilaasimannngippat. Tamatumani tapiissutit taamaattut taamaallaat sanaartukkamut tapiiffigineqartumut sunniuteqartussaapput, assersuutigalugu ingerlatsinermut tapiissutinut pinnatik.

Imm. 3

Piginneqatigiilluni inissiaatit, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut (tak. Nr. 1), kiisalu namminersorluni inissialiat, Inatsisartut aningaasanut inatsisaanni oqaasertaliussat naapertorlugit, soorlu 20/20/60-imut aaqquissuussineq, sanaartugassamut aningaasartuutissat tamakkiisut aningaasalersornissaannut procentinngorlugu agguassinissamik innersuussiviusoq malillugu (20%-it Naalakkersuisut taarsigassarsiaritissavai, 20%-it kommunalbestyrelsip taarsigassarsiaritissavai kiisalu 60%-it qinnuteqartup realkredittimit imaluunniit aningaaserivimmit taarsigassarsiaritissavai. Pisortat taarsigassarsititsisussat arlaat 20%-imik taarsigassarsititsisinnaasimannngippat taarsigassarsititsisussap aappaata taarsigassarsiarititassat 40%-iusut tamakkerlugit taarsigassarsiaritissinnaavai) (tak. Nr. 2) taarsigassarsinissamik neriorsuuteqarfigineqartut inatsisinut ilaatinneqannginnerat aalajangersakkami erseqqissarneqarpoq.

Inissiap atorineqalernissaa akuerineqarpat, aammalu qinnuteqartoq qularnaveeqquissuusaqarluni taarsigassarsinermi allagartamik nalunaarsorsimasumik takutitsisinnaalerpat aatsaat pisortat taarsigassarsiarititassat tunniunneqassapput. Tassalu sanaartornerup nalaani aningaasartuutissat tamaasa qinnuteqartup nammineerluni akilissavai.

Imm. 3, nr. 1-imi ilaatitsinnginnermut tunngavilersuutigineqartoq tassaavoq, piffissap sanaartorfiusup nalaani sanaartukkamut aningaasalersuinnermut, tassungalu ilanngullugu sanaartukkap ernialersorneqarneranut sanatitsisup namminersortup aningaasaateqarfiusinnaasup, ingerlatseqatigiiffiusinnaasup imaluunniit inuinnaasinnaasup nammineerluinnarluni isumaginnittussaanaera. Tassalu tassani pineqartut tassaapput sanatitsisut namminersortut, sanaartugassap aallartinnginnerani sanaartukkap piginneqatigiilluni inissiatillit peqatigiiffiannut pilersinneqarsimasumut inuinnarnulluunniit tunniussinnermi aningaasalersorneqarnissaanut qularnaveeqqusiillutik taarsigassarsinnermut allagartamik taaneqartartunik pissarsisimasut. Nunap Karsiata sanaartukkap aningaasalersorneqarneranut aningaasaliissutissai siusinnerpaamik sanaartukkap tunniunneqarnerani tunineqarneraniluunniit tunniunneqassapput.

Tamatuma saniatigut inuinnaat nammineerlutik inissialiornerat inuiaqatigiit eqqarsaatigalugit iluaqutissatut isigineqarpoq, tamannami Naalakkersuisut siuarsarusummassuk.

Imm. 4

Inatsit imaluunniit tassunga maleruagassatut taaneqartut sukumiinerusut sanaartugassap suliaqarnissatut tunniunneqarnerani tunngavigineqassasoq neqerooruteqartitsisup erseqqissumik nalunaarutigisimappagu inatsit isumaqatigiissuteqartarnernut tunngaviusunut atuutissaaq.

Neqerooruteqartitsisup inatsimmi pineqartunut imminermini ilaatinneqanngitsup inatsimmik malinninnissamut imminut pisussaatikkusussinnaanera neqerooruteqartut akornanni unammillernermut siuarsaataanissaa taamaalillunilu neqeroorutit pilerinernerusunik inerneqarsinnaanissaa tamatumani tunngavigineqarpoq. Neqerooruteqartut nammineerlutik piumasaminnik annertunerusumik annikinnerusumilluunniit aalajangiisinnaanissaanut naleqqiullugu neqerooruteqarnermut inatsimmi maleruagassanik malinnittussaasutut imminnut nittarsaassinnaasut, inatsisitigut inissisimanertik maleruagassatigut ilisimaneqartutigut aalajangersarneqarsimappat pitsaasunik neqerooruteqarnissaaq angusinnaanerussavaat.

Inatsisip neqerooruteqartumit, nammineerluni inatsimmut ilaatinneqanngitsumit akuerineqarsimasutut isigineqarsinnaaneranut tunngavigineqarnera ersarissumik nalunaarutigineqassaaq. Nalunaarut ersarissuussaaq paatsuugassaassananilu. Inatsisip oqaasertaata neqerooruteqartitsinnermi najoqqutassani tamakkiisumik ilaannaasumilluunniit issuarneqarsimanissaa naammattariaqanngilaq.

Nalunaaruteqarnermi inatsit tamakkiisumik atorneqartussaannersoq, taamatullu inatsimmi sukumiisumik taakkartorneqartut atorneqassanersut aallaavigineqassappat. Tamanna neqerooruteqartitsisup nammineerluni aalajangissavaa.

Kisiannili Neqerooruteqartitsisarnermut Maalaaruteqarfiup inatsisunik unioqutitsinerit pillugit maalaarutit suliaqarnissamut piginnaatitaanera avaqqunneqarsinnaanngilaq. Aammattaaq neqerooruteqartitsisup namminersortup neqerooruteqartarnermut inatsisip ilaanna neqerooruteqartitsinnermi atorneqartussaasoq nalunaarutigisimagaluarpaguluunniit Maalaaruteqartarfiup neqerooruteqartarnermut inatsimmi, neqerooruteqartitsinerup pineqartup nalaani atuuttuusumi aalajangersakkanik unioqutitsinerit pillugit maalaarutit suliaqarnissamut piginnaatinneqassaaq.

Imm. 5

Inatsimmi matumani maleruagassat imm. 4 naapertorlugu atorneqarpata, kapitali 7-imi maalaaruteqarnissamut maleruagassat tamatigut atorneqarsinnaassapput.

### *§ 2-mut*

Tassani ilaatigut suliassat, sanaartorfiusumi sanaartugassat aalajangersimasut naammassineqarnissaannut sulissuteqarfiussatut siunertaqarfiusut, tassalu siunnersuinerup atortussanillu pisiniarnerup akerlerisai pineqarput.

Tassani illut sanaartugassallu nutaat sananeqarnissaat, nutarterinerit, aserfallatsaaliuinerit iluarsaassinerillu nalinginnaasut pineqarput. Taakku saniatigut illunik isaterinerit, qillerinerit kiisalu illuni atortoqarfinnilu atortulersuutinik ikussuussinerit pineqarput.

Taamaalillunissaq aamma sanaartukkat, soorlu illunik sanaartukkanilluunniit sanaartornerit, nutarterinerit, isaterinerilluunniit assersuutigalugu ingerlatsinermi aserfallatsaaliuinerimullu suliassanut siunnersuisarnerimullu, kiisalu atortussanik pisiniartarnermut tunngasuinnaat eqqarsaatigalugit aallaassutaasumik tigussaasunik piujuartussanillu inerneqartarnissaat erseqqissarneqassaaq.

### *§ 3-mut*

Imm. 1

§ 3-mi neqerooruteqartitseriaatsit inatsimmi atorneqartut assigiinngitsut nassuiarneqarput.

Piomasagaatit uku tallimaasut aatsaat naammassineqarsimappata suliariumannittussarsiuussisoqassaaq:

1. Neqerooruteqartussat ataatsimit amerlanerusut neqerooruteqarnissamut kajumissaarneqarsimassapput.
2. Kajumissaarinermi piffissap aalajangersimasup iluani neqerooruteqarnissaq aallaavigineqassaaq
3. Neqerooruteqartitsinermi tunngavissat ataatsit imaluunniit minnerpaaffissanut piomasagaatit ataatsimut atuuttussat tunngavigalugit neqerooruteqartoqassaaq.
4. Neqeroorutit atuuttussaassapput, imaluunniit sanaartugassap pisussaaffiliisumik suleqatigiiffiunissaanut isumaqatigiissusiornissaq tunngavigineqassaaq.
5. Neqerooruteqarnissamut kajumissaarinermi suliariumannittussarsiuussisoqarnera nalunaarutigineqassaaq.

Imm. 1-imut nassuiaat aamma suliariumannittussarsiuussinernut, neqerooruteqartitsisup unammillernissamut tunngavissanik erseqqissunik assigiinnillu piomasagaateqarfiginngisaanut, taamaallaalli piomasagaatit minnerpaaffissaannik, tunisassiassamut kissaatigineqartumut

imaluunniit atuuffissamut piunasaqaateqarfiusumut teknikkimut tunngasunik nassuiaaffigineqarsimasinnaasunut aalajangersaaffigisaannut atuuppoq.

Aalajangersagaq siunnersuutigineqartoq tamanik suliaqarnissat inatsimmut ilaatinneqarnerinut, aammalu §14-imi “aningsaqaarnikkut iluanaarnarnerpaamik neqerooruteqarnerup” tunniussinissamut tunngavissatut nutaatut, neqerooruteqartitsisup neqerooruteqartunut pitsaassutsimik aaqqiinissamut unammillertitsinissaanut tunngavissatut siunnersuutigineqarneranut atasutut isigineqassaaq.

Imm. 1-imili aalajangersagaq aamma neqerooruteqartitsisup suleqatigeeriaatsit nutaat, soorlu “suleqateqarneq”, malillugit unammilleqatigiinnermik aaqquissuussinnaaneranik ammaassivoq. Unammilleqatigiinnerup kingorna sullissisussatut toqqarneqartoq tulleriiaarinermi siuartinneqarsinnaavoq, taamaalilluni neqerooruteqartoq toqqarneqartoq pisussaaffiliisumik suleqatigiinnissamut ilaasinaalissalluni, aammalu suliap, tunisassiamik piunaneqartumik pilersitsinissamut angusaqarfiusussap ingerlanissaata sukumiisumik piareersarneqarneranut suleqataasinnaalissalluni. Assersuutigalugu neqerooruteqartoq aallaqqaammut Suliffeqarfiup teknikkikkut aningsaqaarnikkullu pisinnaasai aammalu suliap qanoq ililluni aaqinneqarnissaanut tamatumunngalu aningsaasartuutissanut takussutissiaq tunngavigalugit toqqarneqarsinnaavoq. Sanatitsisoq qinnuteqartut tamaasa takussutissiat attuumassuteqartut pillugit isumaqatiginninniarfigereerunigit suleqatissaminik toqqaasinnaavoq.

Suleqatigiinnut neqerooruteqartitsineri “neqeroorutit” atuuttussaangortinneqanngitsunik siunnersuusiordfigineqassapput, nalinginnaasumillu aamma akinut takussutissiamik atuuttussaangortinneqanngitsunik ilaqartinneqassallutik. Aatsaat suliaannut isumaqatigiissut inaarutaasoq tamatuma kingorna sukumiinerusumik aalajangersarneqassaaq. Taamatut pisoqarsinnaanera eqqarsaatigalugu neqerooruteqartitsineri najoqqutassat taamatut pisoqassappat qanoq iliortoqarnissaanik aalajangernermik imaqqassapput, tassungalu suleqataasup pilersaarutinut najoqqutassatut suliaanik atuinissaq tassungalu akiliutissat eqqarsaatigineqarnissaat ilaapput.

Kiisalu sanatitsisup ersarissumik iliuuseqarnissaq eqqarsaatigalugu suliariumannittussarsiuussinerup pineqarnera allasagaa siunnersuutigineqarpoq.

Imm. 2

Imm. 2-mi pisortat suliariumannittussarsiuussineranni kikkunnulluunniit saaffiginnittumik neqerooruteqaqqusisoqarnissaa aalajangersarneqarpoq. Unammilleqatigiinnerup pitsaanerpaanissaa qulakkeerniarlugu kajumissarut tusagassiuutitigut allagarsiinikkut pissaaq. Allagarsiussiffigineqartussaq aviisiussanersoq nuna tamakkerlugu saqqummersartoq piunasaqaatigineqanngilaq, kisiannili saaffigisat amerlanissaat siunnerfigineqarpoq.

Tamanut ammasumik suliariumannittussarsiuussisarnerit tassaapput neqerooruteqartitsinerit, eqimattakkaanut aalajangersimannigitsunut sammitinneqartut, taamaalillunilu kikkut tamarmik (peqataanissamut piunasaqaatitut aalajangersarneqartut naammassineqarsinappata) neqerooruteqarfigninnaasaat, aammattaaq tak. § 11.

Imaluunniit allagarsiussaq tusagassiorfiit elektroniskiusut aqutigalugit pisinnaavoq, soorlu nittartakkakkut Namminersornerullutik Oqartussanit aqunneqartukkut, ugguuna: [www.udbud.gl](http://www.udbud.gl)

Imm. 3

Imm. 3-mi oqariaaseq “killilimmik suliariumannittussarsiuussisarneq” nassuiarneqarpoq. Aalajangersakkami neqerooruteqartitsineq siullermeerutaasumik neqerooruteqartitsinissamut unammillernertalimmik marlunnik immikkoortortalerneqarnissaa akuerineqarpoq. Aalajangersakkamili tamanna piumasaqaatigineqanngilaq. Aalajangersakkamili siunnersuutigineqartumi periaatsip taassuma aamma atorneqarnissaa akuerineqarpoq.

Killilimmik neqerooruteqartitsisarneq tassaavoq, suliffeqarfinnik toqqakkanik neqerooruteqarnissamut kajumissaarisarneq. Tassalu toqqarneqartut saniatigut allat neqerooruteqarsinnaanngillat, tak. §§ 11-12 nassuiaatillu taakkununga atasut.

Piukkunnartussarsiuussinertalimik piukkunnartussarsiuussinertaqanngitsumilluunniit killilimmik suliariumannittussarsiuussisoqarsinnaavoq. Piukkunnartussarsiuussilluni aallartitsisoqarpat, kikkulluunniit piukkunnartussarsiuussinermut ilaatinneqarnissaminnik qinnuteqarsinnaapput. Piukkunnartussarsiuussisoqanngippat neqerooruteqartitsisup nammineerluni suliffeqarfiit neqerooruteqarnissamik kajumissaarneqartussat toqqartussavai.

Suleqatigiinnissamut isumaqatigiissusiornissaq siullermeerutaasumik neqerooruteqartitsinertaqanngitsumik killilimmik neqerooruteqarfigitinneqartillugu, sanatitsisoq suleqatigiinni attuumassuteqartuni, suliakkiissummi unammilleqatigiittussani ilaasortanut ataasiakkaanut, imaluunniit suliffeqarfinnut ataasiakkaanut assigiinngitsunut, namminneerlutik suleqatigiinnik pilersitsisussanut saaffiginnilluni “toqqaannartumik kajumissaarisinnaavoq”. Aammattaaq § 13 nassuiaatillu tassunga atasut innersuussutigineqarput.

#### *§ 4-mut*

Piukkunnartussarsiuussineq neqerooruteqariaasiuvoq marlunnut avillugu sanaartornermi atorneqartartoq.

Killilimmik neqerooruteqartitsisarnerup immikkoortuani siullermi piukkunnartussarsiuussisoqartarpoq, tassanilu suliffeqarfiit soqutiginnittut sullissinissamut soqutiginninnertik nalunaarutigisarpaat, suliffeqarfitsik ilisaritittarpaat pissutsinullu arlalinnut uppersaasiisarlutik.

Immikkoortuani tullermi killilimmik neqerooruteqartitsinerpiaq ingerlanneqartarpoq, tassanilu suliffeqarfiit piukkunnartussarsiuussinermut peqataasut kisimik peqataanissamut periarfissaqarput. Ataatsimut isigalugu suliffeqarfiit taakku kisimik neqerooruteqarnissamut najoqqutassanik nassinneqartarput.

Piukkunnartussarsiuussineq tassaavoq, killilimmik neqerooruteqartitsinerup imaluunniit isumaqatiginninniareernerme neqerooruteqartitsinerup killiffia, tassanilu neqerooruteqartitsisup pilersuisut aalajangersimasunik amerlassuseqartut neqerooruteqartussat toqqartarpai.

Neqerooruteqartitsisarnermut Maalaaruteqartarfiup siullermeerutaasumik neqerooruteqartitsinerme siunertaasoq Dansk Transport og Logistik-ip I/S Reno Syd-imut maalaarutaanut aalajangiinnermini,

16. maj 2000-imeersumi imatut nassuiaateqarfigaa: “Piukkunnartussarsiuussinermi suliffeqarfiup naleqqunnerpaap nassaariarneqarnissaa siunertaanngilaq, akerlianilli suliffeqarfiit piumasaaqatinik, neqerooruteqarnissamat naammassineqartussanik naammassinninngitsut neqerooruteqarnissamat ilaatinneqannginnissaat, kiisalu suliffeqarfiit neqerooruteqarnissamat periarfissaqartinneqartussat amerlassutsimikkut killilersimaarneqarsinnaanissaat siunertarineqarpoq.

Piukkunnartussarsiuussineq neqerooruteqartitsisup suliffeqarfiup aningaasaqarnikkut, teknikkikkut, pitsaassutsikkut sullissinikkullu, aaqqissuussaaniikkut il.il. suliakkiissutigineqartumik naammassinninnissamat piginnaaneqarneranut uppernarsaavigineqarnissaa siunertarineqarpoq. Allatut oqaatigalugu neqerooruteqartitsisup naapertuilluartumik piginnaanilimmillu pilersuisoqarnissani qulakkiissavaa.

### § 5-imut

Aalajangersakkami sanaartugassanut piffissap taaneqartup iluani *suliarineqarsinnaasunut* isumaqatigiissutit immersugassat, assersuutigalugu pitsaassutsimut, akinut aamma amerlassutsinut/annertussutsinut tunngasunut piumasaaqatinut nassuiaateqarfusut aalajangersarneqarput.

Sinaakktissatut isumaqatigiissut tassaavoq, isumaqatigiissut suliassat illuatungiliuttumit suliarineqartussatut kissaatigineqarpata illuatungiliuttumut piumasaaqatit sukumiisumik aalajangersarneqartut tunngavigalugit suliassamik ataatsimik amerlanerusunilluunniit isumagisaqarnissamat pisussaaffiliisoq. Taamaattumik tunngaviatigut illuatungiliuttup suliassat isumaginissaat pisussaaffiginngilluinnarpai, tak. § 23.

Aalajangersagaq suliariumannittussarsiuussinermi neqerooruteqartitsinermut, taamatullu suliaqartinniakkat ilisimatereerlugit neqerooruteqartinneqarnerinut atuuppoq. Isumaqatigiissut immersugassaq imamigut isumaqatigiissutinit, inatsimmi maleruagassiuunneqartunit allanit allaanerunngilaq, tassani isumaqatigiissutit immersugassat immikkoorutaat “suliarineqarsinnaasunut”-mi ersereermat.

Isumaqatigiissut immersugassaq illuatungaannaanut artukkiisumik isumaqatigiissutaavoq, tassalu illuatungiliuttoq, sanatitsisoq, illuatungiliuttumut, entreprenurimut, piumasaaqatitut sukumiinerusumik isumaqatigiissutigineqarsimasut malillugit sullinneqarnissamik isumaqatigiissutigineqarsimasumik inniminniisinnaavoq. Entreprenurili suliaqarnissamat inatsisit tunngavigalugit piumasaaqarsinnaanngilaq, isumaqatigiissullu immersugassap naanerani sanatitsisoq sullinneqarnissamik inniminniisimangippat, tamanna tunngavigalugu entreprenuri isertitassatut annaasaminut matussutissatut taarsiiffigineqarnissamik piumasaaqarsinnaanngilaq.

Sinaakktissanut isumaqatigiissutit anguniagaqarfusussanut isumaqatigiissutinut, taamatuttaaq atuuttunut assingusuupput. Sinaakktissatut isumaqatigiissutip aamma anguniagaqarfusussanut isumaqatigiissutip assigiinngissutigaa, sinaakktissanut isumaqatigiissut kisimiittarmat, kiisalu anguniagaqarfusussanut isumaqatigiissut isumaqatigiissummut allamat atasuusarmat, taamaalillunilu aallaqqaammut isumaqatigiissutaasut annertussutsimikkut annertuseqqinneqarnissanut pisinnaatitaaffiliisarluni.

Isumaqatigiissummi immersugassami sanatitsisoq sullinneqarnissamik inniminniinissamut pisussaaffilerneqanngilaq. Tamanna pissutigalugu pisortani neqerooruteqartitsisoq suliassamut suliariumannittussarsiuussinermik aallartitsinissamut akornusersimaneqanngilaq, naak suliassaq isumaqatigiissut immersugassaq tunngavigalugu inniminnerneqarsinnaagaluartoq, tamatumani isumaqatigiissut immersugaq erseqqilluinnartumik tamatumunnga piumasaaqatitaqarsimangippat.

Isumaqatigiissummut immersugassamut neqerooruteqartitsineq neqerooruteqarnermut inatsimmi maleruagassat malillugit pisartussaavoq, taamaattumillu isumaqatigiissut immersugassaq suliariumannittussarsiuussereernerup kingorna isumaqatigiissutigineqartussaavoq, tamatumani inatsimmi kapitali 4 naapertorlugu suliaqartinniakkat ilisimatereerlugit neqerooruteqartitsinissamut piumasaaqatit naammassineqarsimangippata.

### *§ 6-imut*

Aalajangersakkami suliaqartinniakkat ilisimatereerlugit neqerooruteqartitsisarneq suliariumannittussarsiuussinermik allaanerusumik neqerooruteqartitsiviusartutut nassuiarneqarpoq. Tassalu suliaqartinniakkat ilisimatereerlugit neqerooruteqartitsisarnermi neqeroorutitut, suliariumannittussarsiuussisarnermi neqeroorutaanngitsunut killilerneqarput, tak. § 3. Erseqqissumillu saqqummiussinissaq eqqarsaatigalugu aamma isumaqatigiissutinik immersugassanik atuinermi, tassungalu ilanngullugu neqeroorutit ilassuserneqarnissaannut qinnuteqarnermi suliaqartinniakkat ilisimatereerlugit neqerooruteqartitsisarnermut maleruagassat malinneqartannginnerat ilanngunneqarpoq.

Suliaqartinniakkat ilisimatereerlugit neqerooruteqartitsisarnermut assersuutitut taaneqarsinnaavoq, aamma sanatitsisoq neqerooruteqartinniakkanut arlalinnut suliassamut nassuiaatit tunngavigalugit sanaartugassamut neqerooruteqartitsisoq, piffissamili aalajangersimasumi neqerooruteqarnissamut kajumissaarinngitsoq, aammalu suliariumannittussarsiuussinerup pineqarneranik nalunaarutiginninngitsoq taamaappoq.

### *Kapitali 2-mut*

Kapitali 2-mi neqerooruteqartitsisumut unammilleqatigiinnerup naammattup pilersinneqarnissaanut aamma neqerooruteqartut qinnuteqaateqartullu assigiimmik atugaqarnissaannut periarfissanik atuinissaanut piumasaaqatitut aalajangersakkat katersorneqarput.

### *§ 7-imut*

Imm. 1

Pisortat imaluunniit pisortanit tapiiffigineqartumik sanaartornermut neqerooruteqartitsinerit tamanut ammasumik imaluunniit killilimmik suliariumannittussarsiuussinermut, suliaqartinniakkalluunniit ilisimatereerlugit neqerooruteqartitsinermut suleriaasissatut inatsimmi aalajangersakkat naapertorlugit ingerlanneqartarnissaat aalajangersakkami imm. 1-imi pingaarnertut aalajangersarneqarpoq.

Aamma isumaqatigiissutit immersugassat suliariumannittussarsiuussinnermut ilaatinneqassapput. §§ 19-22-mi piumasaqaatit naammassineqarsimappata, taamatutaaq isumaqatigiissutit immersugassat § 6 naapertorlugu suliaqartinniakkat ilisimatereerlugit neqerooruteqartitsinertut isumaqatigiissutigineqarsinnaapput.

Imm. 2

Imm. 2 malillugu neqerooruteqartitsisup unammilleqatigiinnermik naammattumik pilersitsiniarluni periarfissat atortussaavai. Aalajangersagaq neqerooruteqartitseriaatsinik toqqaanissamut aamma neqerooruteqartitsinissap piareersarneqarnissaanut ingerlanneqarnissaanullu atuutissaaq.

Pisuni ataasiakkaani suliaqartinniakkat ilisimatereerlugit neqerooruteqartitsineq imaluunniit suliariumannittussarsiuussineq atorneqarnerseq apeqqutaatinnagu taanna atuutissaaq.

Unammilleqatigiinnerup annertusarneqarnissaanut piumasaqaat § 7, imm. 3-mi assigiimmik pineqarnissamut tunngavissamut atuunneratigut, neqerooruteqartut imminnut atanerisigut unammilleqatigiinneq atorunnaarsinneqassanersoq neqerooruteqartitsisup misissortussaavaa.

Neqerooruteqartitsisut ataasiakkaat inatsimmi maleruagassanik malinniinnartussaannngillat, aammali neqerooruteqartitsineq unammilleqatigiinnermik annertusaaffiusumik ingerlattussaavaat, tassalu amerlanerusut peqataatinneqarsinnaanissaat anguniartussaallugu. Amerlanerusut peqataatinneqarpata, neqerooruteqartut ataasiakkaat pitsaanerpaanik takutitsinissamut tatineqartussaapput, aammalu unammilleqatigiinneq annertunerulertussaalluni.

Tassanili Kalaallit Nunaanni pissutsit immikkut ittuunerat isiginiarneqassaaq, tassunga nunami sumiiffiit unammillernissamullu niuernikkut tunngavissat ilaallutik. Innuttaasut siammasinnerujussuat, kiisalu illoqarfiit nunaqarfiillu akunnerminni isorartunerujussuat suliffeqarfiit sumiiffimmi pineqartumi niuernermik pilersitsisinnaasut amerlassutsimikkut killilersorneqarnerannik pilersitsiviusimavoq. Kiisalu suliffeqarfiit najukkamik avataanni sanaartornernut neqerooruteqarnissaat akitsorsaataasarpog, neqerooruteqarnermi assartuinernut aammalu ineqartitaagallarnermut aningaasartuutit ilaatinneqartarmata. Taakku najukkani entreprenurit eqqarsaatigisariaqanngilaat. Taamaattumik sanaartornermi kissaatiginarsinnaasumik unammilleqatigiissitsinissaaq neqeroortitsisut tamatigut angusinnaasannngilaat.

Amerlasuut suliassamut neqerooruteqarnissamut (sulariumannittussarsiuussinnermut) neqerooruteqarnissaannik kajumissaarineq tunngaviatigut unammilleqatigiinnissamik pitsaanerpaamik pilersitsiviusarpoq. Kisiannili suliaqartinniakkat ilisimatereerlugit neqerooruteqartitsisarnissap periarfissaqartinneqarnissaa aamma pisariaqarpoq, suliassanik arlalinnik taamatut ilusilinnik imaluunniit killeqangaatsiartunik annertussuseqartunik, allaat neqerooruteqartitsinermi tunngavissanik suliaqarnermut aningaasartuutit suliassallu suliariumannittussarsiuussinnermi "pissarsiassanit" amerlanerusunik atuiiffusariaqartunik peqartarmat. Neqerooruteqartitsisup nalinginnaasumik neqerooruteqartitseriaatsimik naleqqunnerpaamik toqqaasarnissaa naatsorsuutigineqartariaqarpoq.

Pisuni ataasiakkaani qanoq iliorluni unammillernermik pitsaanerpaamik pilersitsisoqarsinnaanersoq neqerooruteqartitsisup nammineerluni nalilissavaa. Kisiannili neqerooruteqartitseriaatsinik annerpaamik unammillerfusinnaasunik atuisarneq siuarsarniarlugu, aammalu pisortat

isumaqatigiissutaat annerit paasiuminarnerulersinniarlugit, sanatitsisut pisortat imaluunniit pisortanit tapiiffigineqartut suliaqartinniakkat ilisimatereerlugit neqerooruteqartitsinermik atuisinnaanerisa tunngavissanut sukumiisumik nassuiarneqartunut, suliaqartinniakkat ilisimatereerlugit neqerooruteqartinniakkanik toqqaanissamut immikkut ittumik tunngavilersuiffiusinnaasunut killilerneqarnissaat naleqqunnerpaatut isigineqarpoq.

Suliffeqarfiit uppersaanissamut naammaginangitsunik piffissalernerneqartarnissaannut illersorneqarnissaasa pisariaqarsinnaanera eqqarsaatigineqartariaqarpoq, tassami assersuutigalugu suliaqartinniakkat ilisimatereerlugit neqerooruteqartitsinermi neqerooruteqarnissamut piffissaliussat allanut assingusuunngitsut sivisoorsuunngortinneqarsinnaapput.

Unammilleqatigiinnissamut piumasaqaammi piffissap isumaqatigiissuteqarfiusup neqerooruteqartitsisup niuernermit tunngatillugu tunngavilersuutigisinnaasaanit sivisunerussanngilaq, tassami assersuutigalugu pilersuisup nalikilliliinissamut pisariaqartitai aammalu pisinnaasanut suliassamik neqerooruteqartitsinermi suliassanik piareersaanissamut pilersaarusiornissamullu periarfissai eqqarsaatigineqassallutik.

Pisinnaasanut suliassamik neqerooruteqartitsineq tassaavoq neqerooruteqartitsineq, neqerooruteqartitsisup pilersuinerup naammassinerani pisinnaasatigut piumasaqaatinik sukumiisunik aalajangersaaffigisaa. Tamatuma kingorna pisinnaasat taakku anguneqarnissaasa qulakkeernissaannut suleriaatsinik atortunillu toqqaanissaq entreprenurip akisussaaffigilissavaa.

Imm. 3

Imm. 3 malillugu neqerooruteqartitsisup neqerooruteqartitsinissamik piareersarnermini ingerlatsinerminilu, aammalu neqerooruteqartitsinermi neqerooruteqartut akornanni aamma assigiinngitsumik pinnittoqannginnissaa isumagisussaavaa.

### *Neqerooruteqartitsisarnermi najoqqutassat ilusissaat*

Aalajangersakkap atuutilerneratigut *tunngavissaqanngitsumik* assigiinngisitsinissaq inerteqqutaavoq, tamatumanili inatsisit eqqarsaatigisassallu tunngavissallit, soorlu neqerooruteqartut teknikkikkut pisinnaasaasa attuumassutillit assigiinngissutaat tunngavigalugit neqerooruteqartut assigiinngitsunik pineqarnissaat akornusersimaneqanngilaq.

Neqerooruteqartitsinermi najoqqutassat imaanut ilusissaannulluunniit piumasaqaatinik immikkut ittunik atuutsitsisoqanngilaq, kisiannili neqerooruteqartut akornanni assigiinngitsumik pinnittoqartussaannginna imm. 3-mi aalajangersarneqarpoq. Taassuma atuunneratigut neqerooruteqartunut assigiinngitsunut paasissutissanik assigiinngitsunik nassiussinissaq inerteqqutaavoq. Assigiimmik pinninnissamik tunngavissap atuunneratigut neqerooruteqartut tamarmik najoqqutassanik assigiilluinnartunik aammalu ataatsikkut nassinneqarnissaat pisariaqarpoq. Tamatuma oqaasiinnaat atorlugit neqerooruteqarnissamut najoqqutassanik eqqarsartoqarsinnaajunnaarsippaa, tassami aatsaat allakkatigut imaluunniit atortut elektroniskiusut atorlugit neqeroortitsinermi neqerooruteqarnissamut najoqqutassat assigiimmik iluseqartinneqarlutik neqerooruteqartussanut tamanut saqqummiunneqarnissaat qulakkeerneqartussaammat.

Taamatutaaq neqerooruteqartitsinerup ingerlasup nalaani neqerooruteqartut apeqquteqaatigisaannut akissutit piffissami tassani, akissuteqaatinik ilisimasaqarneq neqerooruteqartut ataasiakkaat unammillersinnaanerannut iluaqusiisinnaassanngitsut qulakkeerneqarsimanngippat neqerooruteqartunut tamanut takuneqarsinnaasunngortinneqassapput. Pisariaqartitsineq tamanna akissuteqaatit allakkatigut aammalu soorlu internettikkut nittartakkakkut, neqerooruteqartitsinermi allagarsiussami imaluunniit neqerooruteqarnissamut najoqqutassani innersuunneqartukku saqqummiunneqarnerisigut, imaluunniit nutaarsiassanut mailit, neqerooruteqartitsinermut soqutiginnittut tamarmik piniarsinnaasaat aqcutigalugit saqqummiunnerisigut naammassineqarsinnaavoq.

### *Nutaarsiassatut allakkat*

Tiguisussanut assigiinngitsunut allakkanik agguaassisarneq assigiinngissuteqartutut ilimagineqarpat, nutaarsiassatut allakkiat/akissuteqaatit allakkerisarfikku nassiunneqartut tunngavissaqanngitsumik immikkoortitsiviusinnaapput. Faxikkut nassiussisarnerit ataatsikkut nassiussisarnertut isigineqarsinnaavoq, kisiannili faxit atornerarnerisa annikilliartornera pissutigalugu akissuteqaatinik nassiussisarnermut atuisinnaaneq annaaneqariartuaartussaavoq.

### *Assigiinngisitsinissamik inerteqquteqarneq*

Tunngavissaqanngitsumik immikkoortitsisarnermik inerteqquteqarneq neqerooruteqartitsisarnermi tamani atuuttussaavoq, ilanngullugit piukkunnartussarsiuussinerni, isumaqatiginninniarfissanik toqqartuinnermi neqeroorutillu tunniunneqartut inaarutaasumik nalilersorneqarneranni. Suliakkerneqarsinnaasut ikiliartortinneqarnerat aamma, soorlu akinut, pitsaassusissamut, tunniussinissamut piffissaliussamut allatulluunniit attuumassutilimmik takutitsinnaanermut tunngatillugu, kiisalu toqqartuinnermut tunngavissat kinaassusersiorfiunngitsut siumoortumik aalajangersarneqarsimasut tunngavigalugit tunngavissalimmik toqqartuinnermut pisassapput.

Assigiimmik pinninnissamut tunngavissat atuunneranni:

1. Neqerooruteqartitsinermut najoqqutassat neqerooruteqartitsinernullu piumasaqaatit neqerooruteqartut akornanni immikkoortitsiviusanngillat.
2. Suliffeqarfik unammisitsinermut peqataanissamut unammilleqatigiinnermi naligiimmik atugaqartitsinissamut akerliusumik sunniuteqarsinnaasumik neqerooruteqartitsisumut attaveqarpat, soorlu neqerooruteqartitsisup siunnersortitut aalajangersimasutut atorpagu, imaluunniit neqerooruteqartitsinissap piareersarnerani siunnersortitut atorsimappagu, suliffeqarfik neqerooruteqartitsinermut ilaatinneqassanngilaq.
3. Neqeroorutit neqerooruteqartitsinermi piumasaqaatini tunngaviusunut tunuarsimaarnertallit, imaluunniit arlaatigut neqerooruteqartitsinermi piumasaqaatinik uniuiffiusut tunuartinneqassapput, taamatullu uniuinerit pingaarutillit annikitsut akii aalajangersarneqassallutik.

Oqaatsit “kinaassusersiunngitsumik, piviusorsioortumik immikkoortitsiviuunngitsumillu tunngaveqarnissaq” tassaapput tunngavissat, neqerooruteqartitsisup piumasaqaatinik, neqerooruteqartup neqeroorummi nalilersuinnermi ilaatinneqarnissaanut naammassisassanik

suliaqarnermini malitassai. Piumasaqaatit taakku toqqaanissamut tunngavissatut taaneqarput. Taanna neqerooruteqartitseriaatsinut qanorluunniit ittunut atuuppoq.

Kinaassusersiunngitsumik, piviusorsiortumik immikkoortitsiviunngitsumillu tunngaveqarluni toqqaanermi neqerooruteqarsinnaasut piviusorsiunngitsunik tunngaveqarluni, tassalu aningaasaqarnikkut teknikkikkullu piginnaasanit allaanerusut eqqarsaatigalugit tunuartinneqartarnissaasa pinngitsoorneqarnissaa qulakkeerneqassaaq.

Neqerooruteqartunik toqqaanermi assigiimmik pinninnissamut piumasaqaat neqerooruteqartitseriaatsinut qanorluunniit ittunut atuuppoq.

Inatsisissatut siunnersuut neqeroorutinut, neqerooruteqartitsinermit piumasaqaatinik uniuiffiusunut maleruagassanik immikkut ittunik imaqaanngilaq. Apeqqut ilaatigut § 7, imm. 3-mi assigiimmik pinninnissamut tunngavissat, ilaatigullu § 16-imi neqeroorutinut allanik qinigassartalinnut maleruagassat aqutigalugit maleruagassiuunneqarpoq.

Assigiimmik pineqarnissamut tunngavissap atuunneratigut neqerooruteqartitsisoq neqeroorutinik, neqerooruteqartitsinermit piumasaqaatini immikkoortunik tunngaviusunik uniuiffiusunik tigusinissamut pisinnaatitaanngilaq, tassungalu neqerooruteqartitsinermit piumasaqaatini piumasaqaatit minnerpaaffissaat, allanik qinigassartalinnik neqerooruteqarnermit naammassineqartussat ilaapput.

Suliali ingerlanneqarnerini uniuineq ima annertutiginersoq, allaat neqeroorut naleqqutinngitsutut tunuartinneqarsinnaalluni nalorninarqartinneqarsinnaavoq. Uniuineq annertunngippat neqerooruteqartup neqeroorut ilaatissallugu pisinnaatitaavoq, neqerooruteqartitsisoq neqerooruteqartitsinermit najoqqutassat malillugit neqeroorutit nalornissuteqarfiusut tamaasa tunuartinnaannut pisussaatinneqanngippat. Taannali taamaallat uniuineq neqeroorutit naapertuuttumik piviusorsiortumillu imminnut assersuunnissaanut akornutaanngippat atuutissaaq. Tunuarsimaarfiusut inatsisinut naapertuuttut, tassalu neqerooruteqartup neqeroorutit atuutiinnarnissaanut uppersaanissamut piumasaqaatigisai inatsisinut naapertuuttut matumani pineqarpata, neqeroorutinut allanut assersuussisoqannginnerani tunuarsimaarfiusut akii neqeroortitsisumit kinaassusersiunngitsumik immikkoortitsinertaqaanngitsumillu aalajangersarneqarsinnaassapput.

Neqerooruteqarnermit tunuarsimaarfiusut neqerooruteqartitsinermit tunngavissanik annikitsumik uniuiffiusimagaluarpataluunniit, neqerooruteqartitsisoq pissutsit naapertorlugit tamanna tunngavigalugu neqeroorummik atuiumanginnissaminik pisinnaatitaasinnaavoq.

Neqerooruteqartitsinermit tunngavissanik uniuinerit annikkaluarpataluunniit, neqerooruteqartitsisup neqeroorummik atortussaajunnaarsitsisinnaanera neqerooruteqartup misigisinnaavaa. Tunuarsimaarnerup annertussusia aningaasaqarnikkut isumaa eqqortumik nalilissallugu neqerooruteqartitsisup ajornakusoortissinnaavaa, aammalu neqerooruteqartup toqqaannartumik attaveqarfigneqarnerani isumaqatiginninniartarnermut suliariumannittussarsiuussinerullu nalaani tulleriiaarisarnermut maleruagassat pequtaallutik amerlanertigut apeqqut paasisaqarfigneqarsinnaasannngilaq. Taamatut nalornissuteqarnerup kingunerisaanik neqerooruteqartitsisup neqeroorut aningaasaqarnikkut kingunerisassat eqqortut ilisimanagit tigoratarsinnaavaa. Tamatuma saniatigut tunuarsimaarfiusut uniuinertallit ima annikitsuaasinnaapput aningaasaqarnikkullu naleqaanngissinnaallutik, imaluunniit

aningaasalersorneqarsinnaasarput, kisiannili imamikkut neqerooruteqartitsisup ugartugaanit allaanerusinnaallutik.

### *Tunuarsimaarfiusut*

Tunuarsimaarfiusorli ima annikitsigisinnaasarpoq, allaat neqerooruteqartitsisup ilaatissallugu pisussaaffigisariaqartarlugu. Neqerooruteqartitsisoq annertussutsimut pissusiviusunullu tunngavissanut nalinginnaasunut uniuuttumik naliliisinnaangilaq, tamatumanili suliame oqimaatigiissitsisoqartariaqarpoq, tamannalu ersarissumik maleruagassiornissamut tunngavigineqarsinnaangilaq.

Taakku tunngavigalugit tunuarsimaarfeqarnerup saneqqutsinerulluunniit ilussaa pingaaruteqassualu pissutigalugit, neqerooruteqartitsisup neqeroorummi akinik aalajangersaanissaq neqeroorutillu ilaatinneqarnissaa pisinnaatitaaffigissaneraa pisussaaffigissaneraaluunniit Neqerooruteqartitsisarneq pillugu Maalaaruteqartarfiup eqqartuussiviillu naliliisinnaatitaassapput.

Nalornissuteqarneq neqerooruteqartitsinermi najoqqutassat ersarlunnerannik pissuteqarsimappat, tamanna neqerooruteqartitsisup neqeroorutitik tunuarsiimaartoqarnera pissutigalugu tunuartitsinissamik pisinnaatitaaffeqarunnaarneranik nassataqarsinnaavoq.

Taakku saniatigut § 18, imm. 3 nassuiaatillu tassunga atasut innersuussutigineqarput.

Imm. 4

Isumaqatigiissusiorsinnaanermi periaatsit suut pisortat sanaatugassaataasa akuerineqarneranut atatillugu atorneqassanersut ersarissumik allassimassasut imm. 4-mut tunngavigineqarpoq. Taamaakkaluartorli oqaatigineqassaaq, “Kalaallit Nunaanni sanaartornermi suliassanut pilersuinernullu piumasaqaatit ataatsimoortut” (AP) suliassanik tamanik suliaqarnissamut atorneqarsinnaangimmata.

Imm. 4 aamma allagartanut allanut neqeroortitsinermi malinneqartussanut pisortatigoortumik akuerisanut tunngavoq. Tassani ilaatigut eqqarsaatigineqarput suliassanik tamanik sularinnittarneq pillugu isumaqatigiissutinut inatsisit malillugit ileqqussat.

### *§ 8-mut*

Imm. 1

Akilgassanngorlugit suliassat annerpaaffiligaanngitsut sularineqarnerinut neqerooruteqartarnermut inatsit tunngavigineqartussaangitsoq aalajangersakkami aalajangersarneqarpoq. Tassalu suliassat taamaattut tunngaviatigut inatsimmut ilaatinneqanngillat.

Neqerooruteqartitsinermut najoqqutassani piareersaasoqarsimappat suliassanut akiligassanngortitassanut nalunaaquttap akunneranut akit unammillissutigineqarsinnaanerat

eqqumaffigeqquneqarpoq. Neqeroorutini nalunaaquttap akunneri atorneqartussatut missiliorneqartut, nalunaaquttap akunneranut akigititassatut neqeroorutigineqartut tunngavigalugit naatsorsorneqartut allanneqassapput. Taamatut neqerooruteqartitsisarnerup ingerlanneqarnissaa inatsimmut ilaatinneqarpoq.

300.000 koruunit killissatut nalinginnaasutut ilanngunneqarput, killiliisoqanngippat suliassat akiligassiissutaasussat suliarineqarsinnaanerap pisariusorujussuannortussaammat.

Sanaartugassat 300.000 koruunit sinnerlugit naleqartut akiligassanngorlugit suliarineqarnissaat, taamaallaat "pissutsit immikkut ittut" tunngavigalugit isumaqatigiissutigineqarsinnaapput, tak. imm. 2.

Imm. 2

"Pissutsit immikkut ittut"-nik oqarnermi assersuutigalugu nutarterinerit, iluarsaassinerit allanngortiterinerillu, annertussutsimikkut, pitsaassutsimikkut piffissamillu atuiffigineqarnissamikkut siumoortumik aalajangeruminatorsorujussuit eqqarsaatigineqarput.

Nutarterinerni, iluarsaassinerni allanngortiterinernilu akiligassiisarnermut aqqissuussineq ilaanneeriarluni orniginarnerusarpoq, suliassat annertussusissaat amerlanertigut nalorninartarmata. Tamatuma kingunerisaanik suliassanut taamaattunut neqerooruteqartitsinermi neqerooruteqartut aningaasanik annaasaqarnissartik pakkersimaarniarlugu neqeroorumminni annaasassanut annertuallaamik tapiliussisarnissaat ilimagineqartariaqarpoq.

Paarlattuanik imm. 2-mi aalajangersakkap atuutilerneratigut nutartigassat, iluarsagassat allanngortitigassallu, imaluunniit suliassat taamaattut ilaat annertussutsimikkut, pitsaassutsimikkut piffissamillu atuiffigineqarnissamikkut siumoortumik aalajangeruminatorsorujussuit inatsimmi aalajangersakkanut ilaatinneqassapput.

#### *§ 9-mut*

Imm. 1

Imm. 1 malillugu sanatitsisup neqerooruteqarnissamut kajumissaarinermini neqeroorummik tigusinissamut piffissaliussaq nalunaarutigissavaa. Suliassatut naatsorsuutigineqartup annertussusia apeqqutaalluni piffissaliussaq taanna allanngorarsinnaavoq. Siullermik neqerooruteqartitsisup kinaassusersiunngitsumik naliliinera piffissaliussamut apeqqutaassaaq. Neqerooruteqartitsisup nammineerluni neqeroorutip suliarilluagaanissaa soqutigissagaa naatsorsuutigineqartariaqarpoq.

Suliariumannittussarsiuussinermi piffissaliussaq ataaseq neqerooruteqartunut tamanut atuutissaaq, tak. § 7, imm. 2 aamma 3. Suliaqartinniakkat ilisimatereerlugit neqerooruteqartinneqartarnerisa allaanerunera pissutaalluni, neqeroorutitik tunniussinissamut piffissaliussaq ataasiinnaasariaqanngilaq. Tassani imaassinnaavoq neqeroorutip ataatsip amerlanerusulluunniit tiguneqarnerini aatsaat unammillernerup annertunerusariaqarnera ersertoq.

Aammattaaq § 12-imi maleruagassat innersuussutigineqarput.

Imm. 2

Neqerooruteqartitsinermi najoqqutassani allanik allassimasoqanngippat, uppenarsaanissamut piffissarititaasoq ullunut 20-nut aalajangersakkami aalajangersarneqarpoq. Uppenarsaanissamut piffissarititaasoq Kalaallit Nunaanni sanaartornermi suliassanut pilersuinernullu ataatsimut piumasaaqatini (AP95) § 3, imm. 5-imut naapertuuppoq.

Ullut suliffiusussat paasineqassaaq tassaasut ataasinngornermiit tallimanngornermut, ullut nalliuttut ilaatinneqaratik.

Neqerooruteqartoq, ulloq suliariumannittussarsiuussiviussa qallertinnagu neqeroorumminut qilersorsimanngitsoq, isumaqatiginninniarsinnaanermut inatsimmi maleruagassat naapertorlugit nammineerluni neqeroorumminik utertitsisinnaavoq.

Imm. 3

Neqerooruteqartut, isumaqatiginninniarnissamut qaaqquneqanngitsut imaluunniit § 18 naapertorlugu isumaqatiginninniarnit ingerlanerini tunuartinneqartut ingerlaannartumik neqeroorumminut qilersorsimajunnaarsinneqartarnissaat aalajangersakkami aalajangersarneqarpoq. Aalajangersagaq neqerooruteqartunut, neqerooruteqartitsisup isumaqatiginninniarnissamut piareersimatitaannut, kisiannili isumaqatiginninniarnernut suli ilaatinneqanngitsunut atuutinngilaq, tak. § 18, imm. 2-mut oqaaseqaatit. Aalajangererup neqerooruteqartunut nalunaarutigineqarnerani erngerluni nalunaarutigineqassaaq, tak. § 25, imm. 2.

### *Kapitali 3-mut*

Kapitali 3-mi neqerooruteqartitsisarnermut aamma suliariumannittussarsiuussinermi suliassanik tunniussisarnermut aalajangersakkat ataatsimoortinneqarput.

### *§ 10-mut*

§ 10-mi suliariumannittussarsiuussinermi neqeroorutit allaganngorlugit tunniunneqartarnissaat aalajangersarneqarpoq. Taamaattorli atortut elektroniskiusut atorlugit tunniunneqarsinnaapput, neqerooruteqartitsisup siumoortumik tamatuma pinnginnissaa aalajangersimanngippagu.

Atortut elektroniskiusut atorlugit attaveqaaqatigiinnermut atortut qanoq ittuunissaannut piumasaaqatini immikkut ittunik inatsit imaqqanngilaq. Tassani pineqartut tassaapput e-mail-ikkut neqerooruteqartarnerit, taamatullu diskette-nik imaluunniit cd-rom-inik nassiussilluni (immaqa pappiaqqanik naqitanik ilallugu) neqerooruteqartarnerit.

Neqerooruteqartitsisup qarasaasianik pisariaqartunik peqarnissaa, imaluunniit suliariumannittussarsiuussiviusumi, tak. § 14, atortunik taamaattunik peqarnissaa piumasaaqatigineqanngilaq, neqerooruteqartitsisup atortut elektroniskiusut atorlugit neqeroorutini tunniussinissaa pinnginnissaa piumasaaqatigisinnaammagu.

Suliariumannittussarsiuussinerni atortut elektroniskiusut atorlugit neqeroorutit aamma § 14 naapertorlugu neqeroorutinik ammaanissamut piffissaliussap nalliunnissaata tungaanut “matoqqatinneqartarnissaat” piumasarineqarpoq.

Tassalu atortut elektroniskiusut atorlugit neqeroorutit piffissaq suliariumannittussarsiuussiffissaq sioqqullugu neqerooruteqartitsisumit ilisimaneqalertussaangillat. Diskette-mik assigisaanilluunniit atuisoqarsimappat, taassuma allat puuannut matoqqasumut ikillugu nassiunneqarnissaanut piumasaqaat naammassineqarsinnaavoq, kisiannili neqeroorut e-mail-ikkut nassiunneqarsimappat, tamanna piffissap suliariumannittussarsiuussiffiusup tungaanut atuuttussamik paasiuminaallisaanikkut allatulluunniit isissutissamik atugassiinikkut pisinnaavoq.

### *§ 11-mut*

Allagarsiussami qanoq allassimasoqassanersoq inatsimmi taaneqanngilaq, kisiannili allagarsiussami pingaartumik suliassap suussusissaa angissusissaalu nassuiarneqartassasoq, kiisalu neqerooruteqarnissamut najoqqutassat pillugit saaffiginniffissaq nalunaarutigineqartassasoq naatsorsuutigineqartariaqarpoq.

Inatsimmi § 9, imm. 1-imi aamma § 14-imi allassimavoq, neqerooruteqarnissamut piumasaqaatini neqeroorutip tiguneqarsimanissaanut killissarititaq, aammalu neqeroorutip saqqummiunneqarfissaa (ammarneqarfissaa) allassimassasoq. Tamanut ammasumik suliariumannittussarsiuussinerni nalinginnaasumik piffissaliussaq sumiiffillu suliariumannittussarsiuussiffiususaaq nalunaarutigineqassaaq, imaluunniit minnerpaamik neqerooruteqarnissamut najoqqutassat piniarnissaannut piffissaq kingulleq allassimassalluni.

Kiisalu § 11, imm. 1-imi pinngitsoorani piumasaqaatigineqartussat allassimavoq, neqerooruteqartitsinermut allagarsiussami suliassat neqeroorut akikinnerpaaq imaluunniit aningaasaqarnikkut iluanaarnarnerpaamik neqerooruteqarneq tunngavigalugit tunniunneqarnissaat ilisimatitsissutigineqassasoq.

Tunngavissat immikkoortui inatsimmi § 15, imm. 1 naapertorlugu aalajangersarneqarsimasut, aningaasaqarnikkut iluanaarnarnerpaamik neqerooruteqarnermi tunniussinissamut tunngavissat atorneqartussat neqerooruteqartitsinermi allagarsiussakkut ilisimatitsissutigineqassanngillat. Tassani tunngavissat immikkoortui neqerooruteqartitsinermi najoqqutassani allassimanerat ilisimatitsissutigissallugu naammappoq.

Tunngaviusumik kikkulluunniit tamanut ammasumik suliariumannittussarsiuussinerni neqerooruteqarsinnaagaluartut, § 11, imm. 1-imi aalajangersagaq naapertorlugu neqerooruteqartitsisoq peqataasussanut piumasaqaatinik aalajangersaasinnaavoq, tamannali pissappat taakku neqerooruteqartitsinermut allagarsiussami allassimassapput.

Tassalu neqerooruteqartitsisoq neqerooruteqartup teknikkikkut aningaasaqarnikkullu pisinnaasaanik immikkut ittunik paasissutissinneqarnissaminik piumasaqarsinnaavoq, neqerooruteqartitsisullu piumasaqaatit aamma neqerooruteqartup pilersuisua ilanngullugu annertusiniarlugit aalajangersinnaavaa. Taamaalilluni neqerooruteqartup neqeroorunni tamakkiisumik ilaannaasumilluunniit pilersuisunik tunngaveqartissappagu, aamma pilersuisuusut teknikkikkut aningaasaqarnikkullu pisinnaasaminnik paasissutissiisusaapput.

Teknikkikkut aningaasaqarnikkullu pisinnaasanut uppersaatissat suut neqeroorummut ilanngunneqassanersut, neqerooruteqartitsinermit allagarsiussami allassimassapput.

Aningaasaqarnikkut pisinnaasat assersuutigalugu uppersaatissat uku atorlugit uppersarneqarsinnaapput:

- a) inuussutissarsiormi akisussaannermit attuumassutilimmik sillimasiisimaneq pillugu aningaaserivimmiit nalunaarut aamma/imaluunniit uppersaat,
- b) ukiumoortumik nalunaarut imaluunniit oqimaaqatigiissitsinermit naatsorsuutit,
- c) kaaviiartitanut tamarmiusunut, imaluunniit suliassaqaqfinni attuumassutilinni ukiut tikillugit, suliffeqarfilluunniit nutaamik pilersinneqarsimappat sivikinnerusumi kaaviiartitat pillugit nalunaarut.

Teknikkikkut pisinnaasat assersuutigalugu uppersaatissat uku atorlugit uppersarneqarsinnaapput:

- a) siornatigut suliarisimasanit innersuussutit,
- b) teknikkimut siunnersortit pillugit paasissutissat,
- c) pitsaassutisimik aqutsissutit atorineqartut pillugit paasissutissat,
- d) misissuisarnermi aaqquissuussinerit atorineqartut pillugit paasissutissaasinnaasut,
- e) suleqatit pingarnerit suliatigut pisinnaasaat pillugit paasissutissat,
- f) avatangiisinut suliassanut aqutsissutit atorineqartut pillugit paasissutissat,
- g) sulisut isumalluutigineqartut pillugit paasissutissat,
- h) atortut teknikkimullu atortut pillugit paasissutissat,
- i) Pilersuisunik toqqartuinermit siunertat pillugit paasissutissat.

Malugalugu piumasaqaatinik, assigiimmik pineqarnissamut tunngavissanik annikillisisinnaasunik ilanngussisoqaqqusaanngimmat, soorlu angerlarsimaffik pillugu piumasaqaatinik, aammalu akuersissummik tamanit pigineqarsinnaanngitsunik peqarnissamut piumasaqaatinik.

Neqerooruteqartitsisoq neqerooruteqartut uppersaasiinissamik piumasaqaatinik naammassinnaanngitsut piissallugit pisinnaatitaaffeqarpoq.

Tamanut ammasumik suliariumannittussarsiuussinermut atatillugu uppersaatiit suliarineqartarnerat, piukkunnartussarsiuussinertalimmik killilimmik suliariumannittussarsiuussinermi uppersaasiinissamut piumasaqaatinik allaanerupput.

Tassalu tamanut ammasumik suliariumannittussarsiuussinermi neqerooruteqartitsisut neqerooruteqartut, teknikkikkut aningaasaqarnikkullu pisinnaasanik piumasarineqartunik uppersaasiisimasut piissallugit periarfissaqanngillat. Tassalu uppersaatiissat nalinginnaasut, soorlu ilinniarititaanikkut misilittakkatigullu tunuliaquttanut tunngasut uppersarneqarsimappata puaasoqassaaq, tassanilu neqeroorutitut allanut sanilliussineq tunngavigineqassanngilaq. Uppersaatiinik amigaateqartoqarpat neqerooruteqartitsisoq pisussaavoq, neqeroorut naleqqutinngitsut itigartissallugu.

### *§ 12-imut*

§ 12-mi killilimmik neqerooruteqartitsinermut atatillugu neqerooruteqartitsisup siullermeerutaasumik neqerooruteqartitsiniarluni aalajangernerani allagarsiussami suut paasissutissiisutigineqassanersut aalajangersarneqarput.

Neqerooruteqartitsiniarluni allagarsiussami suliassap suunera annertussusaalu pillugu naatsumik nassuiaasiernerup, aammalu qinnuteqaatip sumut nassiunneqarnissanut paasissutissiinerup saniatigut paasissutissat pinngitsoorani ilaatinneqartussat sisamat ilaatinneqassapput, tassalu

- 1) piukkunneqartunut ilaatinneqarnissamut qinnuteqaatip nassiunneqarnissanut sivikinnerpaamik ullunik suliffiusunik 15-inik piffissaliineq,
- 2) aningaasaqarnikkut teknikkikkullu pisinnaasat pillugit uppersaatiinut paasissutissat, qinnuteqaammut ilanngunneqartussat,
- 3) suliassaq appasinnerpaamik akeqartitsilluni imaluunniit aningaasaqarnikkut iluanaarnarnerpaamik akeqartitsilluni neqerooruteqartumut tunniunneqassanersoq, aamma
- 4) qinnuteqartussat amerlanerpaamik qassit neqerooruteqarnissamut kajumissaarneqassanersut.

Qinnuteqaat piffissaq eqqorlugu neqerooruteqartitsisumut taassumaluunniit sinniisuanut apuunneqarnissaa qinnuteqartup isumagisussaavaa. Qinnuteqaatit inortuisut, imaluunniit uppersaatiissanik piumasarineqartunik ilaqartinneqanngitsut ilaatinneqarsinnaanngillat.

Ullut suliffiusut tassaapput ataasinngornermiit tallimannornermut, ullut nalliuttut ilanngunnagit.

Teknikkikkut aningaasaqarnikkut pisinnaasanik uppersaasiinissamut tunngatillugu matuma siuliani § 11-mut nassuiaatit takuneqassapput.

Piukkunnartussarsiuussineq isumaqarpoq neqerooruteqartitsisoq qinnuteqartut peqataanissamut piumasaqaatinik naammassinnissimasut akornanni suliffeqarfinnik neqerooruteqartussanik toqqartuissasoq.

Neqerooruteqartitsiniarluni allagarsiussami amerlanerpaaffiliunneqartunit amerlanerusunik toqqaasoqarsinnaangitsoq tamanna isumaqarpoq, kisiannili peqataanissamut piumasaqaatinik naammassinnittut peqataanissamik qinnuteqartut amerlangaatsiarpata, amerlanerpaaffiliussanit ikinnerusunik toqqaasoqassangitsoq aamma tamanna isumaqarpoq.

Neqerooruteqartut qassit siullermeerutaasumik neqerooruteqartitsinermi neqerooruteqarsinnaanersut ersarissumik ikinnerpaaffilerneqanngillat.

### *§ 13-imut*

Tamanut ammasumik piukkunnartussarsiuusseqqaarnani killilimmik sulariumannittussarsiuussinermi, neqerooruteqartitsisup suliffeqarfiit toqqakkat toqqaannartumik neqerooruteqaqqullugit kajumissaassavai.

Tamanut ammasumik neqerooruteqartitsinertaqanngitsumik (piukkunnartussarsiuussinertaqanngitsumik) killilimmik sulariumannittussarsiuussineq aatsaat pisinnaavoq, entreprenurit aalajangersimasut kisimik suliassamik isumaginninnissamut pisariaqartinneqartunik pisinnaasallit imaluunniit pisariaqartinneqartunik immikkut ittunik ilisimasallit pigineqartut siumut ilisimaneqareerpat.

Neqerooruteqarnissamut najoqqutassani tunniussinissamut tunngavissani aningaasaqarnikkut iluanaarnarnerpaamik neqerooruteqarnissaq tunngavissanut immikkoortutut allanneqarnissaa naammappoq. Neqerooruteqarnissamut najoqqutassat neqerooruteqartitsinermi allakkiamut ilanngunneqarsinnaapput, imaluunniit kingusinnerusukkut nassiunneqarsinnaallutik.

Neqeroorutininik tigusinissamut piffissarititaasoq neqerooruteqartitsinermi allakkiamut imaluunniit neqerooruteqartitsinermut najoqqutassani allassimassaaq, tak. § 9, imm. 1. Taassuma atuunneratigut neqeroorutininik nassiussivissaq ilanngunneqassaaq.

### *§ 14-imut*

Aalajangersagaq malillugu neqerooruteqartut neqeroorutit ammarneqarnerini pinngitsooratik najuussinnaatitaapput. Siunnersuummi § 11, imm. 1-imut nassuiaatini immikkoortup aappaa innersuussutigineqarpoq.

Suliassanik tamanik suliakkiisarnermi neqeroorutit ammarneqarnerini najuussinnaatitaanissamut maannamut inatsisitigut tunngavissaqartoqarsimangilaq. Sulinerulli ingerlasarnera malillugu neqerooruteqartut tamarmik amerlanertigut najuussinnaatitaasarput.

Kisiannili tunniussinissamut “aningaasaqarnikkut iluanaarnarnerpaamik neqerooruteqarneq” tunngavigineqartillugu aammalu suliassanik tamanik suliakkiiniarnermi neqeroorutit atuarneqarnerini neqerooruteqartut arlaat iluanaarnarnerpaamik neqerooruteqarsimanersoq aalajangerneqarsinnaangilaq.

### *§ 15-imut*

Imm. 1

§ 15-imi suliakkiissutissamik tunniussinissamut tunngavissat, neqerooruteqartitsisumit atorneqartussat allassimapput.

Neqerooruteqartitsisup suliariumannittussarsiuussinermi neqerooqqusinermini isumaqatigiissusiornissamut pisussaaitaannginnera naqissuserniarlugu, suliariumannittussarsiuussinermik taamaatitsinissamut periarfissaqarnera erseqqissarneqarpoq. Suliariumannittussarsiuussinermik taamaatsitsisarneq pillugu § 24, imm. 1-imut nassuiaatit innersuussutigineqarput.

Neqerooruteqartitsisup tunniussinissamut tunngavissatut appasinnerpaamik akeqartitsilluni neqerooruteqarnissaq neqerooruteqartitsinermi piumasaqaataanersoq, imaluunniit suliaasaq aningaasaqarnikkut iluanaarnarnerpaamik neqerooruteqartut assigiinngitsut tunngavigalugit tunniunneqassanersoq nalunaarutigissavaa.

Appasinnerpaamik akeqartitsinissaq tunniussinissamut tunngavigineqarsimappat, tassani akit kisimik unammillissutigineqassapput, taamaattumillu neqeroorutit akimikkut imminnut assersunneqarsinnaanissaat tunngavigineqassaaq. Tamanna pissappat neqerooruteqartitsinermi najoqqutassat neqeroortitsinermi suliaassamik tamatuminnga ajornarunnaarsitsisussamik ilaqassapput, tassani tamanut piumasaqaatit minnerpaaffissaat kisimi saqqummiunneqarani.

Aningaasaqarnikkut iluanaarnarnerpaamik neqerooruteqarnissaq tunniussinissamut tunngavigineqassappat, tunngavissat immikkoortut pingaartinneqartussat pillugit paasissutissat ilaatinneqassapput. Taamatut pisoqartillugu neqeroorutit akimikkut assersuunneqarsinnaanissaat pisariaqanngilaq, tassani pitsaassutsikkut assigiinngissutsit assigiinngissutsillu allat pingaarnerutinneqarsinnaammata.

Neqeroorutit § 18, imm. 4 naapertorlugu isumaqatiginninniutigineqassappata, tunngavissat imaluunniit tunngavissanut immikkoortut allanngortinneqarsinnaanngillat.

§ 15-imi tunngavissat tamanut ammasumik killilimmillu suliariumannittussarsiuussinermut atorneqassapput. Suliaqartinniakkat ilisimatereerlugit neqerooruteqartitsinermi sanatitsisup nalilersuinermigut toqqaasarnissaata maleruagassiuunneqarnissaa eqqarsaatigineqanngilaq, kisiannili § 15-imi tunngavissat annertuumik tunngavigineqartarnissaat, aammalu neqerooruteqartitsisup aallaqqaammulli assersuutigalugu akit kisimik pingaarnerutinneqassasut neqerooruteqartunut nalunaaruteqareertarnissaa pingaartinneqartassaaq.

Nr. 1

Neqerooruteqartitsinermi piumasaqaatini appasinnerpaamik akeqartitsinissaq tunniussinissamut tunngavissatut allanneqarsimappat, neqerooruteqartup taamaattumik neqerooruteqartoq suliaassamik tigusinissamik tunngaviatigut piumasaqarsinnaavoq. Tamanna tamanut ammasumik suliariumannittussarsiuussinermut taamatullu killilimmik suliariumannittussarsiuussinermut atuuppoq. Tassalu neqerooruteqartitsisoq suliariumannittussarsiuussinerup taamaatinneqarnissaanut pissusiviusunik tunngavissaqarsimangippat isumaqatigiissusiornissamut pisussaaffeqarpoq.

Appasinnerpaamik akeqartitsinissaq tunniussinissamut tunngavigineqassappat, siullermik neqeroorutit akitigut imminnut assersuunneqarsinnaanissaat piumasarineqarpoq. Taamaattumik neqerooruteqartitsinermi tunngavissat suliassamut najoqqutassanik imaqassaaq, taakkulu malillugit appasinnerpaamik akeqartitsinissaq tunniussinissamut tunngavigineqarnissaa suliassanik tamanik suliarinninnissamut neqerooruteqartitsinermut atorneqarsinnaanngilaq. Aappaatut neqeroorut ataatsimoortunik aningaasartaqartinneqassaaq, akigititassaq taanna unammilleqatigiinnermut tunngavigineqartussaammat.

Tassalu tunngaviatigut neqeroorutini ataasiakkaani ataasiakkaanut immikkoortunullu akit apequtaassanngillat.

Nr. 2

Suliassani pisariunerusuni suliassamut nassuiaasiornissaq ingerlatsinissarlu tamakkiisumik ilaannaasumilluunniit neqerooruteqartumut tunniunneqarsimatillugu “appasinnerpaamik akeqartitsinissaq” tunngavigineqarsinnaanngilaq, neqerooruteqartitsisup nalilersuinerani akit saniatigut pissutsit allat aamma ilaatinneqartussaammata. Tamanna assersuutigalugu suliassanik tamanik suleqatigiinnissamullu isumaqatigiissuteqarfiusunik suliaqarnissamut atuuppoq.

“Aningaasaqarnikkut iluanaarnarnerpaamik neqerooruteqarneq” aamma killormoortumik suliariumannittussarsiuussinermut atorneqarsinnaavoq, tassanilu aallaqqaammulli suliaq qanoq akeqassanersoq nalunaarutigineqarsimassaaq, taamaalillunilu suliap pitsaassusissaa kisimi unammillerutigineqassalluni.

“Aningaasaqarnikkut iluanaarnarnerpaamik neqerooruteqarneq” tunniussinissamut tunngavigineqarsimappat, tunngavissanut immikkoortunik aalajangersaasoqartussaavoq. Neqerooruteqartitsisup assigiimmik pineqarnissamik tunngavissaq ataqqillugu tunngavissat suut aalajangersarneqassanersut nammineerluni aalajangissavaa, kisiannili tunngavissanut immikkoortut neqeroorutit immikkoortuannut naapertuutissapput. Tamanna pinngippat tunngavissanut immikkoortut aningaasaqarnikkut iluanaarnarnerpaamik neqerooruteqartut immikkoortinnissaanut naleqqutissanngillat.

Aningaasaqarnikkut iluanaarnarnerpaamik neqerooruteqartoqassappat, akit tamatigut tunngavissanut immikkoortunut ilaatinneqartassapput. Akit kisimiillutik tunngavissatut immikkoortinneqarsinnaanngillat, tamannalu pissappat tunniussinissamut tunngavissaq tassaalissammat appasinnerpaamik akeqartitsiniarluni neqerooruteqarneq.

Tunniussinissamut tunngavissani aningaasaqarnikkut iluanaarnarnerpaamik neqerooruteqartut immikkoortinneqarsinnaanissaat, tamatumunngalu naleqquttunik saqqummiussisnaanissaat siunertarineqartassaaq.

Neqerooruteqartitsisoq tunngavissanik immikkoortunik tamakkiisunik nalunaaruteqarsimanngippat, neqerooruteqartitsineq akinik unammillerfissatut isigineqaleratarsinnaavoq, taakkunanilu appasinnerpaamik neqerooruteqartoq kisimi isumaqatiginninniarfigineqarsinnaavoq.

Tunngavissat immikkoortuinut assersuutitut taaneqarsinnaasut tassaapput pitsaassuseq, piffissaq sanaartorfiusussaq, ingerlatsinermi aningaasartuutit, immiut akilersinnaassuseq, teknikkikkut naleqassuseq, avatangiisinut sunniutit, sanaartugassap titartarneqarnera atorsinnaassusialu.

Tunngavissanut immikkoortut amerlasuut allannissaat pisariaqanngilaq. Tunngavissat attuumassuteqartut ikittuinnaat naleqqunnerpaasinnaapput, kisiannili akip saniatigut tunngavissatut immikkoortut minnerpaamik ataatsimik ilaqartinneqartussaapput.

Aamma tunngavissanut immikkoortut inatsimmi aalajangersakkami taaneqartut saniatigut tunngavissanik immikkoortunik allanik atuisoqarsinnaavoq, taakkulu assersuutigalugu suliap ingerlanneqarnerani suliffimmi avatangiisinut tunngasinnaapput.

Tamatuma saniatigut neqerooruteqartitsisup neqeroorutigiumasamut tunngavissanut immikkoortut ilinniartoqarnissaq ilanngussinnaavaa. Taassuma atuunneratigut aningaasaqarnikkut iluanaarnarnerpaamik neqerooruteqarnerup ilaatut ilinniartoqarnissaq, taamaalillunilu ilinniartunik ilinniartitsinissamut atuinissamullu isumalluutinik immikkoortitsinissaq neqeroorummut ilaatitsinisoqartussaalluni ilaatinneqartussaavoq. Tamatumani sanasutut ilinniartitaanerup siuarsarneqarnissaa siunertarineqarpoq. Pisortat neqerooruteqartitsisussat tassunga atatillugu § 35 tunngavigalugu maleruagassiisutit eqqumaffigissavaat.

Unammilleqatigiinnissamut piunasaqaat (§ 7, imm. 2) aamma assigiisitsinissamut tunngaviusoq (§ 7, imm. 3) eqqarsaatigalugit tunngavissat immikkoortut neqeroorutit assigiinngissutaannut attuumassuteqartunut tunngasuunissaat pingaartinneqarpoq, neqerooruteqartut assigiinngissutaat pineqarani, taamatuttaarlu assigiimmik pineqarnissamik tunngavissat ataqqineqassapput. Neqerooruteqartitsineq neqerooruteqartunut ataasiakkaanut iluaqutissanngorlugit ilusilerneqassanngillat.

## Imm. 2

Imm. 2 malillugu neqerooruteqartitsinermut piunasaqaatini tunniussinissamut tunngavissatut atorineqartussat suunersut allanneqassapput, taamaalillunilu neqerooruteqartussat neqeroorummik nalilersuineri suut tunngavigineqartussaannersut siumoortumik ilisimareertassavaat. Sapinngisamik siumoortumik nalunaarutigineqartassaaq tunngavissanut immikkoortut qanoq iliorluni ataatsimut nalilersorneqassannersut, imaluunniit tunngavissanut immikkoortut tunngavigalugit nalilersuinnissaq ajornarpat tullerriiarinissaq.

Tunngavissanut immikkoortunik nalilersuisoqassaaq imaluunniit tullerriiarisoqassalluni. Nalilersuineq tassaavoq tunngavissanut immikkoortut ataatsimut isumaanik (procentinngorlugit) nalilersuineq. Tullerriiarineq tassaavoq suliassat isumaasa tullerriiarlugit aalajangersarneqarnerat.

Nalilersuineq nalinginnaasumik tullerriiarinissamut naleqqutissappat, neqeroorutitik nalilersuineri pointinut suussutsinulluunniit uuttuusiortoqassaaq. Neqeroorut pitsaanerpaaq tunngavissamut immikkoortumut aalajangersimasumut atasutut nalinga annerpaaffilerlugu, aammalu neqeroorutitut allanut nalikinnerusunut sanilliullugu naliliiniarnermi atorineqarsinnaavoq.

Akit annertuumik assigiinngissuteqarpata, tunngavissat allat pissusiviusut tunngavigalugit nalilersorneqarnissaat pingaaruteqarpoq, taamaalilluni neqeroorut neqeroorummit allamit akisunerungaatsiarloq aatsaat tunngavissatigut allatigut ima pitsaanerutiguni, allaat akit assigiinngissutaannut matussusiisinnalluni ajugaasinnassalluni.

Tunngavissanut immikkoortut kisimik nalilersorneqarnissaat neqerooruteqartitsinissamut piunasaqaatini allassimassapput. Suussusilersuinissap pointilersuinissalluunniit ilisimatitsissutigineqarnissaa piunasaqaatigineqanngilaq. Kisiannili pointilersuinissaq neqerooruteqartitsinissamut najoqqussanut ilagitillugu saqqummiunneqarsimappat, tamanna maleqqissaarneqassaaq.

Neqeroorutiniq nalilersuineq ersarissumik ingerlanneqassaaq, tassalu kinaassusersiunngitsumik aammalu assigiimmik pineqarnissamut tunngavissat ataqqillugit ingerlanneqassaaq.

Oqaatigineqarsinnaavoq, tunngavissanik aalajangersimasunik, kisiannili annertuumik missiliuinissamik tunngaveqartut pointilersorneqarnissaat ataatsimiititaliamut sulianik ilisimasaqartumut tunniunneqarsinnaammata. Assersuutigalugu sanaartugassap titartagartaanut tunngasut neqerooruteqartitsinermi najoqqutassani piunasaqaatinut saqqummiunneqartunut sanilliussilluni naliliinissamut tunngasut. Taamatuttaaq avatangiisit eqqarsaatigineqarnissaat matumani pineqarpoq, suliassarlu taanna immikkut ilisimasalimmut attuumassuteqanngitsumut, soorlu avatangiisinut teknologiinik ilisimatusarfimmeersumut tunniunneqarsinnaavoq.

Imm. 3

Imm. 3 malillugu neqerooruteqartup suliassaq naammaginartumik pitsaassuseqartillugu, naapertuuttumik piffissarlu eqqorlugu sularisinnaanngikkaa qularineqanngippat, neqerooruteqartitsisup neqeroorut tunuartissinnaavaa.

Inatsimmi § 15 isumaqatigiissusiornissamut pisussaaffiliivoq: Neqerooruteqartitsisup inatsisit malillugit sulariumannittussarsiuussineq atorunnaarsissinnaanngippagu, neqerooruteqartitsisup imm. 1 naapertorlugu tunniussinissamut tunngavissat malillugit suliakkiissutissaq tunniuttussaavaa. Inatsisitigut taamatut inissisimanerup kingunerisaanik kikkullunniit neqerooruteqarfigisinnaasaannik tamanut ammasumik sulariumannittussarsiuussinermi tunngaviusumik nalornisoqartarpoq. Neqerooruteqartitsisoq Neqerooruteqartumit neqeroorutiniq tigusinissamut pisussaatinneqassappat, tamatuma isumaliornartuunissaa tupinnanngilaq. Tamanna eqqarsaatigalugu § 15, imm. 3-mi tunuartitsisarnissamut maleruagassamik immikkut ittumik aalajangersaasoqarpoq, taannalu malillugu neqerooruteqartup suliassaq naammaginartumik pitsaassusilimmik, naapertuuttumik piffissarlu eqqorlugu sularisinnaanngikkaa qularineqarpat, neqerooruteqartitsisoq neqeroorummik tunuartitsisinnaavoq.

Neqerooruteqartitsisoq uppersaasussaataavoq, aamma § 24, imm. 3 naapertorlugu qinnuteqartoqarneratigut aalajangiinerminut tunngavilersuisussaalluni.

Neqerooruteqartitsisoq peqataanissamut piunasaqaatinik aalajangersaasimannngippat, tamatumunngalu atatillugu uppersaatinik takutitsinissamik piunasaqarsimappat, neqerooruteqartitsisup § 15, imm. 3 malillugu naliliinissaq eqqarsaatigalugu neqerooruteqartoq suliaanut tunngatillugu paasissutissanik pisariaqartinneqartunik piunaffigisinnaavaa.

Tunuartitsisinnaatitaaneq neqeroorutip imaanut apeqqutinut tunngassuteqanngilaq, neqerooruteqartumilu pissutsinut tunngassuteqarluni.

Killilimmik suliariumannittussarsiuussinermi neqeroorutit neqerooruteqartunit, § 3, imm. 3 naapertorlugu toqqaannartumik neqerooqquneqarsimasunit tunniunneqartussaapput. Neqerooruteqartitsisup neqerooruteqarnissamut neqerooqqusinninnermini neqerooruteqartussat piginnaaneqarnerannik kinaassusersiunngitsumik naliliisarnissaa anguniarneqartariaqassaaq, taamaalilluni neqerooruteqartitsisup kingusinnerusukkut neqeroorummik tunuartitsinissamut tunngavissarsinninnissaa anguneqassalluni. Taamaattumik § 15, imm. 3 killilimmik suliariumannittussarsiuussinermi atorneqassanngilaq, tamatumani § 12 naapertorlugu piukkunnartussarsiuussinerup naammassinerata kingorna, imaluunniit § 13 naapertorlugu piukkunnartussarsiuussinertaqanngitsumik neqerooruteqartup aggersarneqartup kingorna, neqerooruteqartup pissutsit atugai pillugit paasissutissanik nutaanik pingaarutilinnillu takkuttoqarsimangippat.

Inatsimmi § 15, imm. 3 malillugu neqerooruteqartitsisup neqeroorut tunuartissinnaavaa, tassalu neqeroorutinit tiguneqartunit, tunniussinissamut tunngavissatut aalajangersarneqartut tunngavigalugit naliliiffigineqartunit arlaat isumaqatigiissusiornissamut tunngavigineqassanersoq pillugu aalajangiinnissamut ilaatinneqartussaajunnaarlugu. Kisiannili neqerooruteqartup suliasamik “naammaginartumik pitsaassusilimmik” imaluunniit “naapertuuttumik” imaluunniit “piffissarititaasup iluani” suliaqarsinnaannginnissaa “qularnanngilluinnassasoq” aalajangersakkami tassani piumasaqaatigineqarpoq. Neqeroorummik tunuartitsinissamut piumasaqaatit naammassineqarnerannut uppersaasuusussaaq tassaavoq neqerooruteqartitsisoq.

Neqerooruteqartup neqeroorummini sulinini pillugu paasissutissiinissaanut piumasaqaatinik suliariumannittussarsiuussinermi piumasaqaatini ilaatitsinngitsoortoqarsinnaavoq. Taamatut pisoqartillugu neqerooruteqartitsisoq § 15, imm. 3 malillugu naliliinissani eqqarsaatigalugu neqerooruteqartup sulineranut paasissutissanik pisariaqartinneqartunik qinnuteqarnissamut pisinnaatitaavoq.

Suliakkiissutip pitsaanerpaamik neqerooruteqartumut tunniunneqarnissaanut tunngaviusunik saneqqutsinissaaq tassani pineqarpoq. Neqerooruteqartunik toqqaasimanerup nalileqqinnissaanut aalajangersagaq atorneqarsinnaanngilaq, toqqaaneq § 13 malillugu toqqaannartumik saaffiginninnikkut, toqqaanissamulluunniit tunngavissat tunngavigalugit, imaluunniit §§ 11 aamma 12 malillugit piumasaqaatit minnerpaaffissaat tunngavigalugit pisimagaluarpat. Taamaattumik inatsimmi § 15, imm. 3 taamaallaat pissutsinut, neqerooruteqartitsisup neqerooruteqartunik toqqaanermi aalajangiiffigisariaqanngisaanut atuutissaaq.

## *§ 16-imut*

Imm. 1

Allanik qinigassartalinnik neqerooruteqartarneq tassaavoq neqeroorut, sanatitsisup neqerooruteqartitsinermi neqerooruteqarnissamut tunngaviusuni immikkoortunik sukumiinerusumik taaneqartunik annertunerusumik uniuiffiusunik ilaqartinneqartoq. Neqeroorut tunuarsimaarfitalik aamma tassaavoq neqeroorut, neqerooruteqartitsinermut tunngaviusunik uniuiffiusumik ilalik. Taamaattumik allanik qinigassartalinnik neqerooruteqarneq tunuarsimaarfiusunillu neqerooruteqarneq oqaasertamikkut allaassuteqanngillat. Immikkoortitsinissaaq pisariitsuutitsinissamut tunngavoq, tassami allanik qinigassartalinnik neqerooruteqarnermi neqeroorut tunniunneqartoq nalinginnaasumik neqeroorummik,

neqerooruteqartitsinermi piumasaqaatit malillugit suliaasumik ilaqartinneqartarpoq. Tassalu marlunnik (amerlanerusunilluunniit) neqerooruteqartoqartarpoq.

Inatsimmi § 7, imm. 3 naapertorlugu assigiimmik pineqarnissamik tunngaveqarnerup atuunneratigut neqerooruteqartitsisoq neqeroorutiniq, neqerooruteqartitsinermi, tassungalu ilanngullugu neqerooruteqartitsinermi najoqqutassani piumasaqaatit minnerpaaffissaannik uniuiffiusunik tigusaqarsinnaanngilaq.

Taanna tunngavigalugu § 16-imi aalajangersarneqarpoq, neqerooruteqartitsisup allanik qinigassartalinnik neqerooruteqarfusut ilaatinneqarnissaat eqqarsaatigisinnaagaa, neqeroorutini piumasaqaatinut minnerpaaffiusinnaasut neqerooruteqartitsinermi najoqqutassani allassimasut naammassineqarsinnaappata. Neqerooruteqartitsinermi piumasaqaatini piumasaqaateqarfusooq aalajangersimasooq imaluunniit isumaqatigiissusiornissamut piumasaqaatit assigisaalluunniit uniorneqarsinnaanngitsut ersarissumik allassimappat, piumasaqaatit minnerpaaffilerneqarsimassapput.

Neqerooruteqartitsisoq neqeroorutiniq allanik qinigassartalinnik tiguisinnaasunngorlugu aalajangersagaq ilusiligaavoq. Taamaattumik “appasinnerpaamik akeqartitsinissaq” tunniussinissamut tunngavigineqartussaattillugu neqerooruteqartitsisoq appasinnerpaamik akeqartitsiniarluni neqeroorummut aaqqiissutissamik allamik toqqaanissamut, imaluunniit neqeroorummik, neqerooruteqartitsisup siunnerfigisaanit allaanerusumik tunngaveqartumik toqqaanissamut pisussaaffilerneqanngilaq. Paarlattuanik neqerooruteqartitsisup “aningaasaqarnikkut iluanaarnarnerpaamik neqeroorummik” allamik qinigassartalinnik, tunngavissat immikkoortunik malinniffiusumik piumasaqaatit minnerpaaffissaannik isumaliutigineqartunik naammassinniffiusumik tiguisinissamut pisussaaffilerneqarnissaa eqqarsaatigineqarsinnaavoq.

Piumasaqaatit minnerpaaffissaasa oqaasertaliornissaat pingaartumik aningaasaqarnikkut iluanaarnarnerpaamik neqerooruteqartitsinermi tunngavissat suliarineqarnerannut atatillugu suliarineqartarnissaat naatsorsuutigineqarsinnaavoq, tunngavissat taakkorpiaat tunngavigalugit neqerooruteqartup nammineerluni aaqqiissutissatut siunnersuummik ilusilersuinermigut unammillersinnaaneq angusinnaammagu.

Neqeroorut qinigassamik allamik neqeroorutitalik teknikkikkut aaqqiinissamut taamatullu niuernikkut piumasaqaatinut tunngasinnaavoq. Taaneqartumili kingullermi neqerooruteqartitsisup qanoq ilinerani piumasaqaatit minnerpaaffissaat saneqqunneqarsinnaanersut paasiniarluartariaqarpaa.

Piumasaqaatit minnerpaaffissaat qanoq neqerooruteqartitsinermit piumasaqaatinik allassimassanersooq piumasaqaatigineqanngilaq. Taamaattumik ersarissunik imaluunniit minnerpaaffissatut piumasaqaatinik piumasaqaatigineqartunik, neqerooruteqartitsinermi piumasaqaatinik tamakkiisunik uniuissinnaanermut akuerisaasumut killiliisunik peqarnersooq ataasiakkaatigut naliliisoqartassaaq.

Imm. 2-mut

Imm. 2-mi tamakkiisumik pisuussuteqarnermut tunngatillugu neqerooruteqartitsisup neqerooruteqartitsinermit piumasaqaatini allanik qinigassartalinnik neqerooruteqarnissaq

mattussinnaagaa allassimavoq. Tassunga taarsiullugu neqerooruteqartitsisup piumasaqaatit qinigassanik allanik neqerooruteqarnissamut atuuttussat allassinnaavai, assersuutigalugu neqerooruteqartitsinermut najoqqutassanik uniuinerit erseqqissummik nalunaarutigineqarnissaat, imaluunniit neqeroorutit allanik qinigassartallit neqerooruteqartitsinermi najoqqutassani nassuiaatinut tamakkiisumik malinniffiusut neqeroorummik malitseqartinneqartarnissaat piumasarisinnaallugu.

### *§ 17-imut*

§ 17 naapertorlugu neqerooruteqartitsisup appasinnerusumik neqerooruteqarnissaq tunngavigineqartussaattillugu neqeroorutit, suliariumannittussarsiuussinermi neqeroorutinit allanit qaffasinnerusumik aningaasartalerneqartut isumaqatiginninniutigisinnaanngilai.

Appasinnerpaamik akeqartitsinissaq tunniussinissamut tunngavigineqarsimappat, appasinnerpaamik akeqartitsiniarluni neqerooruteqartoq neqerooruteqartup allap appasinnerpaamik akeqartitsilernissaminik periarfissinneqannginnissaanik piumasaqarsinnaavoq. Kisiannili neqerooruteqartitsisoq appasinnerpaamik neqerooruteqartumut isumaqatiginninniarsinnaanissaq eqqarsaatigalugu nammineerluni aalajangiisinnaavoq. Isumaqatiginninniarnert neqeroorutip appartinnissaanut tunngasinnaavoq, tassani nalornissutaasut atorunnaarsinneqarnissaat ilaatinneqarlutik, aamma neqeroorutip annertusinissaanut tunngasinnaavoq, tassanilu sullissinerup allangortinneqarnissaa annertusineqarnissaaluunniit tunngavigineqassaaq.

Aalajangersakkami neqerooruteqartunut allanut qanorluunniit isumaqatiginninniarnissaq inerteqqutigineqarpoq, tassani isumaqatiginninniarnernut siunertaasoq apeqquataatinneqarani.

Appasinnerpaamik neqerooruteqartoq isumaqatiginninniarfigineqarsinnaasoq tassaavoq neqerooruteqartoq appasinnerpaamik neqerooruteqarsimasoq, neqerooruteqartitsisup naleqqutinngitsut tunuartissallugu pisussaaffinngisaa. Neqerooruteqartitsisup neqerooruteqartoq, neqeroorummik neqerooruteqartitsinermi piumasaqaatini immikkoortunik tunngaviusunik uniuisimasoq isumaqatiginninniarfigisinnaanngilaa.

Inatsit neqeroorutinit, neqerooruteqartitsinermi piumasaqaatinik uniuiffiusunut immikkut maleruagassanik imaqaanngilaq. Apeqqut taanna ilaatigut § 7, imm. 3 naapertorlugu assigiimmik pineqarnissamut tunngavissami, ilaatigullu § 16 naapertorlugu neqeroorutinit qinigassanut allanut maleruagassani maleruagassiuunneqarpoq.

Sulinermili uniuineq ima annertutiginersoq, allaat neqeroorut naleqqutinngitsut tunuartinneqartariaqarluni nalornissutigineqarsinnaavoq. Uniuineq annertunngippat neqerooruteqartitsisup neqeroorut tigusinnaavaa, tamatumani neqerooruteqartitsisoq neqerooruteqartitsinermi najoqqutassani neqeroorutitik tamanik nalorninarartoqartitsinini pissutigalugu tunuartsinissamik imminut pisussaaffilersimangippat. Taannali unioqutitsinermi neqeroorutit akornanni naapertuuttumik pissusiviusullu tunngavigalugit assersuussinissaq akornutissaqartinneqanngippat aatsaat atuutissaaq. Tamatumani tunuarsimaartoqarpat, tassalu neqerooruteqartup neqeroorumminut atuutsitsiinnarnissamut piumasaqaateqarpat, assersuussinissaq eqqarsaatigalugu tunuarsimaarutaasup akia aalajangersarneqarsinnaassaaq.

Neqeroorummi tunuarsimaarutaasoq neqerooruteqartitsinermit tunngaviusumik annikitsuinnarmik uniuffiugaluartoq, taamatut akimik alaajangersaassalluni neqeroorullu eqqarsaatigissallugu neqerooruteqartitsisoq pisussaangilaq

Tassalu neqerooruteqartitsinermit tunngaviusunik annikitsuinnarmilluunniit uniuisoqaraluarpat, neqerooruteqartitsisup neqeroorummik atuutsitsinngitsoornissaa neqerooruteqartup naammattooratarsinnaavaa. tunuarsimaarfiusup annertussusissarpiaa aningaasaqarnikkullu isumarpiaa naliliiffigissallugu neqerooruteqartitsisumut ajornakusoorsinnaavoq, aammalu neqerooruteqartup toqqaannartumik attaveqarfigineqarneratigut isumaqatiginninniarnissamut suliariumannittussarsiuunneqartumullu tulleriiaarinissamut maleruagassat pissutaallutik apeqqut amerlanertigut aaqqiiffigineqarsinnaasangilaq. Taamatut nalornissuteqarnerup kingunerisaanik neqerooruteqartitsisup aningaasaqarnikkut kingunerisassat eqqortut ilisimanagit neqeroorummik akuersinermini ajutooratarsinnaanermik tiguisarpoq. Tamatuma saniatigut annikitsumik uniuffiusunik annikitsunnguugaluartunut aningaasaqarnikkullu naleqanngitsunut, imaluunniit aningaasaliiffigineqarsinnaasunut, kisiannili imamikkut neqerooruteqartitsisup ugartugaanit allaanerusunut tunuarsimaarfeqartoqarsinnaavoq.

Kisiannili tunuarsimaarfiusoq ima annikitsigisinnaavoq, allaat neqerooruteqartitsisup neqeroorut ilaattissallugu pisussaaffilerneqarsinnaalluni. Neqerooruteqartitsisup naliliinini annertoqatigiimmik pissusiviusullu tunngavigalugit sulinissamut tunngaviliussat nalinginnaasut uniorlugit atorsinnaangilaa, tamatumanili suliataaasiakkaat nalilersorneqassapput, aammalu inatsisit malilluinnarlugit sulinissamut tunngaviliisinnaanatik.

Tunuarsimaarnermit neqerooruteqartitsinermit najoqqutassat ersernerlunnerat pissutaasimappat, tamatuma kingunerisaanik neqerooruteqartitsisoq tunuarsimaarneq tamanna pissutigalugu neqeroorutitik tunuartitsisinnaajunnaassaaq.

### *§ 18-imut*

Imm. 1

Imm. 1-imi neqerooruteqartitsisup neqerooruteqartut pingasut sinnerlugit isumaqatiginninniarfigisinnaangikkai aalajangersarneqarpoq.

Neqerooruteqartut isumaqatiginninniarfigineqarnissamik kissaateqarfigineqartut neqeroorutit ammarnerini imarisaat tunngavigalugit, neqeroorutit peqqussutitik naammassinniffiusut tamarmik akornanni tulleriiaarinikkut toqqarneqassapput. Taamatut tulleriiaarinermi ilaanneeriarluni tekniikkimut tunngasunik misissuinissaq pisariaqartarpoq, kisiannili tamatumani neqerooruteqartitsisoq neqerooruteqartunut isumaqatigiissutaasimasinnaasut isumaqatiginninniarnissavimmut atuinissamik pisinnaatitaaffilerneqanngilaq.

Tekniikkimut tunngasunik misissuinerup nalaani neqerooruteqartut kajumissaarneqaratik imaluunniit neqerooruteqartitsisumit akuerineqarlutik neqeroorummik iluarsisamik nassiussisinnaangillat, imm. 1 naapertorlugu suliariumannittussarsiuussinermit neqeroorutit tunniunneqartut akornanni tulleriiaarisoqartussaammat.

Tullerriaarinermi neqeroorutit, ataatsimut isigalugit immikkoorlutilluunniit neqerooruteqartitsinermi najoqqutassanik annertuumik uniuiffiusunik imaqarnertik pissutigalugu neqerooruteqartitsisup eqqarsaatigissallugit pisussaaffiginngisai ilaatinneqarsinnaanngillat. Neqeroorutip naleqqutinngitsortai isumaqatiginninniarnikkut peerneqarsinnaanngillat. Neqeroorutit qinerneqarsinnaasut allat, piunasaqaatit minnerpaaffissaattut piunasaquineqartunik naammassinniffiusut, aamma neqeroorutit neqerooruteqartitsinermit najoqqutassani piunasaquineqartunut uniuuppallaanngitsut, uniuineq akimut neqeroorutaasumut ilanngunneqarsimappat aningaasaliiffigineqarsimappalluunniit eqqarsaatigineqarsinnaapput.

Neqerooruteqartup isumaqatiginninniarnernut peqataanissani pisussaaffiginngilaa. Neqerooruteqartup neqerooruteqartitsisumut isumaqatiginninniarnernut ilaanissamik kissaateqannginnera tunngavigalugu, neqerooruteqartitsisup neqeroorut tunuartissinnaanngilaa. Neqerooruteqartup neqeroorutaata imaa allanngortinnagu neqeroorutini inaarutaasumik nalilersuinermit ilaatinneqarnissaa, neqerooruteqartup isumaqatiginninniarusunnginnerata kingunerissavaa.

## Imm. 2

Neqerooruteqartitsisup neqerooruteqartitsinermi najoqqutassani isumaqatiginninniarfissat pingasut isumaqatiginninniarfigineqannginnissaat aalajangiussimasinnaavaa imaluunniit pingasut inorlugit isumaqatiginninniarfigineqarnissaat aalajangiussimasinnaallugu, tamannalu pisimappat taamatut nalunaaruteqarnini allanngortissinnaanngilaa. Neqerooruteqartitsisup neqerooruteqartitsinermi piunasaqaatimini isumaqatiginninniarnissap ingerlanissaa malinneqartussaq, tassungalugu ilanngullugu isumaqatiginninniarsinnaatitaanernut killiliunneqarsimasinnaasut allareersimangikkunigit, imm. 2 malillugu neqerooruteqartitsisup kingusinnerpaamik isumaqatiginninniarnernit aallartinnerini suleriaaseq malinneqartussaq nalunaarutigissavaa.

Tamatununga atatillugu neqerooruteqartut isumaqatiginninniarfigineqartussat tamarmik neqeroorumminik iluarsiinissamut periarfissinneqassasut neqerooruteqartitsisup nalunaarutigissavaa. Tassalu neqerooruteqartitsisoq neqerooruteqartunut pingasunut tamatigut isumaqatiginninniararnissamut pisussaaffilerneqanngilaq, tak. imm. 1-imi amerlanerpaaffiliineq “neqerooruteqartut pingasut” “ikinnerusunulluunniit”.

Neqerooruteqartut peerneqarsimangitsut isumaqatiginninniarsinnaatitaanernut ilaatinneqarnissaminnut piunasaqarsinnaanngillat, tak. oqaaseq “isumaqatiginninniarsinnaatitaavoq”. Neqeroorutit toqqarneqartut tamarmik isumaqatiginninniarnernut ilaatinneqassanngippata, neqerooruteqartitsisup neqeroorut (-rutit) pitsaanerpaaq (-paat) aallarniutigissavaa (-vai). Neqerooruteqartitsisup neqeroorut kajumissaarinertaqanngitsumik nassiuunneqartoq ilaatissallugu pisussaaffilerneqassanngilaq. Aamma neqeroorutit iluarsaanneqarsimasut, isumaqatiginninniarnernup ingerlanernut uniuuttumik saqqummiunneqartut, neqerooruteqartitsisup malinniarlugit nalunaarutigisaasa eqqarsaatigineqarnissaat assigiimmik pineqarnissamut tunngavissamut uniuussinnaavoq.

## Imm. 3

Imm. 3-mi paasissutissat, neqerooruteqartut allat neqeroorutaannut tunngasut suut neqerooruteqartitsisup neqerooruteqartumut tunniussinanaanerai killilerneqarpoq. Aalajangersakkami pingaartumik neqerooruteqartitsisup neqerooruteqartumut ataatsimut neqerooruteqartut allat neqeroorutaannut, imaluunniit neqerooruteqartut allat neqeroorutiminnik appaaniarnerannut assigisaannilluunniit iliuseqarniarnerannut innersuussilluni neqerooruteqartut akornanni toqqaannartumik aaqqiagiinnigisitsilinninnissaa siunnerfigineqarpoq.

Neqerooruteqartitsisup isumaqatiginninniarnierit sioqqullugit tamatumalu kingorna paasissutissiisussaataitaneranut tunngatillugu, kiisalu isumaqatiginninniarnierit pinginnissaannut tunngatillugu § 25, imm. 4 innersuussutigineqarpoq.

Imm. 4

Imm. 4-mi isumaqatiginninniarsinnaatitaaneq killilerneqarpoq. Isumaqatiginninniarnierit suliassap annertuumik allannguuteqarneranik kinguneqassanngillat. Aalajangersagaq § 7, imm. 3-imi assigiimmik pineqarnissamut tunngavissamut atasutut isigineqassaaq.

Suleqatigiissitsiniarluni suliariumannittussarsiuussinermi suliassaq tunngavimmigut aalajangersimasumik iluseqassanngilaq. Taamaattumik taamatut suliariumannittussarsiuussinermi neqerooruteqartitsisup oqaloqatigiinnissamut kajumissaarutaani piunasaqaatit qanoq annertutigisumik allangortinneqarsinnaanissaannut killissarititaasut nikisinneqarsinnaasariaqarput.

Suliassanik tamanik suliaqarnissami suliassap qanoq ittuunera allangortinngikkaluarlugu neqeroorutit annertuumik allangortinneqarsinnaasariaqarput, allannguinierni neqerooruteqarnissamut kajumissaarummi siunnerfiit ataqqinneqarsinnaappata.

Piukkunnartussarsiuussinertaqanngitsumik killilimmik suliariumannittussarsiuussinermi neqerooruteqartitsisup nutaamik neqerooruteqartitsinissamik piunasaqarnissaa pisariaqalissappat, neqerooruteqartitsisup piunasaqaatai aamma annertungaatsiartumik allangortinneqartariaqassapput, matumani neqerooruteqarusussinnaasut tunngavissanut allanut qisuariaateqarsinnaanaviannimmata.

Aalajangersagaq aamma siunnersuummi § 16, imm. 1-imut, piunasaqaatit minnerpaaffigisinnaasaannut tunngasumut saneqqunneqarsinnaanngitsumut atasuuvoq. Piunasaqaatit minnerpaaffissaasa taakku aamma isumaqatiginninniarnierni ataqqineqarnissaat aallaavigineqartariaqassaaq.

Tunniussinissamut tunngavissat nalunaarutigineqartut allangortinneqarnerinik isumaqatiginninniarnierit inerneqassanngillat.

Aammattaaq tunngavissat immikkoortuinik, isumaqatiginninniarnierfissanik toqqaanermi tunngavigineqartunik nalilersuinissaq tulleriiaarinissarlunniit isumaqatiginninniarnierfissat akornanni toqqaanermi allangortinneqassanngillat.

*Kapitali 4-mut*

Kapitali 4-mi suliaqartinniakkat ilisimatereerlugit neqerooruteqartitsisarnermut maleruagassat katersorneqarput. “Suliaqartinniakkat ilisimatereerlugit neqerooruteqartitsisarneq” pillugu nassuiaat pillugu § 6 innersuussutigineqarpoq.

### *§ 19-imut*

§ 19-imi suliaqartinniakkat ilisimatereerlugit neqerooruteqartinneqartut taamaallat pingasut tikillugit amerlassuseqarsinnaanerata aalajangersarneqarpoq.

Pingasut amerlanerpaaffissaliunneqarput. Neqerooruteqartitsisup amerlanertigut ikinnerusut naammagisarpai, taamaallunilu sapinngisamik annertunerpaamik unammillertitsinissamut piumasagaat unioqutittarnagu.

Suliaqartinniakkat ilisimatereerlugit neqerooruteqartinneqartut pingasunut amerlanerpaaffilerneqarnerani “suliassaq ataaseq” neqerooruteqarfigitinneqartarpoq. Neqeroorutit neqerooruteqartitsisup qinnutigisaanut uniuuttut killissarititaasup anguneqarsimaneramik naatsorsuinermit ilaatinneqartannginnissaat tassani ilaapput. Kajumissaarineq neqerooruteqarnermik inerneqanngippat, kajumissaarinerpiaq taanna aamma ilaatinneqassanngilaq.

Suliassalli annikillineqaraluartut ataasiakkaat sullissinissamik neqeroorutaat assigiikkaangata “suliassaq ataaseq” tassani pineqassaaq. Sanaartugassani amerlassusilerlugit suliarineqartusani assersuutitut taaneqarsinnaapput:

- matut “x“-inik amerlassusilikkat taarsersorneqartussat,
- kussinernik ataannartumik meterinut annertussusilikkanik assaanissaq,
- sumiiffinni “x” kvadratmeterit flisenik qallersorneqartussat.

Piffissamut pilersaarut aammalu suliaqartussat agguataarnerat allanngortinneqaraluartoq “suliassaq ataaseq” pineqassaaq. Neqerooruteqartitsinermit siunertaq ataasiusimappat taanna tassaassaaq “suliassaq ataaseq”.

Piffissap ingerlasup naanerani suliassamut ataatsimut suliaqartinniakkat ilisimatereerlugit neqeroortitseqqinnissamut neqerooruteqartitsisoq periarfissaqanngilaq. Taamaattumik neqerooruteqartitsisup suliaqartinniakkat ilisimatereerlugit neqerooruteqartitsinermini neqeroorutit tigusani naammaginngikkuniuk, aammalu akit annerpaaffissaat anguneqareersimappat, neqerooruteqartitsisoq nutaamik suliariumannittussarsiuussisariaqassaaq.

### *§ 20-imut*

§ 20-imi tunngaviusumik suliariumannittussarsiuussisoqartussaamera aalajangersarneqarpoq. Neqerooruteqartitsisut §1, imm. 2, nr. 1-imi imaluunniit 2-mi ilaatinneqartut taamaallaat suliaqartinniakkat ilisimatereerlugit sanaartugassanut § 20, imm. 1, nr. – 5-imi sukumiisumik nassuiarneqartunut neqerooruteqartitsisinnaapput.

Nr. 1

Suliassanut minnernut neqerooruteqartitsinissamik suliariumannittussarsiuussinissamillu aallartitsinissaq naleqqutinngilaq.

Taamaattumik sanaartugassanut sananeqarnerminni katillugit 500.000 koruuninik aningaasartuuteqarfiusussanut suliaqartinniakkat ilisimatereerlugit neqerooruteqartinneqarsinnaapput. Aningaasat suliassami tamarmiusumi sanaartornermut aningaasartuutitut tunngasuussapput, suliassanut ataasiakkaanut tunngasuussanatik. Immikkoortukkaarluni sanaartornermi "suliassaq tamarmi" suliassanut ataasiakkaanut imaluunniit immikkoortunut tamanut atuutsinneqassanersoq aalajangiiffigineqassaaq.

Nr. 2

Nr. 2 malillugu atuutsitsinnginneq aamma sanaartukkap annertussusissaa, pitsaassusissaa piffissarluunniit atorneqartussa qaaat neqerooruteqartitsinermut tunngaviusuni ajornakusoortorujussuarmik aalajangerneqarsinnaappat atuutissaaq. Aalajangersakkami nutarterinerit, iluarsaassinerit allangortiterinerillu aalajangersimasut ersarissorujussuarmik taaneqarput. Kiisalu aalajangersagaq suliassanut, soorlu anorlernerata kingorna nakkaattoorsinnaasunut isumannaallisaaneq eqqarsaatigalugu kinguartinneqarsinnaanngilluinnartunut tunngasuuvooq.

Kiisalu aalajangersagaq misileraanernut, ilisimatusarnernut ineriartortitsinernullu tunngasuuvooq, suliassat taaneqartut piffissaaq nassuiaatillu eqqarsaatigalugit neqerooruteqartitsinissamut tunngavissamut naleqqussarneqarsinnaannginnerat eqqarsaatigineqarluni.

Nr. 3

Nr. 3-mi suliariumannittussarsiuussinermi neqeroorutinik naleqquttunik takkuttoqarsimannginnissaa tunngavigineqarpoq, kisiannili aamma killilimmik siullermeerutaasumik neqerooruteqartitsinertalimmik suliariumannittussarsiuussinermi ilaatinneqarnissamut qinnuteqaatinik tigusaqarsimannginnissaaq tunngavigineqarluni.

Kiisalu neqeroorutit tiguneqartut peqqussutinik malinniffiusimanngitsut aalajangersakkami pineqarput. Neqeroorutit peqqussutinik malinniffiusimanngitsut tassaapput neqeroorutit, tunuarsimaarneq allatigulluunniit neqerooruteqartitsinermi piumasqaatinik uniuuisimaneq pissutigalugu tunuartinneqartussat.

Suliariumannittussarsiuussinermi neqeroorummik piukkunnaatilimmik peqqussutillu malillugit tunniussisoqaannarsimappat, imaluunniit siullermeerutaasumik neqeroortitsinermi qinnuteqaammik ataasiinnarmik tiguisoqarsimappat nr. 3-mi ilaatitsinnginnissaaq atorneqarsinnaanngilaq.

Nr. 4

Nr. 4-mi suliffeqarfik ataasiinnaq suliassamik isumaginnittussaatiillugu neqerooruteqartitsisoq nammineq isummani malillugu naliliisinnaanngilaq, naliliinermi pissutsit piviusut tunngavigineqartussaammata. Aalajangersakkami suliffeqarfiup aalajangersimasup suliassanut aalajangersimasunut kisermaassisinnaatitaanissaa, imaluunniit sullissineq immikkooruteqarluinnartuunissaa, taamaattumillu suliffeqarfimmit ataasiinnarmit naammaginatumik sularineqarsinnaanissaa siunnerfigineqarpoq.

Nr. 5

Entrepreneurimut suliaqareersumut suliaanut ingerlanneqartumut nangissutitut suliamik tunniussinissap pissusissamisoorsinnaanera “Pissutsinut immikkut ittunut” assersuutitut taaneqarsinnaavoq. Sanaartukkami nutaami natilersuinerup ingerlasup naammasseqqammersulluunniit ininik allanik amerlassusilinnik ilaneqarnissaa suliamut taamaattumut assersuutigineqarsinnaavoq.

Suliassap ingerlaqqittup nalinga annertusiarortillugu, piumasaqaatigineqartut sukannerneruleriartortussaananerata aalajangersakkami matumani pissutsit immikkut ittuunissaannik akuersinermut tunngavigineqassaaq. Tunngavissatut allatut ilaatinneqarsinnaasoq tassaavoq, entrepreneurip suliaqartup sanaartorfimmi maskiinanik immikkut ittunik atuinera, entrepreneurimullu nangitsumut pissarsiariniarlugit akisungaatsiartussat piffissaajarnangaatsiarsinnaasulluunniit. Tamannali pissappat entrepreneurip ingerlasup immaqqa maskiinanik sivilisunerusumik atuinissamut inniminniisinnaannginnera, kiisalu entrepreneurip nangitsisup maskiinanik napareersunik attartorsinnaanera eqqarsaatigineqassapput.

Sanaartuqaq sanaartukkap ineriartortinneqarnissaanik annertuumik siuarsaanissaq siunertaralugu misileraanermut tunisassiornerulluunniit ineriartortinneqarneranut atatillugu sanaartorneq assersuutitut taaneqarsinnaavoq. Sanaartukkani taamaattuni sanatitsisup aamma entrepreneurip / tunisassiorutup sanaartukkap ilusilersorneqarneranut tunngatillugu qanittumik suleqatigiinnissaat anguniarneqartarpoq. Tamatuma saniatigut suliassap annertussusaata nalornissutigineqarnera aammalu ajutoorfiusinnaasut, immaqalu misileraanermut ineriartortitsinermullu aningaasartuutissat akileneqarnissaat pillugit immikkut isumaqatigiissuteqarnissaaq pisariaqarsinnaavoq. Taamaattumik amerlanertigut sanaartukkap ingerlanneqarnissaa pillugu illuatungeriit akornanni toqqaannartumik isumaqatigiinninniartarnissaaq, tassalu suliaqartinniakkat ilisimatereerlugit neqeroortinneqarnissaat naleqqunnerpaasarpoq.

#### *§ 21-mut*

§ 21 naapertorlugu neqerooruteqartitsisup neqerooruteqarnissamut kajumissaarinermini akit unammilliutigineqassanersut imaluunniit pitsaassuseq unammilliutigineqassanersooq ilisimatitsissutigissavaa.

Suliaqartinniakkat ilisimatereerlugit neqerooruteqartitsinermi tunniussinissamut assigiimmik pineqarnissamut tunngavissut peqatigalugit aalajangersaanissaq aalajangersakkap atuutilerneratigut, qinigassatut allatut neqeroorutit eqqarsaatigalugit taamaallaat § 16-imi aalajangersakkat malinneqartassapput, naak aalajangersakkat taakku oqaasertaat taamaallaat suliariumannittussarsiuussinermi neqeroorutinut tunngagaluartut. Qinigassanut allanut suliaqartinniakkat ilisimatereerlugit killeqanngitsumik neqerooruteqartitsisoqartassappat, tunniussinissamut tunngavissat aalajangersarneqareersut tunngavigalugit suliassanik tunniussisarnissap piumasarineqartarnissaa amigaatigineqartussaavoq.

Tassalu suliassamut ataatsimut suliariumannittussarsiuussisarneq aamma suliaqartinniakkat ilisimatereerlugit neqeroortitsisarneq annertunerusumik assigiinngissuteqanngillat. Taakku assigiinngissutaat aneq tassaavoq, suliaqartinniakkat ilisimatereerlugit neqerooruteqartitsisarnermi

piffissaliilluni neqerooruteqartitsisoqartannginnera aammalu neqeroorutit ataatsikkut ammarneqartannginnerat.

#### *§ 22-mut*

Aalajangersakkami inatsimmi § 15, imm. 3-mi neqeroorutitut appasippallaanut il.il. maleruagassap assinga aalajangersarneqarpoq, tak. § 15, imm. 3-mut oqaaseqaatit.

Taassuma kingunerisaanik suliaqartinniakkat ilisimatereerlugit neqeroortinneqarnerini neqeroorut imaluunniit neqeroorutit atorunnaarsinneqarsinnaanngillat. Tassalu neqerooruteqartitsinerup atorunnaarsinneqarnissaanut. § 24, imm. 1, aammattaaq suliaqartinniakkat ilisimatereerlugit neqeroortinneqarnerannut atuuttoq atuuttoq pissusiviusunik tunngavissaqanngippat, imaluunniit § 22 naapertorlugu neqeroorutip tunuartinneqarnissaanut periarfissaqanngippat inniminniisoqassaaq.

Neqerooruteqartitsisup qinnuteqartoqarneratigut aalajangiinnerminut tunngavilersuinissaa eqqarsaatigalugu § 24, imm. 3 innersuussutigineqarpoq.

#### *Kapitali 5-imut*

Kapitali 5-imi isumaqatigiissutitut immersugassanut maleruagassat katersorneqarput. Isumaqatigiissutaasup nalinga il.il. apequtaallutik suliariumannittussarsiuussineq tunngavigalugu imaluunniit suliaqartinniakkat ilisimatereerlugit neqerooruteqartitsineq tunngavigalugu isumaqatigiissutitut immiussassat isumaqatigiissutigineqarsinnaapput.

#### *§ 23-mut*

Imm. 1

Isumaqatigiissutit immersugassat imamikkut isumaqatigiissutitut allanit, inatsimmi maleruagassiuunneqartunit allaanerunngillat, killissarititassatut isumaqatigiissutit immikkoorutaat oqaasertani “suliaqarsinnaaneq”, takuneqarsinnaammata, tak. § 5-imi nassuiaat.

Isumaqatigiissutit immersugassat taamaallaat neqerooruteqartup ataatsip suliffeqarfiullu ataatsip akornanni isumaqatigiissutigineqarsinnaapput. Aalajangersakkami isumaqatigiissutit immersugassat aallaqqaammulli illuatungeriittut akornanni atuussinaneerat aalajangersarneqarpoq, tassalu illuatungiliuttut allat isumaqatigiissutinik immersugassanik atuisinnaanngillat. Tassalu neqeroortitsisoq tamatumunnga kissaateqassagaluarpalluunniit allat assersuutigalugu suliariumannittussarsiuussinissaq pinngitsoorniarlugu isumaqatigiissut tunngaviginiarsinnaanngilaat.

Imm. 2

Isumaqatigiissut immersugassaq sivisunerpaamik ukiuni sisamani atuutissaaq. Ukiut sisamat qaangiuppata, imaluunniit piffissaq atuutsitsivissaq sukumiinerusumik isumaqatigiissuteqarfiusoq

sivikinnerusooq qaangiuppat, isumaqatigiissut immersugassaq immikkut ittumik atorunnaarsitsinissamik nalunaaruteqartoqanngikkaluartoq atorunnaassaaq.

### *Kapitali 6-imut*

Neqerooruteqartitserernermi neqerooruteqartitsisup paasissutissiisussaataitaneranut tunngaviliisussaataitanerannullu maleruagassat ataatsimut katersorneqarput.

### *§ 24-mut*

Imm. 1

Imm. 1 neqerooruteqartut suliassamik tunniussinissamut atatillugu qanoq aalajangertoqarsimaneramik ilisimatinneqarnissaannut pisussaaffeqarnermut tunngasuvoq.

Neqerooruteqartitsisoq neqerooruteqartitserernermini nammineerluni aalajangiineq pillugu neqerooruteqartunut nalunaaruteqarnissamut pisussaavoq. Neqerooruteqartitsineq suliassamik tunniussinermik imaluunniit suliariumannittussarsiuussinerup taamaatinneqarneranik inernejaraluarpalluunniit pisussaaffik taanna atuutissaaq.

Aalajangersakkami sanatitsisup taamaatitsisimaguni tamatumunnga tunngavilersuinissaa nassuiarneqarpoq. Taamaalilluni aatsaat tunngavissaqartumik peqquteqartoqarpat taamaatitsisoqartassaaq. Tamannali inatsimmi ersarissumik maleruagassiuunneqarsimanngilaq, inatsimmi neqerooruteqartitsisut namminersortut pisortallu assigiinngitsorpassuit pineqartussaassammata, tassanilu tunngavissalimmik peqquteqarnissaaq aaqqissuussaanerit iluanni pissutsit aamma sanatitsisup aalajangerniartarneranut pissutsit allanngorartorujussuarnik imaqartussaassammata.

Kisiannili taamaatitsisarneq neqerooruteqartut politikikkut kissaatigineqanngitsut, imaluunniit neqerooruteqartitsisuusaarnissaaq pinngitsoorniarlugit neqerooruteqartunut sunniiniutitut atornejassanngilaq.

Ineriartorneq pissutigalugu sanaartorneq naammassineqarsinnaajunnaarsimappat, tamanna tunngavissalimmik peqqutaasimassasoq qularutissaanngilaq. Imaluunniit sanatitsisup suliassamik naliliinikippallaarsimanagera, pisariaqartinneqartumilluunniit unammilleqatigiittoqarsimannginnera pissutigalugu akit neqeroorutigineqartut missingersuusiarineqartunut naleqqiullutik qaffasippallaarsimasinnaapput.

Nalunaaruteqartussaataitaneq akit pillugit unammilleqatigiissitsinermut aamma pitsaassuseq pillugu unammilleqatigiissitsinermut atuutissaaq.

Imm. 1 naapertorlugu neqerooruteqartitsisoq marloqiusamik pisussaaffeqarpoq. Ilaatigut suliassamik tunniussinermut tunngatillugu aalajangiinermik nalunaaruteqarnissaaq pisussaaffigaa. Nalunaaruteqartussaanerme tassani tunngavilersuisoqassanngilaq, taamaattorli tak. imm. 3. Ilaatigut suliariumannittussarsiuussineq imaluunniit suliaqartinniakkat ilisimatereerlugit

neqerooruteqartitsineq taamaatinneqarsimappat tamatumunnga tunngaviusoq nalunaarutigissallugu pisussaaffeqarpoq.

Neqerooruteqartut tamarmik ilisimatinneqassapput, tassalu aalajangersagaq aamma neqerooruteqartunut, neqerooruteqartitsisup piukkunnaateqanngitsutut isigisaanut imaluunniit neqeroorutitut arlaannik pissuteqartumik itigartinneqartunut atuutissaaq.

Suliassamik tunniussineq, tassalu suliassamik tunniussinissaq aalajangerneqarsimappat imaluunniit taamaatitsineq aalajangiunneqarsimappat, tamanna pillugu aalajangiinerup kingorna pilertornerpaamik nalunaarutigineqassaaq, aammalu isumaqatigiissutip atsiorneqarnissaata tungaanut ilisimatitsinissap utaqqissunneqarnissaa unioqqutitsineruvoq.

Tunniussinissaq pillugu aalajangiinerup qanga pisimanerata uppersarneqarsinnaanissaa pingaaruteqarpoq. Uppersarsaatissaqarnissaaq pissutigalugu suliassamik tunniussinerup allakkatigut nalunaarutigineqartarnissaa inassutigineqarpoq.

Suliassamut tunngasumik pissutissaqarpat neqerooruteqartitsisup neqerooruteqartitsineq unitsissinnaavaa. Imm. 1-ip naanerani allassimasutut taamaatitsineq qinnuteqartoqarnissaa utaqqeqaarnagu nalunaarutigineqassaaq. Tassani ilaatigut suliamut tunngasunik pissuteqartumik taamatitsisoqarsinnaanera pineqarpoq.

Suliariumannittussarsiuussineq imaluunniit suliqartinniakkat ilisimatereerlugit neqerooruteqartitsineq unitsinneqarsimappat, taamaalillunilu tunniussinissaq aalajangerneqarsimannigippat, ilisimatitsissut aamma aalajangernermut tassunga tunngaviumik imaqassaaq. Neqerooruteqartitsisup sapinngisamik pilertornerpaamik tunngavilersuummik pisariaqartinneqartumik nalunaaruteqarnissaaq pisussaaffigaa. Tassalu neqerooruteqartoq tunngavilersuiffigineqarnissamik qinnuteqassanngilaq.

Aalajangernermut tunngavilersuutaasoq taamaalillunilu pissutaasoq suliamut tunngasuussaaq. Kiisalu tunngavilersuutaasoq aalajangersimasumut tunngassaaq eqqortuussallunilu. Neqerooruteqartut ataasiakkaat nukissaat aamma/imaluunniit sanngeequtaat ajugaassutaasumik neqerooruteqartumut imaluunniit neqerooruteqartitsinermi piumasaqaatinut naleqqiunneqarsimappata, tunngavilersuut ersarissuusimassaaq. Isumaliutersuuterpiaat erseqqissarneqarsimallutik neqerooruteqartitsisup aalajangiineranik kinguneqarsimappata tunngavilersuut eqqortuusimassaaq.

Suliamut tunngatillugu tunngavilersuutaasinnaavoq assersuutigalugu suliariumannittussarsiuussinermut atatillugu kukkusoqarsimasooq, taamaalillunilu inatsisinut eqquutsitsinissamut nutaamik neqerooruteqartitsinissaq pisariaqarluni. Assersuut alla tassaasinnaavoq naleqquttumik suliassamik tunniussinissamut tunngaviliisinnaasumik neqerooruteqartoqarsimannigitsooq. Tassunga aamma ilaatigut neqeroorutit aningaasaliissutitut killiliissanut naleqqiullugu qaffasippallaanik aningaasartallit ilaapput, neqerooruteqartitsisooq tunngaviatigut aningaasaqarnikkut piumasarisaasut aningaasaliissutitigut matussutissaqartinneqartut sinnerlugit aningaasartallit atortussaatinnaannut pisussaaffeqanngimmat.

Tunngavissanik allannguinani nutaamik suliariumannittussarsiuussinissaq imaluunniit suliqartinniakkat ilisimatereerlugit neqerooruteqartitsinissaq siunertaralugu suliariumannittussarsiuussinermik taamaatitsineq tunngavimmigut sulianut tunngasunik

tungavilersorneqassanngilaq. Tamanna pissappat neqerooruteqartut nutaat siornatigut neqerooruteqarsimasut neqeroorutaannik ilisimannereerlutik neqerooruteqartarnissaat tamatumani tungavigineqarpoq. Taamaalliluni § 7, imm. 3 naapertorlugu assigiimmik pineqarnissamut tungavissat unioqqutinneqassapput.

Taamaatitsinermi tungavissanik allannguiffiusumik neqerooruteqartitsinissamik nutaamik aallartitsinissaq, imaluunniit isumaqatigiissisiornissap taamaatinneqavinnissaa siunertarineqarsimappat, tungavilersuut taanna piviusorsiortuussaaq.

## Imm. 2

Imm. 2-mi neqerooruteqartitsisup qinnuteqartut, siullermeerutaasumik neqerooruteqartitsinermi sooq peerneqarsimanerat pillugu nalunaartussaataitanera aalajangersarneqarpoq. Qinnuteqartut taakku aamma qinnuteqarnermikkut sooq siullermeerutaasumik neqerooruteqartitsinermi ilaatinneqarsimannginnertik pillugu tungavilersuummik pissarsisinnaapput.

Taamatutaaq pisoqartillugu qinnuteqartut kikkut neqerooruteqarnissamut kajumissaarneqassanersut pillugit aalajangernermiit piaarnerpaamik ilisimatitsisoqartoqassaaq. Imm. 2 naapertorlugu nalunaarummi tungaviatigut tungavilersuisoqassanngilaq, kisiannili qinnuteqartoq peerneqartoq kinaluunniit tungavilersuiffigineqarnissamik piumasaqarsinnaatitaavoq.

## Imm. 3

Imm. 3-mi neqerooruteqartitsisup qinnuigineqarnermigut sooq neqeroorut suliariumannittussarsiuussisarneq pillugu § 15, imm. 3 imaluunniit suliaqartinniakkat ilisimatereerlugit neqeroortinneqartarnerat pillugu § 22 naapertorlugu peerneqarsimaneersoq tungavilersuisussaataitanera aalajangersarneqarpoq.

Taamatut tungavilersuineq neqeroorutininik itigartitsinissamut piumasaqaatinut attuumassuteqassaaq, aammalu sooq neqerooruteqartitsisup neqerooruteqartoq suliamik naammaginartumik pitsaassusilimmik, imaluunniit naleqquttumik illersorsinnaasumillu, piffissarititaasullu iluani suliaqarsinnaanngitsutut isumaqarfigineraa nassuiarneqassalluni.

## § 25-mut

### Imm. 1

Tak. § 25 aningaasaqarnikkut iluanaarnerpaamik neqerooruteqarnissaq tunniussinissamut tungavigineqartussaatiillugu, tungavilersuinissamut maleruagassat immikkut ittut aalajangersarneqarput. Imm. 1-imi aalajangersakkap atuuffissaasa killilernissaat kisimi siunertarineqarpoq. Aalajangersakkap atuunneratigut imm. 4-mi neqerooruteqarqussisarneq aatsaat atorneqarsinnaavoq, suliakkiissutissaq aningaasaqarnikkut iluanaarnerpaamik neqerooruteqarnissaq tungavigalugu tunniunneqassappat, tak. § 21.

Imm. 2

Imm. 2 naapertorlugu neqerooruteqartitsisup kingusinnerpaamik isumaqatiginninniarnit aallartinneranni qaaquneqarsimannginnermut tunngaviusoq neqerooruteqartunut attuumassuteqartunut tamanut tunngavilersorlugu nalunaarutigissavaa. Aamma nalunaaruteqartussaataaneq tunngavilersuisussaataanerlu neqerooruteqartunut, neqerooruteqartitsisup naleqquttutut isumaqarfiginngisaanut atuuppoq.

Nalunaaruteqarneq taanna aalajangernermit tunngaviusumik imaqassaaq, taamaattumillu tunngavilersuinissamut qinnuteqaammik saqqummiussisoqarsimanissaa tassani piumasqaataannilaq.

Tunngavilersuut tunngavissaqassaaq, eqqortuussaaq aalajangersimasumullu tunngasuussalluni. § 24, imm. 1-imi tamanna pillugu nassuiaatit aamma taamatut atuutissapput.

Imm. 3

Imm. 3 naapertorlugu neqerooruteqartitsisup isumaqatiginninniarnit naammassineranni erngerluni neqerooruteqartut isumaqatiginninniarfigineqarsimasut, imaluunniit neqerooruteqartitsisup § 18, imm. 2 –imut nassuiaatit naapertorlugit isumaqatiginninniarfissatut piareersimatissimasani neqerooruteqartup akuerineqartup piginnaasai annertuumillu iluaqutissartai pillugit ilisimatissavai. Taamatut ilisimatitsissuteqarneq aatsaat isumaqatiginninniarnit tunniussinissamut aalajangiiffiusut naammassinerini pisinnaavoq. Paasissutissat taamaattut kajumissaarinertaqannngitsumik tunniunneqassapput.

Imm. 4

Isumaqatiginninniartoqarsimanngippat, neqerooruteqartut piumasqaatinik naammassinnissimasut imm. 4 naapertorlugu piumasqaarnermikkut neqerooruteqartup ajugaasup piginnaasai annertuumillu iluaquteqarfigisai pillugit paasissutissinneqarsinnaapput.

Taamatut nalunaaruteqarnissamut pisussaaffik taamaallaat neqerooruteqartunut, neqerooruteqartitsinermi piumasqaatinik naammassinnissimasunut atuuppoq, taamaattumillu neqerooruteqartut piumasqaatinik naammassinnissimanngitsutut itigartinneqartut imm. 4 naapertorlugu ilisimatinneqartussaannngillat. Neqerooruteqartulli taakku § 24, imm. 1 naapertorlugu itigartinneqarnerminnik ilisimatinneqartussaapput.

## *Kapitali 7-imut*

### *§ 26-mut*

Imm. 1

Naalackersuisut Neqerooruteqartitsisarnermut Maalaaruteqartarfimmik pilersitsisinnaanissaat siunnersuutigineqarpoq. Neqerooruteqartut sanaartugassanik neqerooruteqartitsisut pillugit ataatsimiititaliamut suliamut ilisimasalinnut, aaqqiagiinnngissutinik suliaqarnissamut pisariaqartinneqartunik piginnaaneqartunut maalaarutiginnissinnaanissaat Neqerooruteqartitsisarnermut Maalaaruteqartarfiup pilersinneqarnerani pingaarnertut siunertarineqarpoq. Neqerooruteqartitsisarnermut Maalaaruteqartarfik sulinermini Naalackersuisunut, Neqerooruteqartitsisarnermut Maalaaruteqartarfiup suliaminik ingerlatsineranut naalakkiinissamut piginnaatitaanngitsunut qilersorsimannngilaq.

Neqerooruteqartitsisarnermut Maalaaruteqartarfimmi suliaqarnermi tunngaviusumik inatsimmi § 63 naapertorlugu eqqartuussivinnut ingerlatitseqqissinnaaneq mattunneqanngilaq.

Imm. 2-mut

Neqerooruteqartitsisarnermut Maalaaruteqartarfimmi ilaasortat tassaasut siulittaasoq ataaseq, tak. imm. 3, aamma sulianut ilisimasallit marluk, tak. imm. 4, aalajangersakkami erseqqissarneqarpoq. Siulittaasoq ilaasortallu sulianut ilisimasallit marluk kiisalu taakkua sinniisissaat ukiuni sisamani atuuttussatut toqqarneqartassapput, qinigaaqqinnissamut periarfissaqartinneqassallutik.

Imm. 3-mut

Landsdommerip Neqerooruteqartitsisarnermut Maalaaruteqartarfimmi siulittaasussamik sinniisissaanilu toqqaasarnissaani, siulittaasutut toqqakkap Kalaallit Nunaanni Namminersornerullutik Oqartussat allaffissornerannut politikikkikullu sulinerannut attuumassuteqannginnissaa siunertarineqarpoq. Siulittaasutut toqqagaq taassumalu sinniisissaatut toqqarneqartut inatsisilerituutut atorfilittut soraarummeersimasussaapput. Neqerooruteqartitsisarnermut Maalaaruteqartarfiup eqqartuussiviit nalinginnaasut saniatigut qinigassaasinnaasutut eqqartuussivittut iluseqarnissaa siunertarineqarmat siulittaasup tassungalu sinniisissat toqqarneqartut eqqartuussisunut fuldmęgtiginik toqqaasarnermi piginnaasatigut misilittakkatigullu tunngavissatut piumasarineqartut sapinngisamik assiginik piginaaneqartarnissaat siunertarineqarpoq.

Neqerooruteqartitsisarnermut Maalaaruteqartarfimmi ilaasortassat sinneri sapinngisamik inuit sanaartornermik ilisimasaqartut akornanni toqqarneqartassapput, inuit taakku suliasanik neqerooruteqartitsisarnerup teknikkimut tunngasortaanut pisariusunut, Neqerooruteqartitsisarnermut Maalaaruteqartarfimmut suliaqarnissatigineqartartunut paasisimaarinnittuusarmata ilisimasaqartarlutillu, taamaalillutillu suliarinnissinnaasarlutik.

Imm. 4-mut

Imm. 4-mi Neqerooruteqartitsisarnermut Maalaaruteqartarfimmi ilaasortat sulianut ilisimasallit marluk Kalaallit Nunaanni sanaartornermik suliallit inassuteqarnerisigut Naalackersuisunit toqqarneqartarnissaat aalajangersarpoq. Suliffeqarfiit sanaartornermik suliaqartartut suliaasaqarfinnut imaluunniit sulisitsisut kattuffiitut naleqquttumik angissusilinnut arlalinnut ilaasortaappata, kikkut inassuteqassanersut, imaluunniit kattuffiit arlallit ataatsimut inassuteqassanersut Naalackersuisut taakku isumasioqatigalugit aalajangissavaat.

Suliassaqarfimmi suleqatigiiffimmik inassuteqarsinnaasumik soqanngippat suliffeqarfinit sanaartornermik suliaqartunit inassuteqaatinik pissarsiniarnissaq Naalakkersuisut suliassaraat. Suliffeqarfinnik sanaartornermik suliaqartunik oqarnermi suliffeqarfiit, annertunerusumik sanaartornermi suliassanik *suliaqarnermik* niueruteqartut eqqarsaatigineqarput. Naalakkersuisut ilaasortassanik, sanaartornermi inassutigineqarsimanngitsunik toqqaasinnaanngillat.

Ilaasortassanik taakkulu sinniisissaannik sulianik ilisimaarinnittunik toqqartuinermi najukkani suliassaqarfinni soqutigisanut attuumassuteqannginnissaq pingaartinneqassaaq, taamaattumillu ilaasortassanik Kalaallit Nunaanni najugaqartuunngitsunik toqqaanissaq pisariaqarsinnaavoq.

Sinniisissat amerlassusissaat ersarissumik aalajangersarneqanngilaq, kisiannili ilaasortap sulianik ilisimasaqartup ataatsip minnerpaamik ataatsimik sinniisissaqarnissaa siunnerfigineqarpoq.

### § 27-mut

#### Imm. 1

Neqerooruteqartitsisarnermut maleruagassanik unioqqutitsisoqarsimansoq pillugu aalajangiinissaq maalaarutininik suliaqartarnermi siunertarineqarpoq.

Aalajangersakkami Neqerooruteqartitsisarnermut Maalaaruteqartarfiup suliassai pingaernerit aalajangersarneqarput. Maalaaruteqartarfiup inatsimmik maleruagassanillu inatsit naapertorlugu suliarineqarsimasunik unioqqutitsinerit pillugit apeqqutit suliarisartussaavai.

#### Imm. 2

Neqerooruteqartitsisarnermut Maalaaruteqartarfiup pissutsinut imm. 1-imi taaneqartunut maalaarutinut aalajangiinerisa, maalaarutip Neqerooruteqartitsisarnermut Maalaaruteqartarfimmut saqqummiunneqarneraniit kingusinnerpaamik qaammatit pingasut qaangiunnerini pisarnissaat anguniarneqassasoq aalajangersakkami allassimavoq.

Neqerooruteqartitsisup aamma neqerooruteqartup aalajangiinerit malillugit aaqqiisinnaanissaat tamatumunnga tunngavigineqarpoq. Maalaarutaasoq maalaaruteqartarfimmit kinguartitsinermik sunnuteqartinneqarsinnaammat, tak. § 30, imm. 1, suliariumannittussarsiuussinermi ajugaasup sanaartugassamik tunniunneqartumik aallartissinnaasariaqarnera, aamma suliamik sukkasuumik suliarinninnermi eqqarsaatigineqarpoq. Aamma neqerooruteqartitsisoq aalajangiineq tunngavigalugu aaqqiisinnaasariaqarpoq, tamanna suliap ingerlanneqarnerani aningaasaqarnikkut pingaaruteqarsinnaammat. Kiisalu maalaaruteqartup piffissap naammaginartup iluani aalajangiisoqarnissaa soqutiginantippaa, ilaatigut suliakkiissummut piffissap sivisunerusup iluani isumalluutissanik piareersimasuutitaqarnissaq suliffeqarfimmut aningaasaqarnikkut artukkiisinnaammat.

#### Imm. 3

Imm. 3-mi Naalackersuisut Neqerooruteqartitsisarnermut Maalaaruteqartarfimmut allatseqarnikkut ikiuunnissamut pisussaaffilerneqarput. Allatsitut ikiortaasoq Neqerooruteqartitsisarnermut Maalaaruteqartarfiup ataatsimiinnissaanut piareersarnermut ingerlatsinermullu suleqataasassaaq.

Allattoqarfiup Neqerooruteqartitsisarnermut Maalaaruteqartarfimmi aalajangiinerit ingerlaqqinnissaat aamma isumagissavaa.

Maannakkorpiaq allattoqarfivimmik pilersitsinissaaq naatsorsuutigineqanngilaq.

Kiisalu imm. 3-p atulerneratigut Neqerooruteqartitsisarnermut Maalaaruteqartarfimmi ilaasortat Inatsisartuni Naalackersuisunilu il.il. ilaasortanut akissarsiaqartitsineq il.il. pillugit Inatsisartut inatsisaat naapertorlugu akissaasersorneqassapput. Neqerooruteqartitsisarnermut Maalaaruteqartarfimmi suliat annertuujunerat, taamaattumillu ilaasortat maalaaruteqartarfimmi ilaasortatut atuutissagunik akissaasersorneqartariaqarnerat tamatumunnga tunngavigineqarpoq.

Imm. 4

Imm. 4-mi Neqerooruteqartitsisarnermut Maalaaruteqartarfik sulinini pillugu ukiumoortumik Naalackersuisunut nalunaarusiortarnissamut pisussaaffilerneqarpoq. Tamatumani ilaatigut Naalackersuisut maalaarutinit suliat annertussusaanik atorineqarneranillu ilisimatinneqarnissamik pisariaqartitsinerannik tunngaveqarpoq, Naalackersuisut taamaalillutik suliaasinnaasut suut akulikitsumik suliarineqartarnersut, inatsisillu atuunnerani naapertuutinngitsunik aaqqiisinnanermut tunngaviliisinnanassut pillugit ilisimatinneqarsinnaassammata.

#### § 28-mut

Imm. 1

Suliaq allakkatigut suliarineqassaaq. Suliaq piareersarneqarnerani allattoqarfiup paasissutissat, Neqerooruteqartitsisarnermut Maalaaruteqartarfiup aalajangiinissaanut attuumassuteqartut suliamut ilaatinneqarnissaat isumagissavaa. Suliaq allakkatigut piareersarneqassaaq, isumaqatiginninniarnerrillu oqaluinnarluni ingerlanneqassallutik, tamatumani Neqerooruteqartitsisarnermut Maalaaruteqartarfiup suliaq allakkatigut ingerlanneqassasoq isummersimanngippat.

Oqaasiinnartigut isumaqatiginninniarneq tunngaviatigut eqqartuussivimmi isumaqatiginninniarnertut eqqartuussivimmi ingerlanneqassaaq, kisiannili eqqartuussisarnermut inatsimmi maleruagassat malinnagit ingerlanneqassalluni.

Suliami aalajangiinerup allakkatigut nalunaarutigineqarneratigut suliaq naammassineqassaaq, taamaalilluni Maalaaruteqartarfiup aalajangiinera illuatungeriinnut pineqartunut allakkatigut uppersarneqassalluni.

Imm. 2

Aalajangersakkami Neqerooruteqartitsisarnermut Maalaaruteqartarfiup paasissutissanik, aalajangiinissaq siunertaralugu atuumassutilittut nalilerneqartunik neqerooruteqartitsisumit neqerooruteqartunillu pissarsiniarsinnaanissaa aalajangersarneqarpoq. Neqerooruteqartitsisarnermut Maalaaruteqartarfiup taamaalilluni maalaaruteqartup tungaaniit tunngavilersuutaasunut najoqqutassatullu nassiunneqartunut qilersorsimassanngilaq. Neqerooruteqartitsisarnermut Maalaaruteqartarfiup nammineerluni apeqqutit suliamut pineqartumut pingaaruteqartut misissuiffigisinnaavai. Maalaaruteqartarfiup suliamut tunngasunik nammineerluni misissuinissaata oqaluinnarluni isumaqatiginninniarnersinnaasut sioqqullugu pinissaa nalinginnaasumik ilimagineqartarpoq.

Neqerooruteqartitsisarnermut Maalaaruteqartarfiup suliap paasissutissartaqarnissaa akisussaaffigaa.

Kiisalu aamma maalaarut tunniunneqareerpat pisortatigoortumik sulinermut tunngaviusut atuutilissapput.

Imm. 3

Imm. 3-mi Naalakkersuisut suleriaasissanut maleruagassiornissamut pisussaaffilerneqarput. Suleriaasissami ilaatigut ataatsimiigjaqqusisarnissamut, imaqarniliortarnissamut aammalu Neqerooruteqartitsisarnermut Maalaaruteqartarfiup tunuarnissamut maleruagassanik aalajangersaasoqarpoq.

Aamma aalajangersakkami Neqerooruteqartitsisarnermut Maalaaruteqartarfiup sulinerani aalajangersakkanik tamanut atuuttunik Naalakkersuisut aalajangersaasinnaanissaannut tunngavissiisoqarpoq.

Suliassat suut Neqerooruteqartitsisarnermut Maalaaruteqartarfiup suliarineqarsinnaanersut pillugit Naalakkersuisut maleruagassiorsinnaassapput. Assersuutigalugu Neqerooruteqartitsisarnermut Maalaaruteqartarfiup aamma siunnersuinermit suliassat isumagineqarsinnaanissaannut Naalakkersuisut maleruagassiorsinnaassapput, taakkunungalugu misissueqqissaarnerusinnaasunut inassuteqaateqartarneq paasiniaasarnerlu, kiisalu inatsisinut allannguutaasinnaasunut inassuteqartarneq ilaapput.

Piginnaatitsissuteqarnerup kingunerisaanik Naalakkersuisut ukiumoortumik nalunaarutip ilusissaanut imasaanullu maleruagassiorsinnaassapput. Assersuutigalugu nalunaarummi makku saqqummiunneqartussaanerannut maleruagassiortoqarsinnaavoq:

- suliassat suut Neqerooruteqartitsisarnermut Maalaaruteqartarfiup saqqummiunneqarsimanerinit nassuiaatit,
- Neqerooruteqartitsisarnermut Maalaaruteqartarfiup sulianut maalaaruteqartarfiup saqqummiunneqarsimasunut tunngatillugu misilittagai, inassuteqaatillu tassannga allannguisinnaanermut ilassusiinnaanermullu tunngaviliisinnaasut, kiisalu
- Neqerooruteqartitsisarnermut Maalaaruteqartarfiup aalajangiinerit tunngavigalugit inerniliinerit inassuteqaatillu.

Taaneqartut suliassanut tamanut matussusiinngillat.

Pisariaqartinneqartoq paasineqarpat Naalakkersuisut missingersuutinut naatsorsuutinullu tunngatillugu maleruagassanik aalajangersaasinnaapput.

Neqerooruteqartitsisarnermut Maalaaruteqartarfik pingaartumik sulianik sanaartornermi teknikkikkut pisariusunik annertuunik suliaqartussatut pilersinneqarsimavoq. Taamaattumillu pissusilersornissamut aalajangersakkamik ilanngussisoqarpoq, taannalu tunngavigalugu suliamik Neqerooruteqartitsisarnermut Maalaaruteqartarfimmut tunniussinissamut akitsuutinik, sanaartugassap akiata 1 procentianik annertussusilerneqartumik, taamaattorli annerpaamik 100.000 koruuniussanik atuutsitsisoqalersinnaavoq.

Tassunga assersuutitut oqaatigineqarsinnaavoq sanaartugassaq 1.000.000 koruuninik akeqarpat akitsuut 10.000 koruuniussaaq. Kisianni sanaartugassaq 5.000.000 koruuninik akeqarpat, akitsuut 50.000 koruuniussaaq.

Sanaartugassamik suliarinnineq 15.000.000 koruuninik akeqarpat akitsuut 100.000 koruuniussaaq. Sanaartugassamut suliarinninnermut aningaasartaasut 1 %-iat (150.000 koruunit) akitsuutit amerlanerpaaffissaat 100.000 koruuniusoq sinnersimammattigit akitsuut aningaasartanut taakkununnga aalajangerneqassaaq.

Neqerooruteqartitsisarnermut Maalaaruteqartarfiup suliassanik soqutaanngitsunik suliaqartarnissaata siunertarineqannginnera tamatumunnga tunngavigineqarpoq. Taamatuttaaq maalaaruteqartoq suliami tamakkiisumik ilaannaasumilluunniit taperserneqarpat, imaluunniit suliaq Neqerooruteqartitsisarnermut Maalaaruteqartarfimmi suliarineqartussatut naleqqutinngippat akitsuutip utertinneqarnissaata Naalakkersuisunit aalajangerneqarsinnaaneranut tunngaviliisoqarpoq.

Imm. 4

Suliamik Neqerooruteqartitsisarnermut Maalaaruteqartarfimmi suliaqarnissamut killissarititassamik atuutsitsisoqalerpoq. Taassuma atuutilerneratigit suliassat sananeqarnerminni 100.000 koruunit inorlugit nalillit Neqerooruteqartitsisarnermut Maalaaruteqartarfimmi suliarineqartassanngillat.

Neqerooruteqartitsisarnermut Maalaaruteqartarfimmi suliat amerlassutsimikkut killilerneqarnissaat anguniarlugu, aammalu Maalaaruteqartarfik sulianik annikinnerusunik, Maalaaruteqartarfiup suliaanut pisariaqanngitsumik artukkiisunik suliaqarani, sanaartugassanut teknikkikkut pisariunerusunut tunngasunik suliaqartartussaammat ammut killiliisoqarpoq.

#### *§ 29-mut*

Imm. 1

Aalajangersakkami kikkut Neqerooruteqartitsisarnermut Maalaaruteqartarfimmut maalaarutinik tunniussisinaanersut aalajangersarneqarpoq.

Maalaaruteqartoq sukkulluunniit inatsisitigit soqutigisaqartuussaaq. Taamaalilluni suliffeqarfiit unioqqutitsisoqartillugu taarsiiffigineqarsinnaatitaasutut isigineqarsinnaasut maalaaruteqarnissamut

pisinnaatitaaffeqarput. Taassuma atuunneratigut qinnuteqartut neqerooruteqartullu saneqqutaarneqartutut misigisimasut tamarmik maalaaruteqarsinnaatitaapput.

Maalaaruteqarsinnaatitaanerli matuma siuliani allassimasunut killilerneqanngilaq. Maleruagassat uniorlugit neqerooruteqartitsisoqarsimannginnera imaluunniit suliariumannittusarsiuussisoqarsimannginnera maalaaruteqarnermut tunngaviusutut eqqarsaatigineqarsinnaavoq. Tamanna tunngaviusimappat qinnuteqartoqarsinnaasimassanngilaq neqerooruteqartoqarsinnaasimassananilu. Kiisalu neqerooruteqartitsisoqarsimagaluarluni neqerooruteqartitsinermi maleruagassanik uniuisoqarsimasinnaanera eqqarsaatigineqarsinnaavoq. Taamatut pisoqarsimappat maleruagassat malinneqarsimasuuppata maalaaruteqartup qinnuteqarsimasinnaagaluarluni imaluunniit neqerooruteqarsimasinnaagaluarluni oqaatigisinnaavaa. Suliffeqarfiit taamaattut taarsiiffigineqarnissamik piunasaqarsinnaagaluarlutik maalaaruteqarsinnaatitaapput, inatsisitigut soqutigisaat neqerooruteqartitsisarnermut maleruagassat malinneqarnerisigut qulakkeerneqartussaammata.

Tassalu suliffeqarfik sunaluunniit neqerooruteqartitsinermi suliariumannittusarsiuussinermiluunniit maleruagassat malillugit ingerlanneqarsimagaluarpat qinnuteqarsimasinnaagaluartoq neqerooruteqarsinnaasimagaluartorluunniit, imaluunniit pilersuisuusinnaagaluartoq maalaaruteqarnissamut pisinnaatitaaffeqarpoq. Maalaarut suliasamik tunniussinissamut aalajangernermit tunngasuusimappat, neqerooruteqartoq kisimi maalaaruteqarsinnaatitaavoq.

Qanorluunniit pisoqassagaluarpat inatsisitigut pisariaqartinneqartunik soqutigisaqarnermi maalaaruteqartup neqerooruteqartitsinermut maleruagassanik unioqqutitsivigineqarnini uparuaatigissavaa, tassungalu inatsisip matuma maalaarummut tunngavigineqarnissaa ilaavoq.

Neqerooruteqartup nammineerluni neqerooruteqartitsisarnermi piunasaqaatinik malinnissimanissaa, neqerooruteqartup maalaaruteqarsinnaaneranut isumaqanngilaq.

Kiisalu Unammilleqatigiinnermut nakutilliisuutit inatsisitigut maalaaruteqarnissamut tunngavissaqarpoq, kiisalu kattuffiit pisortanilu oqartussaasut Naalakkersuisunit maalaaruteqarsinnaatitaallutik. Taakku tassaasinnaapput sulisitsisut peqatigiiffii, Teknikkikkut siunnersuisartut peqatigiiffiat, KANUKOKA aamma Namminersorerullutik Oqartussani naalakkersuisoqarfiit, neqerooruteqartitsisarnermik suliariumannittusarsiuussisarnermillu suliaqartut. Maalaaruteqartarfimmi nakkutilliissutit paasiuminarnerunissaat tamatumani siunertarineqarpoq.

Imm. 2.

Maalaaruteqartarfip inuk alla imaluunniit pisortani oqartussaasoq, suliamut annertuumik pingaaruteqartoq, suliakkiisumut maalaarutigineqartumut iluaqutaasinnaasoq suliami suleqataanissaanut akuerisinnaavaa. Suliaq pineqartoq inummut allamut imaluunniit pisortani oqartussaasumut annertuumik pingaaruteqartinneqarnersoq tassani apequtaassaaq. Oqaaseq “inatsisitigut soqutigisat” maalaaruteqartarfimmi sulinerup siunertaanik tunngaveqarluni nassuiaanermut tunngasuusimassaaq, tassanilu neqerooruteqartitsisarnermut maleruagassat unioqqutinneqarsimanersut aalajangersarneqartassaaq. Taassuma atuunneratigut suliffeqarfiit unioqqutitsisoqarnerani taarsiisussaatitaasussatut eqqarsaatigineqarsinnaasut maalaaruteqarsinnaatitaapput. Inatsisitigut soqutigisat pisariaqartinneqartut atorneqassappata,

maalaaruteqartup neqerooruteqartitsisarnermut maleruagassanik unioqquitsisoqarsimanera maalaarutigisinnaavaa, tassungalugu siunnersuummi maleruagassat maleruagassallu allat siunnersuut naapertorlugu suliarineqarsimasut ilaatinneqarput.

Pisortani oqartussaasunut tunngatillugu assersuutigalugu aalajangiineq siunissami suliakkiisup aamma pisortani oqartussaasut akornanni neqeroorutaasartussanut sunniuteqartussaaitillugu suliaq annertuumik pingaaruteqartussaavoq. Tamatumani suliakkiisup neqeroorutaasa allat sunnerneqarsinnaanissaat eqqarsaatigineqarpoq.

Sanaartugassat suliarineqarnissaannut imaluunniit pilersaarusiornertalimmik suliarineqarnissaannut neqeroorutit pineqartorpiaap saniatigut allanut sunniuteqarsinnaanerat, taamaattumillu suliami suliakkiisumut maalaarutigineqartumut iluaqutaasumik suleqataasinnaanerat tamatumani tunngavigineqarpoq.

Imm. 3

Maalaaruteqartup inatsimmi matumani imaluunniit maleruagassani taanna naapertorlugu suliarineqartuni aalajangersakkanik unioqquitsisoqarsimaneranik isumaqarnini, aamma maalaarutip Neqerooruteqartitsisarnermut Maalaaruteqartarfimmut tunniunneqarsimanera pillugu maalaaruteqartup suliakkiisumut allakkatigut nalunaarutigissavaa. Maalaaruteqartup kingusinnerpaamik maalaarutip Neqerooruteqartitsisarnermut Maalaaruteqartarfimmut tunniunneqarnerani suliakkiisooq tamanna pillugu ilisimatissavaa, suliakkiisooq taamaalilluni maalaarutip Neqerooruteqartitsisarnermut Maalaaruteqartarfimmi suliarineqarnissaanut piareersarnissaminik periarfissineqassalluni.

Maalaaruteqartup maalaarummik tunniussisimaneq pillugu neqerooruteqartitsisumut nalunaaruteqartarnerani, suliap sivikitsumik ingerlanissaa eqqarsaatigalugu maalaarutip, ilaliussanik ilaqartinneqartup assilineranik nassiussinikkut pisinnaavoq, aalajangersakkamili tamanna piumasaaqatigineqanngilaq.

Imm. 4

Maalaarummik Neqerooruteqartitsisarneq pillugu Maalaaruteqartarfimmut nassiussinissamut neqerooruteqartitsinerimi angusat saqqummiunneqarneriniit sapaatit akunnerinut sisamanut piffissalernerqarpoq. Sapaatit akunnerisa sisamat iluanni maalaarummik maalaaruteqartarfimmut tunniussisoqarsimannippat, maalaarummik tunniussinissaq ajornarsissaaq.

### *§ 30-mut*

Imm. 1

Maalaarutip aalajangiinerup atuunnissaanut kinguartitsinermik sunniuteqannginnissaa aallaavigineqartarpoq. Aalajangiinerup atuunnissaanut kinguartitsinermik sunniuteqarnerup oqaatigineqarnerani, maalaarutip Neqerooruteqartitsisarnermut Maalaaruteqartarfimmut tunniunneqarnerani neqerooruteqartitsinerup ingerlaneranik, imaluunniit isumaqatigiisummik

atsiorneqarnissaanik suliap aalajangiiffigineqarnissaata tungaanut kinguartitsinissaq eqqarsaatigineqarpoq. Tassalu maalaaruteqartup nammineerluni maalaarutip Neqerooruteqartitsisarnermut Maalaaruteqartarfimmut tunniunnerani neqerooruteqartitsinerup ingerlaneranik kinguartitsisinnaangilaq.

Maalaaruteqartup piunasaqarneratigut aammalu nalilersuilluarneq tunngavigalugu maalaarutip kinguneqartinneqarnissaata kinguartinneqarnissaanik Neqerooruteqartitsisarnermut Maalaaruteqartarfik aalajangiisinnaavoq, taamaalillunilu suliakkiisup neqerooruteqartitsinini unitsittariaqassavaa, imaluunniit isumaqatigiisummik atsiorsinnaajunnaassalluni.

Aalajangiinerup atuuttussanngortinneqarnerani maalaartoq “aaqqinneqarsinnaanngitsumik akornuserneqarpat”, maleruagassat nalinginnaasut malillugit maalaarut aalajangiinerup atuunnissaanik kinguartitsinermik sunnuteqartinneqassaaq. Tassalu maalaarutip aalajangiinerup atuunnissaanik kinguartitsinermik sunnuteqannginnissaanut maleruagassat nalinginnaasut saneqqunneqassappata pisut immikkut ittut pisimasussaapput, kisiannili suliमित suliमित immikkut naliliisoqartartussaavoq. Pisussanut allattukkanik suliaqartoqarsinnaangilaq.

Imm. 2

Unioqqutitsineq annasaqarnermik kinguneqarsimappat inatsimmik unioqqutitsineq taarsiisussanngortitsinermik kinguneqarsinnaavoq. Kiisalu akisussaatinneqartup iliuuserisaata annaasallu akornanni akisussaasuunermi tunngavissatut pissutaasullu ataqatigiinnissaanut piunasaqaatit naammassineqarsimappata aatsaat taarsiisussanngortitsisoqarsinnaavoq.

Taarsiisussanngortitsinermut maalaaruteqartup Neqerooruteqartitsisarnermut Maalaaruteqartarfimmut maalaarummini tamakkiisumik ilaannaasumilluunniit taparserneqarsimanissaa piunasaqaatigineqarpoq. Tassalu taarseeqqusinissaannaq tamatumani naammangilaq. Aammattaaq neqerooruteqartitsisup maalaarutigineqartup neqerooruteqartitsisarnermut maleruagassanik unioqqutitsisimanerata saqqummiunneqarsimanissaa pisariaqarpoq.

Maalaaruteqartarfiup suliakkiisooq/neqerooruteqartitsisooq taarsiisussanngortinneqassanersoq taamaallaat aalajangiiffigisinnaavaa. Tassalu Maalaaruteqartarfik namminersortoq taarsiisussanngortinneqassanersoq aalajangiisinnaangilaq.

Neqerooruteqartoq qaangiinnarneqartoq isumaqatigiisummik sumiginnaasimaneq tunngavigalugu sassartutut inissinneqarnissaminik piunasaqarsinnaavoq. Suliariumannittussarsiuussinermut neqerooruteqartitsinermullu atatillugu taarsiisussanngortitsinissamut apeqquq, neqerooruteqartitsisarnermut maleruagassanut uniuiffiusooq amerlanertigut isertitassanut annaasanut tunngasuusarpoq.

Isertitassanut annaasanut taarsiisussanngortitsinermi taarsiiffigineqarsinnaatitaasoq suliassamik tunineqarsimasutut inissinneqassaaq. Taamatut pisoqartillugu isertitassat pissarsiarineqassappata neqerooruteqarnermut aningaasartuutit, aningaasartuutit isumaqatigiissusiornermi akigititaasut aqqutigalugit akilerneqartussanut ilaatillugit akilerneqartussaapput.

Naammassinninnissamut soqutigisat angusaqarfiusinnaasut naapertorlugit taarsiisoqassappat maleruagassanik unioqqutitsineq annaasaqarnermik kinguneqarsimasussaavoq. Tassalu neqerooruteqartoq, naleqqutinngitsumik neqerooruteqarnermi kingunerisaanik sukkulluunniit isumaqatigiissusiorfigineqarnissamik angusaqarsinnaasimanngitsoq, suliakkiissummik tunineqarnissamut naatsorsuutigisaqartutut imminut nittarsaassinnaanngilaq, taamaattumillu taarsiiffigineqarnissaq pisinnaatitaaffigisinnaanagu.

Isertitassat annaaneqartut taarserneqarnissaannut piumasaqaammik neqerooruteqartoq ataasiinnaq saqqummiussisinnaavoq.

Neqerooruteqartup pineqartup inatsit manna taannalu tunngavigalugu maleruagassiarineqartut naapertorlugit neqerooruteqartitsinermit maleruagassat unioqqutinneqarsimanngitsuuppata isumaqatigiissusiorfissaasimagaluarnera pingaaruteqartinneqassaaq. Tamanna pisimappat neqerooruteqartoq isertitassatut annaasani taarseqqusinnaassavai, tamanna pissutaasunut attavissaammat pisariaqartoq. Aammattaaq neqerooruteqartoq isumaqatigiissummik pissarsinissamut inatsisitigut piumasaqarsinnaanngikkaluarpalluunniit tamanna pissaaq.

Taamatut pisoqartillugu neqerooruteqartoq isumaqatigiissummik tunineqarsimasutut pitsaatigisumik inissinneqassaaq. Neqerooruteqartup isertitassatut annaasassani ilanngaaseriikkat kisiisa taarsertinnissaannik ersersitsisumik ataatsimut isumaliutersuuteqartoqassaaq.

Tamatuma saniatigut neqerooruteqartitsinerup kingunerisaanik aningaasartuutigisimasanut matussutissanik taarsiiffigineqarnermini isumaqatigiissusiorsimanngitsutut inissinneqarnissani maalaaruteqartup piumasarisinnaavaa. Tunngaviatigut siullermeerutaasumik neqerooruteqartitsinerni neqeroorusiornermit aningaasartuutininik asuliinnaq akiliisimanermit matussutissanik taarsiiffigineqarnissamik neqerooruteqartut qinnuteqartullu tamarmik piumasaqarsinnaapput.

Neqeroorusiornermit aningaasartuutininik asuliinnaq akiliisimanermit matussutissanik taarseqqusinerneq iliuitsit annaasallu akisussaaffigineqarnerisa akornanni pissutsinik ataqatigiittoqartoq eqqorneqartup uppersarsassavaa. Tassanilu pineqartoq annaasanik nalimmassaaneruvoq, eqqorneqartup neqerooruteqartitsinermit ilaasimannginneratut eqqorneqartumut inissitsisusaaq.

Neqeroorusiornermit aningaasartuutininik asuliinnaq akiliisimanermit assersuutitut taaneqarsinnaapput neqeroorutit tunniunneqartut akornanni naleqquttumik nalilersuisoqarsimannginnera, aammalu neqerooruteqartup nalilersuinermit neqerooruteqartut naatsorsuutigisinnaasaanik tunngaveqartumik suliaqartoqarsimannginnera.

Tamatuma saniatigut neqerooruteqartoq taarsiiffigineqarnissamik siunertaqarluni suliamik eqqartuussivinnut ingerlatitseqqinnissamik periarfissaqarpoq.

### § 31-mut

Neqerooruteqartitsisarnermit Maalaaruteqartarfiup maalaarut tunniunneqartoq tamakkiisumik ilaannaasumilluunniit taparserneqarpat suliakkiisoq maalaaruteqartup maalaarummik suliaqartitsinerminut atatillugu aningaasartuutigisimasaanut akiliisussanngortissinnaavaa.

Suliamut aningaasartuutit naliliiffigineqarnerini suliap annertussusiata nalilerneqarnera, aningaasaqarnikkut soqutigisat ilaatinneqartut, aammalu maalaarut eqqartuussissuserisumit saqqummiunneqarsimasimansoq tunngavigineqassapput.

### *§ 32-mut*

#### Imm. 1

Neqerooruteqartitsisarnermut Maalaaruteqartarfiup aalajangigaasa allaffissornikkut oqartussaasunut allanut ingerlateqqinneqarsinnaannginnerat aalajangersakkami erseqqissarneqarpoq. Kisiannili Neqerooruteqartitsisarnermut Maalaaruteqartarfik eqqartuussiviunngimmat Neqerooruteqartitsisarnermut Maalaaruteqartarfiup aalajangigai inatsisini tunngaviusuni § 63 naapertorlugu eqqartuussivinnut tamatigut ingerlateqqinneqartarsinnaapput, taamaattorli imm. 2 takuuk.

#### Imm. 2

Imm. 2 naapertorlugu suliamik eqqartuussivimmud ingerlatitseqqinnissaq aalajangiinerup pineqartumut nalunaarutigineqarnerata kingorna kingusinnerpaamik sapaatit akunnerisa arfineq pingasut qaangiunnerini pissaaq. Illuatungeriit aalajangiineq tunngavigalugu suliamik ingerlatsisinaanissaat, aammalu akerriliissuteqarnissap piffissami sivisuallaami annaasaqarnermik kinguneqartumik utaqqqineqarnissaata pinngitsoorneqarnissaa tamatumani tunngaviuvoq.

Aamma taassuma atuunneratigut Neqerooruteqartitsisarnermut Maalaaruteqartarfiup aalajangiinera, aalajangiinerup illuatungiliuttumut pineqartumut nalunaarutigineqarneraniit kingusinnerpaamik sapaatit akunnerisa arfineq pingasut qaangiunnerini akerrilerneqarsimanngippat, Neqerooruteqartitsisarnermut Maalaaruteqartarfiup aalajangerneru inaarutaasumik atuuttussanngortinneqassaaq.

### *§ 33-mut*

#### Imm. 1

Aalajangersakkami piaarluni imaluunniit mianersuaalliorujussuarluni paasissutissanik eqqunngitsunik paatsoortitsisinaanunillu tunniussisup, imaluunniit paasissutissanik pingaaruteqartunik nipangiussisup, imaluunniit Neqerooruteqartitsisarnermut Maalaaruteqartarfiup inerteqqutaanik peqqussutaanilluunniit naammassinninngitsoortup akiliisussanngortinneqarluni pineqaatissinneqarsinnaanera periarfissinneqarpoq.

#### Imm. 2.

Aalajangersakkami inatsisitigut pisussaatitaasut pinsinnaatitaasullu pinerluttulerinermut inatsisitigut akisussaatitaanerat pillugu maleruagassanik aalajangersaasoqarpoq.

### *§ 34-mut*

Aalajangersakkap atuutilerneratigut § 28, imm. 2 naapertorlugu paasissutissanik Neqerooruteqartitsisarnermut Maalaaruteqartarfimmut paasissutissanik tunniussinngitsoortoqartillugu Maalaaruteqartarfik pinngitsaaliissutitut ullormoortumik akiligassanngortitsisinnaavoq, taakkulu sioqqutsisumik eqqartuussinertaqanngitsumik pinngitsaaliissummik naammassitinneqarsinnaapput.

Paasissutissat piumaneqartut tunniunneqartarnissaat aalajangersakkakkut qulakkeerneqassaaq. Akiligassanngortitsisarneq § 28, imm. 2-p naammassineqartarnissaanut kaammattuutaassaaq.

Aalajangersagaq pingaartumik Neqerooruteqartitsisarnermut Maalaaruteqartarfiup paasissutissanik suliami pingaartumik suliakkiisumit paasissutissinneqarnissamut periarfissaqarnerani isumaqartartussaavoq.

Ullormoortumik akiligassiisarnissamut piginnaatitaaffik Neqerooruteqartitsisarnermut Maalaaruteqartarfimmut suliakkiissutigineqarpoq.

### *Kapitali 8-imut*

#### *§ 35-mut*

Piginnaatitsissuteqarnermi illuliornermi kalaallit sanasutut sulisut ilinniartitaanerisa siuarsarneqarnissaa pingaarnertut siunertarineqarpoq. Sanaartugassanut neqerooruteqartitsisarneq pillugu Namminersornerullutik Oqartussat nalunaarutaanni nr. 15-imi, 5. juli 2007-imeersumi (neqerooruteqartitsisarnermut nalunaarummi) maleruagassat atuuttut, suliariumannittussarsiuussisarnermut inatsit tunngavigalugu aalajangersarneqarsimasut, inatsillu manna aqqutigalugu atorunnaarsinneqartussat allaffissornikkut aalajangersakkatut ingerlateqqinneqarnissaat siunertarineqarpoq.

#### *§ 36-mut*

Inatsit kingumoortumik atuutissanngilaq, taamaallaat suliassanut ullup atuutilerfiata kingorna 1. juli 2009-p neqerooruteqartitsivigineqartunut atuutissalluni.

Tamanna isumaqarpoq neqerooruteqartitsinissamut allagarsiussaq 1. juli 2009 sioqqullugu naqinneqartussanngortinneqarsimappat, imaluunniit neqerooruteqartitsiniarluni (neqerooruteqarnissamut kajumissaarutitut) allakkiaq nassiunneqarsimappat pissutsit taakkua inatsimmi pineqartunut ilaatinneqanngillat. Tassalu suliariumannittussarsiuussineq imaluunniit suliaqartinniakkat ilisimatereerlugit neqerooruteqartitsineq ullup atuutilersitsiviusup kingorna pigaluarpalluunniit tamanna pingaaruteqanngilaq.

Neqeroorut tunniunneqartoq tunngavigalugu piffissap qanoq ilinerani isumaqatigiissusiorsimanissamut piffissamik inatsimmi aalajangersaasoqanngilaq. Pissutsit

naapertorlugit piffissaq taanna sivisusinnaavoq. Neqerooruteqartitsinerup unitsinneqannginnissaa, kisiannili ingerlaavartumik isumaqatiginninniartoqarnissaa eqqarsaatigalugu inatsisip atuutilernissaa sioqqullugu neqerooruteqartitsineq tunngavigalugu isumaqatigiissusiorderit unioqqutitsinerunngitsumik inatsisip atuutilernerata kingorna naammassineqarsinnaapput. Siusinnerusukkut maleruagassat atuuttut naapertorlugit neqerooruteqartitsineq unitsinneqarpat, 1. juli 2009-p kingorna isumaqatigiissusiorderinissanut atatillugu inatsimmi maleruagassat naapertorlugit nutaamik neqerooruteqartitsinissaq pisariaqarsinnaavoq.

Imm. 2

Suliassaqarfimmi inatsisip atuuttuusimasup atorunnaarsinneqarnera aalajangersakkami oqaatigineqarpoq.

Imm. 3

Sanaartugassanut neqerooruteqartitsisarneq pillugu nalunaarutip nr. 15-ip, 5. juli 2007-imeersup atorunnaarsinneqarnera aalajangersakkami erseqqissarneqarpoq.

#### *§ 37-mut*

Inatsit Pituffimmi sakkutooqarfimmut (Thule Air Basemut) atuutinngilaq. Suliassaqarfik taanna illersornissamut isumaqatigiissummut, Danmarkimi naalakkersuisut aamma Amerikami naalagaaffiit peqatigiit naalakkersuisuisa akornanni isumaqatigiissutaasimasumut ilaavoq.